

أحمد العسيلي

نُصْنُ كِتَاب



أهدي هذا الكتاب إليكي، إليك..

عشان نخلص من المعضلة الشهيرة من أولها كده، ده كتاب «مسموع»؛ أنا بكتب بالعامية، بلساني، حتى وإن اضطرني ذلك أحياناً إلى كسر قواعد أساسية في اللغة العربية كسرا صريحا واضحا، بأن أرفع منصوبا أو أنصب مرفوعا كما يفعلون في بلدنا؛ وبستعمل جنباً إلى جنب مع الكلام المكسورة قواعدده، كمان كلام عربي فصيح، اللي يعرفني وسمعني قبل كده أسهل عليه اكتشاف النقلات، وغير كده برجاء الاهتمام بالتشكيل.

(ونصيحة شخصية حتى تكتمل التجربة، اقرا إن أمكن بصوت، حتى وإن كانت تمتمة خافتة، لو قرئت بصوت حتسمعني، فحقيقى عندي فرصة أكبر أوصلك).

المحتويات

١١	مقدمة
١٧	عن الكتاب
١٩	عن المنطق والفلسفة
٢٧	الإنسان الفيلسوف
٤٣	أم العلوم
٥١	عن دين الفلسفة وفلسفة الدين
٦٥	عن الفلسفة الإسلامية
٧٩	البداية
٨٩	سقراط
٩٥	القاضي الفيلسوف
١٠٣	أفلاطون
١١٥	الكهف

- ١١٩ أرسطو
- ١٣٥ خاتمة
- ١٤٣ مش النهاية
- ١٤٥ عن المؤلف
- ١٤٧ مراجع

العلم واضح في علاقته بالحياة، علاقتهم مباشرة عشان كده
بيمشوا جنب بعض؛ لكن مش شرط ده يحصل مع الفلسفة،
الفلسفة هي اللي دايمًا تفتح الطريق آه، لكن أول ما يفتح، ممكن
انت تسيبها وتمشي لوحدك.

أنظمة السياسة والاقتصاد مثلا اللي بيدار بيها العالم من شيوعية
لاشترابية لرأسمالية للديمقراطية نفسها هي منتجات فلسفية،
بتخلقهم الفلسفة وبعدين بتسيبهم لمصائرهم. يدخل النبي آدم
بقه بفضوله وذكاؤه ودهاؤه ونبأه وسوء نيته يلعب في الفكرة،
ويطبقها بالطريقة اللي يشوفها ويفهمها وتليق على ظروفه وأفكاره
و«غرضه». وسهل جدا يبعد عن الفلسفة الأصلية اللي بدأ منها،
أو اللي هو فاكرا إنه ماشي في ضلّها لا يحيد عنها، ويستبدلها بفلسفة
مختلفة تماما وهو مش واخذ باله (أو وهو واخذ).

طبعا من أسباب ده إن العالم مكان جَد، دايمًا فيه حاجة بتحصل،
مايقفش يستنى حد؛ الفلسفة محتاجة وقت تتبني فيه، تفرج وتنظر
وتجرب وتراقب لكن العالم مش رايق كده، السياسة مش رايقة
والاقتصاد مش رايق، دايمًا فيه مليون حاجة بتحصل، دايمًا فيه
مليارات الناس عايزة تاكل وتشرب وتلبس، دايمًا فيه صراعات
بين القوى، دايمًا فيه فقر، دايمًا فيه بلطجة، فالوقت والمساحة
الضرورين للتفلسف سهل مايقوش مكان في وسط كل ده.

والفلسفة اللي سهل ماتلاقيش مكان دي هي أصلا اللي
بيستخدمها النبي آدم عشان يعرف هو حيتصرف إزاي، حيعمل إيه

ومش جيعمل إيه، حيبني دولة شكلها إيه، حيلعب سياسة إزاي، حيمشي الاقتصاد ويوزع الثروة بأنهي طريقة، والطرق اللي يعرفها دي تنفع ولّا لازم يخترع طرق جديدة، وهكذا. والحياة مابتقفش مكانها لحد ما حضرتك يا فيلسوف تخلص مذاكرة عشان تبقى متأكد إنك على الطريق الصح، الواقع لا يمهل حد إنه يخلص تفكير، التفكير بيحصل وانت ماشي، النظرية بتبدأ تتطبق قبل ما تخلص، وساعات بقة لما الظروف تسمح ويبقى فيه ناس عندهم القدرة إنهم يغيروا وأصلا عايزين يغيروا بتبدأ محاولة الإصلاح. المهم يعني إننا نفهم إن الوقوع في الأخطاء شيء «طبيعي» زيادة عن اللزوم، وده أصلا أصلا بعيدا عن سوء النوايا خلوا بالكو، المقصود هنا هي الأخطاء الغير مقصودة، الأخطاء اللي سببها إننا لسه مافهمناش، مالاقيناش «أحسن طريقة».

أنا بشوف السياسة والاقتصاد في أغلب العالم ماشيين بسرعة أبطأ مما ينبغي، عشان كده بعد كل آلاف السنين دي تلاقي جرائم بدائية لسه بترتكب وبغزارة، عشان كده فيه في العالم بعد كل التجارب دي، بعد كل التاريخ ده، بعد كل التعلم ده، سمنة وجوع في نفس اللحظة، على نفس الكوكب! عشان كده فيه مجلس أمن وفيه فيتو يضرب بقرارات مجلس الأمن الحائط في نفس القاعة! عشان كده فيه ديمقراطيات «مستبدة»، عشان كده فيه إسرائيل بتقتل أطفال في فلسطين وتقدم حجج العالم يقبلها، عشان كده فيه في اللحظة دي من تاريخ البشرية مجاهدين بيقتلوا أهلهم عشان يعملوا «دولة إسلامية»، عشان كده فيه حروب أهلية لحد اللحظة

دي من تاريخ الأرض. عشان كده لسه فيه تطرف بل لسه فيه تجارة بشر في نفس العالم اللي فيه الأمم المتحدة والاتحاد الأوروبي والديمقراطيات الكبيرة. عشان كده بعد كل ذلك التاريخ تجارة السلاح هي أكبر تجارة في العالم، والأمثلة كثيرة جدا بقه للي عايز يتأمل ويطلع الباقي، للي عايز يتأكد إن العالم بيعمل حاجة غلط، جامد يعني.

أنا بتصور العالم بيتحرك بسرعة جدا بس من غير فرامل، والقوة والسرعة من غير قدرة على التحكم فيهم مأساة، واللي بيعلم النبي آدم إزاي يتحكم في كل حاجة هي الفلسفة، عشان كده خطر كبير لما الفلسفة تمشي بسرعة أبطأ من السرعة اللي ماشية بيها الحياة.

الثورات العربية الأخيرة بغض النظر عن كل التفاصيل يعني قامت أصلا على أنظمة عتيقة ثابتة في الأرض بقالها عقود بفضل السرعة اللي ماشية بيها التكنولوجيا، الإنترنت والفضائيات كانوا في رأيي أهم مكون من مكونات الثورات دي؛ الأنظمة الحمقاء اللي كانت بتحكمهم وقعت لإنها مشيت بسرعة أبطأ من سرعة الناس، أبطأ من سرعة الحياة، بفلسفة عتيقة بالية غبية، أو بلا فلسفة إطلاقا في الحقيقة.

غرضي بدأ يوضح أعتقد، أنا شخصيا في العالم جديد اللي النبي آدم فيه اتغير وبتغير كل يوم، عايز شكل جديد للدولة، شكل جديد للديمقراطية، شكل جديد للتعليم، طريقة جديدة في الحكم،

طريقة جديدة في محاولة تحقيق أحلام الناس، طريقة جديدة في السعي وراء النجاح. ما عنديش الطريقة دي جاهزة كده حطّلها من الدرج وادّيهالكو، بس انا بكتب وبتكلم زي ما اكون بوسوسلُكو كده، في محاولة إنني ألهمكو تلاقوها معايا.

أتمنى لهذا الكتاب إنه يساعدكو تلاقوها، أتمنى لهذا الكتاب أن ينفعَ المستقبل.

دراسة التاريخ ضرورية لفهم الحاضر، وفهم الحاضر ضروري للاستعداد للمستقبل.

الكتاب ده مش عن التاريخ، الكتاب ده عن صناعة التاريخ، عن صناعة حضارة بني آدم على الأرض؛ عن الفلسفة.

تُمْكِنُهَا مِنَ الْوُصُولِ، تُمْكِنُهَا مِنَ الْوُصُولِ لِلْحَقِيقَةِ، وَتُمْكِنُهَا مِنَ الْوُصُولِ كَمَا لِلْحَقِّ وَالْعَدْلِ وَالْخَيْرِ وَالْجَمَالِ... إلخ، حَتَّى النِّجَاحِ مُسْتَحِيلٍ تَوْصِلُهُ مِنْ غَيْرِ فِلْسَافَةٍ؛ كُلُّ نِجَاحٍ كَبِيرٍ عَظِيمٍ مُهِمٌّ مُؤَثِّرٌ لَازِمٌ يَبْقَى عِنْدَهُ فِلْسَافَةٌ، وَإِلَّا حَيْصَلُ أَزَايٍ؟ حَيْغِيرُ الْإِتِّجَاهِ أَزَايٍ؟ حَيْتَبْنِي عَلَى إِيهِ؟

الفلسفة هي اللي بيستعملها النبي آدم عشان يحط المبادئ الحاكمة دي (اللي بتتبني فوقها بعدين الأخلاق). فمبدئياً كده المبدأ اللي من غير فلسفة هو خارج منها، يبقى مبدأ عبيط علطول، زي مثلا إنك تقول: أنا مبدئي إني مأكّلش ملبوخية، ده مش مبدأ لأنه مش مبني على فلسفة، ومالوش علاقة بالأخلاق، لكن لو قلت أنا ماباكلش حيوانات عشان بيصعبوا عليا إننا ندبحهم وناكلهم، يبقى ده مبدأ أهه، عشان مبني على فلسفة، على وجهة نظر، على مجموعة مفاهيم. طيب أنا ماباكلش خنزير عشان مابحبوش أو بقرف منه، ده موضوع مش مبادئي، لكن ماباكلش خنزير عشان أنا مسلم، ده تصرف مبني على مبدأ ديني، وهكذا.

بعد ما تبني منظومة المبادئ بتاعتك (والكلام ده يسري على الفرد زي المجتمع)؛ يبجي بقه الدور على الأخلاق، أخلاقك لازم تبقى ترجمة لمبادئك، أي خُلِقْ مش مبني على مبدأ يبقى برضه موضوع لوحدته، أنا ببتسم في وش الناس عشان أنا خلقتي كده ده مش مبدأ؛ أنا ببتسم في وش الناس عشان الابتسام فضيلة بينشر السعادة والمحبة، ده مبدأ؛ أنا ببتسم في وش الناس عشان «تبسّمك

فسي وجه أخيك صدقة»، مبدأ برضه؛ (مبدأ نفعي صحيح لو اتعمل وهو ده غرضك الوحيد منه، من غير ما تبص على أثره على اللي بتبشسم في وشهم دول لكنّه مبدأ). بيْتتُج منه خير مش غرضه الناس بل غرضه نفسك صحيح، بس مبدأ مبني عليه التصرف اللي انت بتعمله.

اللي ماعندوش مبادئ بقره مش محتاج يتفلسف قبل ما يتصرّف خلي بالك، ولا بعد ما يتصرّف؛ بيحاول ياخذ اللي هو عايزه وخلص ومالوش دعوة بإيه حيحصل، مالوش دعوة مين حيتضر، مالوش دعوة خالص بأثر أفعاله على العالم، مالوش دعوة غير باللي هو عايزه. ممكن تتصوّر إن ده نفسه مبدأ لكنه مش كده، دي أنانية، نفعية، قصر نظر، أي حاجة، المبدأ لازم يبقى عنده غاية «أخلاقية». فأصلا اللي بيخلق الحاجة للنوع ده من التفلسف هو أن يبقى عندك مبادئ أخلاقية عايز تتأكد دايمًا إنك محافظ عليها.

ناس مصريين مثلا في اللحظة دي من التاريخ بالذات، في نفس الحالة اللي احنا فيها دي، لو سألت واحد مايدفعش ضرائب، تسأله: ليه مايدفعش الضرائب «اللي عليك»؟ يقولك: عشان هي فين الخدمات اللي انا باخدها؟ إنت مش شايف الشوارع عاملة ازاي؟ وبعدين الفلوس دي كلها بتسرق، فلسفة أهه، بس فلسفة غرضها النفع الشخصي، وما فيش مبادئ حاكمة ليها، وما عندهاش أغراض أخلاقية، تبقى مش فلسفة المبادئ اللي بتتكلم عنها (مع إنها بتستعمل المنطق اللي لسه كل ده الدور ماجاش في الكلام عنه 😊).

اللي بيدفع ضرايب بقة تسألُه إنت بتدفع ضرايب ليه؟ يقولك أنا مش عاجباني خالص الطريقة اللي بتتصرف بيها الضرايب وشايف إننا عال أقل فلوسنا بتتبدد لكن أنا ماقدرش أعمل تصرف غير أخلاقي زي اني أزوغ من الضرايب، في الضرايب اللي بدفعها حقوق للفقراء، وهي فلوس الدولة محتاجاها عشان تفضل ماشية فأنا حدف اللي عليا والنتيجة مش شغلتي؛ بيتصرف بناءً على مبدأ أهه. واحد تاني يقول أنا بدفع ضرايب بالرغم من إساءة التصرف فيها، عشان عدم دفع الضرايب تهرب وكسر للقانون، وانا ماكسرش قانون لإنني مؤمن بفائدته وجدواه في كل الأحوال، مبدأ أهه كمان، أنا بدفع ضرايب وانا عارف ان بيُساء استعمالها وشغلتي أنا وبقية الناس إننا نفضل نحارب عشان نُستخدم بشكل أحسن ينعف الناس أكثر، مبدأ أهه كمان. وبالتفلسف بقة تقعد تحاول تعرف مين في الثلاثة اللي بيدفعوا ضرايب دول بيتصرف بطريقة أكثر أخلاقية مثلاً، مين فيهم صح أكثر من التاني، ولآ هم صحات مختلفة بس متساوية بما ان النتيجة من وراهم كلهم واحدة، إن كلهم دفعوا الضرايب، ولآ هم مختلفين عشان ده الدافع بتاعه أخلاقي مبادئي شخصي، والتاني الدافع بتاعه نفع الجماعة كلها والحفاظ على حقوق الفقراء، ولآ الثالث أرقى منهم هم الاتنين على سلم المبادئ الأخلاقية عشان كمان فلسفته بتتضمن إنه يكافح ويحارب ويحاول يخلّي بلده أحسن، فيبقى ده أكثر أخلاقية من اللي قبله، وهكذا الفلسفة بتقيس ما لا يمكن قياسه بغيرها.

باستعمال إيه أهم حاجة، المنطق؛ يبقى أول وأهم حاجة نعرفها
عن علاقة الفلسفة بالمنطق هي إن أي فلسفة مش مبنية على منطق
سليم، واحد زائد واحد يساوي اثنين، تبقى فلسفة فارغة لا قيمة
لها، أنا مش حذف ضرايب عشان مادخلتش الجامعة، عشان
التلاجة بايظة، عشان الدنيا حر، أي حاجة بلا منطق.

طيب معضلة المنطق بقه اللي لازم تاخذ بالك منها كويس جدا
وانت بتقترب من الفلسفة إن المنطق ممكن يخدعك، زي مثلا
في حالة أنا ما بدفعش ضرايب عشان الفلوس بتسرق؛ لو عملنا
شوية رياضة عقلية على المبدأ ده حنلاقي أولا إنك ماتعرفش قد
إيه فلوس بتسرق، وفرضيتك إن كل الفلوس اللي انت بتدفعها
كضرايب حتسرق وما حدش حيستفيد منها دي فرضية غير منطقية.
ثانيا هو فيه فلوس بتسرق أو بتتبدد أو يبساء استعمالها في حالة زي
حالتنا دي؟ آه طبعاً، لكن ده موضوع ثاني غير إنك تدفع ضرايبك،
تدفع ضرايب دي حاجة وتحارب الفساد اللي بيقلل جدوى
الفلوس دي ده موضوع ثاني. ثالثاً بقه إنك حتى لو اشتكيت من
نوع الخدمات اللي بتتقدمك فانت بتحصل على خدمات، وعايز
أحسن طول الوقت؛ مش عاجبك الأسفلت بس بتمشي في الشارع،
مش عاجبك البوليس بس فيه بوليس، مش عاجباك المستشفيات
لكن فيه مستشفيات، وكل ده بيتعمل بفلوس الضرايب اللي انت
نفسك بتستفيد منها حتى لو مادفعتهاش. يبقى لو قلت أنا ما بدفعش
ضرايب عشان الضرايب بتسرق تبقى بتستعمل أدوات منطقية

عشان تبرّر فعل غير منطقي (ده زائد يعني إنه غير أخلاقي). تبقى وقعت في حفرة كبيرة جدا، ولا انت محصل اللي ماعدوش مبدأ ومايستعملش أي منطق، ولا انت طبعا تقدر تحصل صاحب المبدأ المنطقي الأخلاقي المفيد للناس.

وهنا فيه معضلة كبيرة بتظهر؛ لو كل شخص لازم يبقى ماسك ميزان المنطق في إيدته في كل الأوقات وهو بيطلع فلسفة لنفسه تخص أي موضوع في الدنيا، لو منطقته باظ فلسفته حتبقى بايظة، والمعضلة انه مش حيقى عارف أصلا! زي كده إنك ترمي زبالة في الشارع طول ما انت ماشي ومع ذلك تبقى مقتنع تماما إنك عايز البلد تبقى نظيفة 😊 منطق فاسد أهه، أنتج فلسفة فاسدة، اسمها «هي جت عليا انا؟!»، فلسفة فاسدة أهه، فلسفة فاسدة بيعتقد فيها عشرات ملايين الناس، إنت نفسك لا مؤاخذة يعني ممكن تكون منهم. زي الموظف المرتشي اللي عنده زبيبة صلاة، زي رجل الدين الشتام اللعان الكاره لكل الناس، زي الإرهاب «الإسلامي»، زي كل اللي بيسوقوا عربيات وموتسيكلات دول وماينوروش النور ولو سألته حيقولك عشان ماضيا يقش اللي قدامي! (اللي قدامه ده اللي هو حيكسر عليه حالا أهه أول ما يعديه!) وكتير بقره من ده آلاف الأمثلة كل واحد فيكو يعرف يفكر في شوية منها (حتى لو لقي نفسه بيعمل نفس التصرف اللي منطقته فاسد ففلسفته فاسدة فكله فاسد ده).

أنا معتقد إن المنطق يفسد لما العقل يتعود إنه يقتنع بثوابت غير منطقية؛ عشان رجل الدين قالها فهي «مقدسة»، عشان مكتوبة في كتاب القراءة، عشان المدرّس قالها، الأم والأب قالوها، الناس كلّها بتعملها... إلخ إلخ، فيتعود العقل إن واحد زائد واحد مايساوش اثنين ولا حاجة، فيطلع ده بقة في كل صورة ممكنة؛ في طرق تربية الأطفال، في عمل جهاز الدولة، في القوانين، في طريقة السواقة، في الثورة، في الاختيارات السياسية، في تصديق ناس نصايين أو جهلة وعملهم «نجوم المجتمع»، في انتخاب ناس مجانين لقيادة الدولة أو لسنّ قوانينها في البرلمان، في اللي بيعاكس واحدة فيبشتمها، في الرصيف اللي ارتفاعه نص متر، في تجريف الأرض الزراعية، في حرق قش الرز، في ختان البنات، في كلبشة العربية اللي راكنة صنف تاني، في مليون حاجة؛ كل دي مشاكل منطق فاسد، بتتبني فوقه فلسفة فاسدة، فتطلع منها كل الأفعال «الغير منطقية» دي.

ده زائد بقة كمان إن لما المنطق والفلسفة الاتنين بيوظوا، الضمير شخصيا مستحيل يستقيم، ما همّ دول اللي انت بتقيس بيهم أخلاقية أفعالك، لو باظ الميزان اللي بتقيس بيه حتقيس الصح والغلط بياه! ولو أي مجتمع بحالته كده مابقاش بيقاس الصح والغلط حيحصل فيه إيه؟

طيب إزاي بقة تقدر تقنع شخص ما «بالمنطق»، إن منطق فاسد فيوصله لنتائج مزيفة وغير منطقية وبيخلّيه يرتكب أفعال مجنونة وغير منطقية؟! إزاي وهو أصلا أساسا حيحكم على كلامك ده

بمنطقه هو برضه؟! دي معضلة كبيرة مالهاش غير حل واحد، إن المنطق السليم يتتصر؛ يتتصر بقة بالديمقراطية لما الأغلبية منطقتها يبقى سليم، يتتصر بإن الدولة تبقى عندها فلسفة «منطقية» فتبدأ تصلح أخطاء المنطق اللي بالملايين دي لحد ما الميزان يتعدل تاني في عقول الناس، المهم إن لازم تحصل ثورة «منطق». لازم كلنا نفهم إن طول ما اللامنطق منتشر كده مافيش حاجة حتتغير، مستحيل.

ولو حد بقة عايز يبدأ الثورة دي حالا من عند نفسه، أول وأهم حاجة لازم تتعمل في تصوّري، هي تقديس فكرة قياس الأثر بتاع أي فعل في الدنيا، أي فكرة في الدنيا وجعل ده هو الحكم عليها، على جدواها وفايدتها، على صحها من غلطها؛ لو كل الناس عملوا كده حيحصل إيه؟ لو كل الناس فكروا كده حيحصل إيه؟ لما بتعمل كده أو كده النتيجة «المنطقية» حتبقى إيه؟ هو ده اللي انا عايزه ولأنا عايز حاجة تانية؟ لو ده اللي انت عايزه يبقى عمله، لو النتيجة مش هي اللي انت عايزه يبقى لازم تغيّر اللي انت بتعمله، سهلة.

قياس التأثير والأثر والنتيجة ومقارنتهم بأسبابهم هو حجر أساس التفكير المنطقي، لما بعمل كذا (ده واحد)، وفيه أصلا كذا (ده الواحد التاني) النتيجة بتبقى اتنين، مجموع واحد على واحد. عشان كده أينشتاين العبقري قال في تعريف الجنون، هو إنك تفضل تتصرّف بنفس الطريقة وتتوقع نتيجة مختلفة. تتصرّف من غير ما تحسب النتيجة والأثر والتأثير فتبقى شخص، إنسان، بني آدم، ما بتستعملش أهم وأكبر نعم ربنا عليك: منطقتك، عقلك.

الإنسان الفيلسوف

بِحِب تسمية الإنسان بأنه أصلا الكائن الفيلسوف؛ الشجر والحيوان والجماد ما يعرفوش الفلسفة، إنما ابن آدم صاحب العقل والمنطق ووجهة النظر والضمير، هو كائن أصلا أساسا فيلسوف. لكن الحياة بقه مُلهية زي ما انتو أكيد ملاحظين 😊 شغل ومذاكرة وتخطيط وحاجات الواحد عايزها وحاجات الواحد خايف منها وأحلام وإحباطات وأكل عيش ومُتر كمان! زحمة جدا الحياة. فأغلب البشر بسبب طبيعة الدنيا بيتلخمو فيها، فيبيعدوا عن طبيعتهم الأصلأ أساسا فلسفية دي ويبيعيشوا وخلاص.

بني آدم بيتكلموا من أول التاريخ عن العدل والمساواة والحرية والمواضيع الكبيرة الشبيهة، بس في الحقيقة أغلب البشر بيذكروا الكلمات دي بس من غير ما يتعمقوا بالتفكير في معانيها. ممكن بسهولة تتصوّر انك عارف يعني إيه عدل وحرية وخير وأخلاق وغيره؛ كلمة من هنا على كلمة من هناك، حاجة قريتها هنا على

حاجة قريتها هناك، على شوية فكاكة كده وخلاص بتحس إنك عارف دول إيه؛ وبعدين تلاقي الفيلسوف هو اللي يبسأل بقة؛ هو يعني عدل فعلا؟ إزاي يتحقق العدل ده على كل الناس الكثير المختلفين أوي عن بعض دول، اللي احتياجاتهم مختلفة وثقافتهم مختلفة، وفهمهم لحقوقهم مختلف؟ إيه الحرية دي؟ نوصّلها إزاي؟ نرسم حدودها إزاي؟ ونرسم حدودها من غير ما نظلم حد عشان ماتتعارضش الحرية مع العدل إزاي؟ ونعمل مساواة في الحرية إزاي؟ وآلاف الأسئلة من نفس النوع ده، «فلسفة». الفلسفة محاولة للمعرفة الحقيقية، المعرفة اللي بتتعدى القشرة ويتسعى للوصول إلى قلب الأشياء، لو قررت ماتبقاش فيلسوف عمرك ما بتوصل للقلب.

محاولة المعرفة الحقيقية هي المكوّن الأصلي للإنسان الفيلسوف «مش حبّص عال حاجات من برة كده وخلاص، مش حاخذ أي حاجة زي ما يبشربها لي المجتمع وخلاص، مش حشترني الإجابات الجاهزة المعلّبة اللي بيشرّ منها اليقين والموجودة بوفرة عند أغلب سكان الكوكب وخلاص؛ حدوّر على إجاباتي بنفسي، حتّى لو مش أنا اللي طلعت بالإجابة ولقيتها عند غيري، برضه أنا اللي حدوّر بنفسي».

بتبدأ الفلسفة عند التساؤل في محاولة للوصول لحقيقة الأشياء ومالهش نهاية، مافيش حدود للفلسفة. كل ما كان تفكير الفيلسوف أعمق، كل ما بقى «ممكّن» يوصل لمناطق أبعد. كل ما زادت

الأسئلة وتنوعت وتطوّرت مع الزمن، كل ما بقت الممكنات أكثر، وكل ما زادت قدرة الفيلسوف على فهم الحياة كلها بشكل أحسن. الفلسفة شغلتها إنها تدي صاحبها «perspective» منظور، يخليه يشوف كل حاجة في مكانها المناسب، بحجمها المناسب.

الفلسف هو العكس الصريح لأنك تبقى عايز تلاقى إجابة لسؤال عشان تخلص؛ مابتخلصش. بعد ما يعرف الفيلسوف أي حاجة لسه بيتساءل: هو اللي أنا عارفه ده مكتمل ولّا لا؟ أعرف ازاي؟ أنا أكّد ازاي؟ طب أتأكد تاني ازاي؟ طب هو أصلاً فيه أي حاجة أكيدة ولّا لا؟ زي إيه؟ طب الحاجات الأكيدة ممكن تتغير ولّا الأكيد مابتغيرش؟ طب لو الأكيد بيتغير، قبل بقه ما يتغير ينفع نسميه أكيد ولّا لا؟ طب نعرف ازاي الفرق بين الأكيد واللي مش أكيد؟ وهكذا، عمره مابقف.

عشان كده الفلسفة كمان بتتطلب أمانة، أمانة مع النفس قبل الناس؛ الفيلسوف اللي بجد مابيضحكش على نفسه، ومابيعديش حاجة ويعمل نفسه مش شايفها، ومابيعملش نفسه عارف وهو مش عارف، ومابيعملش نفسه وصل وهو ماوصلش، الفيلسوف اللي يُضبط متلبّساً بأيّ مما سبق فيلسوف مضروب، إنسان ناقصه أهم ما يقدر عليه، إنه يبقى فيلسوف.

رجال القانون بيتكلموا دايمًا عن العدل، العدل شغلتهم، بيتمتهنوا العدل؛ لكن لما محامي أو قاضي يفكر مثلاً هو العدل ده

مطلق ولا نسبي؟ إيه علاقة العدل بالمصلحة العامة؟ لو الجماعة ممكن تظلم الفرد عشان مصلحة الأغلبية ده عدل ولا مش عدل؟ إلخ إلخ، في اللحظة دي الشخص ده «الفيلسوف ده» مايقاش رجل قانون وخلاص، بل بيبدأ يدور ويفكر في فلسفة القانون، فلسفة العدل. الدكتور بيعالج الناس، لكن لما دكتور يبدأ مثلا يفكر في أخلاقية إنه يجرب على عيان دوا جديد هو مش متأكد حيشغل معاه ولا لا، لو فكر في أخلاقية موضوع زي تأجير الأرحام أو الاستنساخ أو هكذا، مثلا يعني، يبقى الدكتور ده بدأ يفكر في فلسفة الطب، وهكذا. لكل مجال ولكل مهنة في الدنيا فلسفة، واللي بيحاولوا استكشاف الفلسفة دي وفهمها، هم في الغالب أحسن من يمارس تلك المهنة، لأنه مش يشتغل الشغلانة من برة كده وخلاص لأ يفكر فيها، في تأثيرها، بيدخل جواها، فتدخل هي كمان جواه. ولما تفكروا في الكلام ده كويس حتلاقوه بينطبق على كل الناس، من أول الفراش والنجار والميكانيكي للمطرب للسياسي للإعلامي للكاتب لرجل الدين لكل الناس؛ كل ما تعدت قشرة مهنتك وحاولت توصل لقلبها، حتعملها مش زي أي حد تاني. ولو وسعنا الدائرة دي جدا نبدأ نفكر في إن للحياة كلها أيضًا فلسفة، واللي بيستكشفوا الفلسفة دي ويفكروا فيها عشان يحاولوا يقالهم فلسفة في حياتهم، بيعيشوا حياة أحسن وأرقى وأكثر قيمة وأحسن في نوعها بكثير من غيرهم، لأنها بتبقى بتاعتهم هم، هم

اللي حطوا قواعدها، همّ اللي سألوا وهمّ اللي دوروا على إجابات؛
«همّ اللي لَوّنوا حياتهم بألوان من اختيارهم».

الفلسفة مش شغلتها تجاوب على الأسئلة المحيرة، بل أعمق
من كده بكثير، شغلتها تثير الأسئلة؛ عن طريقة تفكير النبي آدم، عن
طريقة تحليله للأمور؛ هي مش نشاط عبثي غرضه نفسه، الفلسفة
حاجة مختلفة جدا عن الفذلكة، الفلسفة مش غرضها الفلسفة بل
غرضها الفهم. بمساعدة الفلسفة يفهم النبي آدم إزاي يقترب من
مشاكله عشان يقدر يحلّها، إزاي يفكر أصلاً. إزاي يفرّق بين اليقين
والاعتقاد، بين الحقيقة والحقيقة اللي يعرفها، بين الصح واللي
جاي على مزاجه، بين ما هو أخلاقي وما هو مصلحجي، بين كل
الحاجات الكثير أوي اللي بسهولة بتبدو متشابهة دي. الفلسفة
بتوسع الخيال، بتزود إمكانيات العقل، وتعمل عمائل بقة في
الضمير كما لا تقدّر أي حاجة تانية.

ولو الفلسفة بتعمل كل ده يبقى لو انعدمت الفلسفة من المجتمع،
لو بقت الأفكار من غير أسئلة، من غير محاولة إجابة، من غير غطاء
فلسفي، قاعدة فلسفية مبنية عليها، من غير مبادئ فلسفية تحكّمها
وتوجّهها، النتيجة بتبقى حاجة كلكو تعرفوها كويس؛ مجتمع مليانة
سمّاه بأصوات مزعجة، كل واحد يقول اللي على مزاجه وخلاص،
مش مهم الصح من الغلط، مش مهم نفكر في تأثير كلامنا، مش
مهم نفكر يعني إيه اللي بنقوله؛ أنا عايز دولة إسلامية، الجيش هو
الوحيد اللي يعرف يمسك البلد دي، الإخوان لازم يتحرقوا كلهم،

ما فيش حاجة اسمها حقوق إنسان، فين أيام حسني مبارك، الشعب المصري حويط وعارف كل حاجة بس مدگن.. وكثير كثير من ده وغيره، كلام فارغ من المضمون والعقل «والفلسفة».

لما تختفي الفلسفة من المجتمع تتحول أفكار المجتمع ده لفوضى فكرية، أو حتى فوضى بس من غير فكرية ولا حاجة، الأفكار السليمة المفيدة مابتقدرش تعيش من غير فلسفة تحضنها وترعاها وتراقب تطورها بإنها تفضل دايمًا بتقيس أثرها وتأثيرها ونتائجها.

طريق الحكمة

كلمة فلسفة أصلاً مشتقة من اليونانية «فيلو سوفيا» حب الحكمة، مش الحكمة نفسها، حب الحكمة بس؛ فالحكمة غاية الكائن الفيلسوف، لكن للأسف مش معنى كده إن كل إنسان «فيلسوف بالفطرة» بيدور على الحكمة، ده غير يعني إن الحكمة مش سهلة المنال، مش كل اللي يحاول يوصلها يوصل. بس اللي يحاول، ييحقق مبدئياً نبوءة إنه ابن آدم، يبقى «فيلسوف».

طب لو البني آدم أصلاً فيلسوف بالفطرة، عايز الحكمة بالفطرة، إيه اللي بيحصل في الدنيا ده؟ الشر ده كله والظلم ده كله وانعدام الحكمة ده كله بييجوا منين؟! بييجوا من إنك تبعد عن طبيعتك: ربنا اذآك عقل عشان تسأل بيه وتجاوب، لما ماتستعملوش ببوظ، لما تستعمله في الحفظ بس ببوظ برضه (مش بس الحفظ في المدارس ها، كل الحفظ، كل الحاجات اللي بتأخذها من موروثك

الفلسفي ومن المجتمع حواليك زي ما هي كده من غير ما يقالك
دور انت خالص في الموضوع، حفظ برضه). ربنا اذآك ضمير
عشان تدور بيه عالصح، لما تحطه في الدولاب وتدور عالأسهل
والأصيح والأسرع بيبوظ، وهكذا، كل ما تبعد عن طبيعتك كل
ما حتبوظ. يبقى الأصل إنك فيلسوف، بس لو عايز تبوظ حتبوظ
عادي، ما حدش حيمسكك، وما فيش حاجة حتحميك.

الحكمة كمان هي الوجه الجميل للفلسفة لكن للفلسفة
أوجه قبيحة؛ ما النازية مثلا فلسفة؛ أنا (الجنس الآري) أحسن
من بقية الناس، عرقي أحسن، فيبقى المنطقي إن أنا اللي أحكم
بقية الناس، ما أنا أحسن منهم! اليهود بقة والغجر والسود دول
لسميهم «Untermenschen».

«Menschen» يعني ناس بالألماني، جمع إنسان، دول أقل من
الإنسان، نطلع قانون أن يُمنع الجواز منهم، ويعدين نقول لأمش
كفاية احنا نخلص منهم خالص، نقتلهم. وده مش عشاننا إحنا بس
على فكرة، ده لمصلحة البشرية! إننا نُبقي على الجنس الآري من
غير ما «يتوسخ» بقية الأجناس ده لمصلحة الكل، إننا ننصف
الأرض من الأجناس الحقيرة دي خدمة للبشرية. فلسفة كاملة أهه.
لكن فاكرين كلامنا عن المنطق الفاسد؟ راقب بقة كم الأخطاء اللي
وقع فيها كل شخص اعتنق «فلسفة» النازية أول ما صدق كلام مش
منطقي عن إنه «الجنس الأحسن»، كلام مش منطقي بنى فلسفة
مش منطقية أدت إلى جنون وحرب عالمية مات فيها ملايين البشر

واتدمر فيها جزء كبير من تراث العالم «المتقدم». وده مثال بس
طبعاً، الإخوة في داعش عندهم فلسفة برضه، وإيه، فلسفة بيدّعوا
ومقتنعين تماماً إنها إسلامية!

فيبقى أهم سؤال لازم أي فلسفة تجاوب عليه الأول وقبل كل
حاجة عشان تعرف تقيّمها، هو ليه؟ الغرض من وراها. عايز إيه؟
بتسأل ليه؟ عايز تعمل كذا أو كذا عشان غرضك توصل لإيه؟ العدل
والحق والخير والجمال، فيبقى غرضك «الحكمة»، ولأ أي حاجة
تانية فيبقى غرضك أي حاجة تانية؟

فمن غير غرض سليم تفسد الفلسفة، واتفقنا خلاص إن من
غير منطق سليم تفسد الفلسفة برضه، وماننشاش بالمرّة إن بعد
دول لزمًا وحتماً ولا بد الكائن الفيلسوف يبقى بيدور عالمعرفة
الحقيقية، لازم يبقى عايز يعرف حقيقة المسائل اللي يفكر فيها،
ماينفعش يبقى عايز يسد خانة بأي كلام يقدر يبّلعه لضميره، لازم
يبقى عايز الحقيقة بنفسها، لأنه عايز الحق نفسه، الخير نفسه، العدل
نفسه، الحكمة نفسها.

وبعد بقة ما تتحقق كل الشروط دي؛ سلامة المنطق والنية،
والإخلاص في الوصول للحقيقة، للحكمة، للصح (مش اللي
عالمزاج والهوى)، بقيت كده بتتكلم عن كائن إنسان فيلسوف.
حيوصل لفين الفيلسوف ده بقة من درجات الحكمة، ده موضوع
يرجع لرجاحة العقل، والقدرة على التعلّم والربط بين الأشياء،

والفروق الفردية المختلفة بين الناس «الفلاسفة». لكن من غير
دول ما فيش فيلسوف. فيه ناس بياكلوا ويشربوا ويقولوا ويعملوا
اللي بييجي على مزاجهم وخلاص، من غير فلسفة، وبالتالي من غير
أدنى فرصة للوصول لأكبر غايات ابن آدم؛ الحكمة.

الحكمة صفة تطلق على الفرد في الغالب، لكن كمان
المجتمعات على بعضها كده تقبل إنها توصف بالحكمة، أو إنها
توصف بالحماسة والجنون!

عن إن الناس معادن

قبل ما نوصل لأفلاطون^(١)، في السياق ده كان عنده تصوّر كده
أعتقد محتاجين نعدي عليه دلوقتي. «وهو بيتفلسف» قسّم أفلاطون
الناس لأربع أنواع، أربع معادن؛ الحديد هو كل اللي بييجري على
أكل عيشه عشان يعيش هو وعياله؛ البرونز هو اللي همّه مجموعة
من الناس هم قوم، قبيلته، عشيرته... إلخ وبتدور حوالهم حياته.
الفضة هو المهموم بكل المجتمع، بكل الوطن، بكل من فيه. والناس
الذهب هم المهمومين بكل الناس في كل الدنيا، بالبشرية كلها،
وفي دول بقة تدور عاليفيلسوف الحكيم، أندر الأنواع وأجودهم.

راجل «فيلسوف» مهموم دايمًا إن هو وعيلته وعياله يعيشوا
بشرف في سلام وسعادة ومشغول طول الوقت بإنه يلاقي طريقة

(١) الفيلسوف الإغريقي الشهير ٤٢٧ ق م - ٣٤٧ ق م.

يحقق بيها هدفه «الأخلاقي» ده؛ فيلسوف أهه وسليم النية بس نوعه
حديد؛ الفيلسوف المتفلسف اللي همّه جماعة من الناس بيتتميلها أيا
كان نوعها وشغله الشاغل إزاي هو وقومه يبقوا كويسين، فيلسوف
برونز؛ وفيه فيلسوف بيّفكر في مصلحة الوطن بكل من فيه، جماعةته
هم كل من يشاركه الأرض، فيلسوف فضة، لكن الفيلسوف الحكيم
الذهب هو اللي مايقدرش يُقصر اهتمامه على أي حد أو أي جماعة
بعينها سواء كانت جماعة صغيرة أو كبيرة، عيلة ولآمة، عايز العدل
والحق والخير «للكل»، بيّفكر في كيف تسعد البشرية كلها.

وزي ما الكائن الفيلسوف بييجي بموديلات مختلفة، تبعاً
لنوع الفيلسوف بتختلف نوع أسئلته الفلسفية عن غيره، التساؤل
الفلسفي أنواعه كثير كمان؛ فيه أسئلة فلسفية كل ثقافات الأرض
بل كل بني آدم سألها، أسئلة عن بداية الحياة، عن الله، عن علاقة
البنّي آدم بالإله، عن اللي بعد الموت، عن حرية إرادة ابن آدم، عن
علاقة الحرية دي بالتقدر، عن علاقة الأديان ببعض، عن العدل، عن
الصح، عن الحقوق، عن الواجبات، كثيرة كثيرة جدا هي الأسئلة
اللي بيسألها أو على الأقل بتخطر ببال جميع البشر على اختلافهم.
وجنب الأسئلة اللي بتعدّي على جميع الجميع دي، فيه أسئلة
فلسفية بيسألوها الناس على حسب اختلافهم عن بعض، وكل
واحد بيشفو علامات الاستفهام اللي شايلها غيره بطريقته، كما
هو (مش كما هي الأسئلة)؛ تقعد انت محتار في سؤال عشرات
السنين من عمرك وواحد غيرك يشوف إنه سؤال عبثي ما فيش فائدة

من وراه، ويشوف غيره إنه عميق، وغيره إنه مهم، «كل فيلسوف» يشوف زي ما هو عايز، والفيصل الأهم بينهم وبين بعض هو النية أولا وأثر أفكارهم ثانيا.

أسئلة فلسفية هي اللي استعملتها البشرية عشان تدور على العدل شخصيا، عشان تخلق العلوم وتطورها، عشان تخلق السياسة، عشان تبني بيها الأمم والدول والحضارات، عشان تنجح وتتقدم. وده أهم أسباب اهتمامي الشخصي بالفلسفة، إنها ما بُني على أكتافها حضارة النبي آدم شخصيا، وما دام بنيت الحضارة يبقى منطقي إنها تكون ضرورية عشان تبقى الحضارة.

بقالي سنين شايف إن حلول مشاكل مجتمعنا العضال عند الفلسفة، مش بمعنى إن الفلسفة عندها كتالوج أول ما تفتحه حتلاقي حلول لمشاكلك، بل بمعنى إن حلول المشاكل العويصة اللي ليها علاقة بنفسية الشعوب وتاريخها وتأثير الزمن عليها وعلاقتها بسياسة من يحكمها... إلخ إلخ، مش ممكن نلاقيها غير باستعمال الفلسفة، أو يمكن الكلمة الأدق هي باستعمال «الفكر الفلسفي»، الطريقة الفلسفية في النظر للأشياء. لما تكون عندك مشكلة بسيطة، من أول إنك نازل من البيت مثلا ومش لاقى المفتاح، دي مشكلة حلها إنك تفتكر حطيت المفتاح فين أو تدور عليه في كل مكان ينفع يبقى فيه، ولما بتلاقي المفتاح خلاص خلص الموضوع. لكن وانت بتفكر في معضلات الديمقراطية والعدل والحرية والانتماء للأوطان وتوزيع الثروات ما فيش حلول بسيطة، الحلول العادلة

كلها مستخبيّة في جيوب الفلسفة، وما فيش حاجة اسمها تدور
فأكيد حتلاقي ماتنساش، بس من غير ما تدور، من غير ما تدخل
حلزونة الفلسفة دي، تقيس وتحتار وتقارن وتفكر، حلول عميقة
عادلة بتعامل مع أي مشكلة من جذور الشجرة مش من أوراقها،
مش حتلاقي.

بقيت شايف إن أعظم مشاكلنا إننا ما عندناش مرجعية فلسفية؛
شغلتها إيه المرجعية الفلسفية دي؟ شغلتها إنها ترسم إطار يتحرك
فيه المجتمع، اتجاه؛ إحنا عايزين إيه؟ ناقصنا إيه؟ نجيبه منين؟
«نتحرك في أنهي اتجاه؟»، ونختار اتجاهنا ده بناء على إيه؟ إيه اللي
بيحكم اختيارنا؟ مبادئنا بتشكل ازاي؟ مكوناتها إيه؟

لما تكون عايز تجيب مجموع كبير في ثانوية عامة مثلا الهدف
ده ببيحكم تصرفاتك واختياراتك، ما ينفعش تقعد عالقهوة ست
ساعات في اليوم وانت عايز تجيب مجموع! لو عايز تنجح لازم
تذاكر؛ بتبقى المذاكرة والاستفادة من كل وقتك، وهكذا، هي
الفلسفة بتاعتك في السنة اللي انت عايز تجيب فيها مجموع دي،
وفلسفتك دي طبعا بتخليك تتصرف بطريقة معينة، بتخليك فيه
حاجات تعملها وحاجات ماتعملهاش، وهو بيت القصيد؛ عشان
تحقق أهدافك لازم يبقى عندك فلسفة.

إحنا بقه أول ما تبص علينا وانت ماشي في الشارع كده تكتشف
إن أغلب الفلسفات اللي بتحكمنا هي فلسفات مضرّة على أقل

لقد، ده إذا ما كانت مدمرة. فلسفات زي البقاء للأقوى أو الأضعف
أو الأكثر انحرافاً مثلاً! فلسفة الأنانية بتسيّد الشارع في مصر، عندنا
القانون اللي اخترعته البشرية عشان يخلق نظام ويحافظ عال حقوق
ويساوي بين الناس في الفرص ويؤدّي للنجاح وغيرها من الأغراض
العظيمة، تحوّل على أيدينا إلى الحاجة اللي بنحاول نلف حوايها
ونخدعها ونصرف فيها بأي طريقة عشان ماتعطلناش! من أول
الملايين اللي بيمشوا عكسي للملايين اللي بينوا عمارات مخالفة،
للملايين اللي بيرتشوا ويعملوك اللي انت عايزه، وهكذا كتير كتير
أمثلة. فلسفتنا حوّلت الالتواء إلى حداقة، والنصب إلى فهولة،
وخداع القانون والنظام إلى نصاحة، والتهرّب من المسؤولية إلى
مهارة تستحق التقدير والثناء. ولما تبقى دي الفلسفات اللي بتحكم
حياتنا تفتكروا حتبقى إيه النتيجة الطبيعية!؟

فيه شعوب فلسفتها مُقدّسة للعمل، للشغل، تلاقي كل الناس
لو حدّهم كده بيشغلوا زي النمل مع إن أكيد منهم ناس ما يحبّوش
الشغل ولا حاجة؛ فيه شعوب فلسفتها الانبساط، ناس ترقص
ناس تغني ناس تعمل مهرجان كل أسبوع في الشارع، فيه كتير؛
فيه شعوب فلسفتها إن العدل أولاً؛ فيه شعوب فلسفتها إن النجاح
أولاً، الاستمتاع بالحياة، الاستعداد للموت؛ فيه فلسفات كتير
لسكان الأرض، لكل شعب ولكل أمة فلسفة، وإنجاز الأمم دي
ومساهمتها في تاريخ الحضارة وفي تحقيق العدل ونشر السلام
والسعادة وغيرها من وسائل القياس الشبيهة، هو اللي بيقمّ فلسفة

الشعب ده أو غيره، بقياس أثرها عليه. فلسفة الشخص الواحد هي اللي بتحدد لونه، نوعه كشخص، وفلسفة الشعوب هي مجموع ألوان أفرادها، كل الألوان دي على بعض بتطلع إيه في الآخر؟ نتيجتها «الطبيعية» هي إيه؟

عن اللون الواحد

كلمة «مجموع ألوان أفرادها» دي خلّيتني أفكر في موضوع بيشتغل بال الأمة العربية كلّها من سنين طويلة لكن بالخصوص من بداية عصر الثورات العربية الأخيرة، موضوع محاولة «إخوانًا» اللي بيُسمّوا خطأً بالإسلاميين على اختلاف أنواعهم ينشروها في المجتمعات العربية، هي تبدو فلسفة تدين بس هي في نظري مش كده أبدا، هي فلسفة تدين؛ حاجة كده شبه إنك تبقى عايز تلون رسمة بس ما عندكش غير لون واحد فتلونها بيه وخلص، فتبقى كل حاجة بنفس اللون! فتتحول عملية التلوين اللي شغلته تنور الصورة وتوضحها وتحليلها وتبين ما فيها من تفاصيل وفروق بين الناس وبعض وتكامل بينهم، إلى عملية طمس للملامح وإخفاء للمختلف وإفقاد كل حاجة خصوصيتها المميزة لصالح اللون الواحد (اللي بالحتمية كثيب، لأنه أصلا ضد الطبيعة، الطبيعة بتقول إن الناس مختلفين، ألوانهم مختلفة). غرض فلسفة هؤلاء هو إن المجتمع ماتبقاش فلسفته هي مجموع ألوان الناس المكوّنين ليه بل يبقوا كل الناس لون واحد (من اختيارهم هم طبعًا، هم كلهم على

اختلافهم بيدعوا إن ده اختيار ربنا لكن هو اختيارهم، كل قبيلة منهم
بالمختار لون ما، شبه التانيين بشكل أو آخر آه، لكن كل واحد منهم
عنده لون واحد عايز يصبغ بيه الجميع، وبالعاوية كمان) «وده مش
إحنا اللي عايزين.. ده ربنا!»، كإن ربنا يعني محتاج مساعدة حد
عشان يعمل اللي هو عايزه! وكأنه عينهم وكلاء، وكان الناس ربنا
ماخلقه مش بألوان مختلفة لأن بالألوان المختلفة تستقيم الحياة.

تأمل لونك أرجوك، فكر «انت» لونك إيه، وفكر في مساهمة
لونك ده في وسط ألوان الحياة ببسبب إيه. وماتخليش أي كائن كان
بلونك بلونه أيا كان اللون.

إن العالم بيدور بس على اللي يقدر يشبهه بالتجربة أو الملاحظة، لكن مافيش تجربة نقدر نعرف بيها هل الوقت كان له بداية وآلاً، مافيش تجربة نقدر نفهم بيها الحقوق، مافيش تجربة نفهم بيها الجمال، العدل، اليقين... إلخ إلخ. وهنا بيبدأ شغل الفلسفة، في محاولة إعمال العقل والمنطق فيما لا يمكن إثباته بالعلم. وده هو مصدر المقولة الشهيرة «الفلسفة تبدأ حيث انتهى العلم».

الأول العلوم بتبدأ من عندها، كل علوم الأرض بدأت بسؤال فلسفي، وفي محاولة الإجابة يمشي العلم لوحده لحد ما يوصل لمكان ما يقدرش يعديه، فتبدأ الفلسفة تاني من المكان اللي وصله العلم بالتجربة والملاحظة وخلص مش قادر يتخطاه ده، يرجع تاني يحتاج الفلسفة عشان تفتحله أبواب جديدة، تسأل أسئلة جديدة يحاول يجاوبها، وينطلق تاني، وهكذا العلم في كل خطوة من خطواته محدود باللي نعرفه، لكن الفلسفة عندها القدرة إنها تبقى ماشية كام خطوة قدام عشان تقود الطريق.

بشوف إن العلوم لما كانت بتمسك نفسها كده ويشتد عودها ويقالها منهج وقواعد وأصول كانت مساحة التفلسف فيها بتقل؛ وكان أي علم وهو طفل بيعتمد عالفسفة ما يقدرش يمشي من غيرها ولما يكبر شوية ويتعلم الكلام والمشى يبدأ يستقل بنفسه ويبعد. تخيلوا الإنسان من آلاف سنين ما كانش عنده أي معلومات عن الكون، الكون بالنسباليه كان الشمس والقمر والنجوم والأرض، الحاجات اللي هو شايفها، بس لما كان يبص في السما

كده ماكانش بيبقى عارف إيه ده، فطبيعته الفضولية الفلسفية تضطرّه
 إنه يسأل ويفكر ويحاول يوصل لتصور، عايز يفهم. وبعد ما سأل
 نفسه كتير عن كل حاجة وبدأ يعرف بقه، بقى فيه علم فلك مثلا،
 مايقاش خلاص بيبص لفوق وهو مش فاهم حاجة، بدأ يعرف إيه
 ده ويذاكره فقلّت تساؤلاته الفلسفية وحلّ مكانها متطلّبات العلم
 نفسه. المتخصص المهتم بالحكاية دي عدّى مرحلة إنه مش
 فاهم حاجة إلى إنه بيراقب حركة النجوم وتشكيلاتها وبينشغل
 بإنه يحاول يعمل تليسكوب يشوف بيه أحسن وهكذا، فيبقى عالم
 فلك. بعد ما كان بيتساءل ليه المطر بينزل، ولية الفيضان بيحصل،
 فهم المطر والفيضان فبدأ يتعلّم إمتى يزرع ويزرع إيه ويحصده إزاي
 وهكذا فطلع علم الزراعة وبدأ يتطوّر من ساعتها لحد النهارده.
 وهكذا وهكذا بقه في كل علوم الأرض؛ تولدها الفلسفة الأم، تكبر
 وتستقل، يقالها فلسفتها الخاصة، ولما تكبر خالص بقه وتفتكر
 نفسها عارفة كل حاجة تبطل تتفلسف. وبرضه زي في كل الحالات،
 أول ما تبطل تتفلسف يبدأ الجمود رويدا رويدا يتسرّب إليها. وتبدأ
 تقع في أخطاء «فلسفية»، يبدأ العلم نفسه يرتكب حماقات تضر
 المجتمعات أو البيئّة أو المستقبل، لما يخسر البوصلة، الضمير؛
 أيوا هي الفلسفة ضمير العلوم، بل هي ضمير البشرية.

لما تتأمل تاريخ الفلسفة في الدنيا تلاقي بسهولة ارتباط قوي
 بين طبيعة المجتمعات وحاجتها للتفلسف؛ في أغلب عمر البشرية
 الطويل، النبي آدم كان بيمتهن الأول الرعي والصيد والزراعة، فأول

سمة للمجتمعات دي كان إن الناس عندهم وقت يفكروا ويسألوا ويحتاروا، بيثه خصبة جدا للفلسفة. العامل الثاني المهم اللي برضه بيحدد مدى احتياج الناس للفلسفة في حياتهم هو قد إيه هم بيتحكّموا في ظروف حياتهم دي؛ بمعنى إن مجتمع زراعي بيستنى المطر أو بيعسب حسابات الفيضان (اللي هي حاجات خارجة عن نطاق سيطرته)، حاجته للتساؤل والفهم والتفلسف كانت مختلفة عن مجتمع نشاطه قائم على الرعي مثلا، وحاجة المجتمعين دول للتفلسف كانت مختلفة عن حاجة مجتمع نشاطه الاقتصادي قائم على الصيد، أو السفر بالبحر في رحلات طويلة (بما يستتبع ده بقة من الحكايات الغريبة اللي كانوا بيرجعوا يحكوها عن ناس وحضارات مختلفين عنهم وهكذا). لكن في كل الأحوال، اعتقادي إن كل ما كان النبي آدم متحكّم أكثر في مصادر رزقه وتفاصيل حياته كل ما كانت حاجته للتفلسف أقل. بان ده بوضوح أكبر في مراحل لاحقة من تاريخ البشرية في عصر النهضة وبعدين الثورة الصناعية وبعدين العصر الحديث. قبل ما البشرية تخطي خطوة كبيرة في أي اتجاه، لازم قبل الخطوة يحصل تغيير في الفكر، في الفلسفة، وتبقى الخطوة اللي حصلت نتيجة للفلسفة اللي اتغيرت، وبعدين يحصل الركود لحد ما الميزان يتعوج، ترجع الحاجة لفلسفة جديدة، تطلع الفلسفة الجديدة يبدأ العالم يتحرك بناء عليها وهكذا.

لما الثورة الصناعية قامت كمثال مهم أعتقد للموضوع اللي بتكلم فيه ده، بدأت البشرية تتحكّم أكثر في مكوّنات حياتها؛ بقى

فيه مصنع بورديات، بمواعيد، بأرقام محددة، بقى الإنسان عارف
 بلقدر ينتج قد إيه، ومحتاج إيه بالظبط عشان يزود الإنتاج... إلخ
 إلخ، سيطرة كاملة أهه، سيطرة خلّت حاجته للتفلسف تبدأ تقل.
 أو في الحقيقة إحساسه وإدراكه لحاجته للتفلسف هو اللي بدأ يقل،
 لإنه لسه فيه كتير أوي محتاج يتفلسف فيها. لسه عايز يعرف يوزع
 مكاسب الصناعة دي ازاي، عايز يعرف إيه حقوق العمال اللي
 بيشتغلوا دول، عايز عدالة اجتماعية وفي نفس الوقت عايز ينجح
 وينطلق، لسه الكائن الفيلسوف عنده مليون حاجة محتاج يفكر
 فيها. بس الفرد العامل العادي اللي بيشكل الأغلبية العظمى من
 المجتمع الصناعي ده خلاص بقى بيروح المصنع الساعة كذا وينتج
 كذا قطعة في اليوم ويمشي الساعة كذا ويروح ينام وياخد يوم أجازة
 في الأسبوع يتغدى فيه مع العيال وخلاص، حاجته للتفلسف قلت.
 لما تتأمل العالم النهارده تكتشف علطول إن لسه الاحتياج
 موجود ويمكن أكثر من أول التاريخ! بعد الثورة الصناعية بوقت
 تافه في عمر الزمان وبعد ما جاوب الإنسان شوية من الأسئلة
 اللي ذكرناها حالا دي، اكتشف النبي آدم علطول إنه بدأ يخلص
 عالغابات، التلوّث اللي بتسببه المصانع وإنتاج الطاقة بدأ يغير في
 مناخ الكوكب، بقوا الفقراء بالمليارات، والعاطلين عن العمل
 بمئات الملايين^(١)، وفيه مشاكل كتير جدا بتواجه عدالة توزيع

(١) منظمة العمل الدولية قالت إن في ٢٠١٣ العالم كان فيه ٢٠٢ مليون عاطل في العالم.

الثروة والموارد. فيه جهل وفقر وتطرّف وقتل جماعي في حروب مجنونة، فيه أسلحة نووية تهدد الكوكب كلّه بالخطر، التعليم الجمعي بعد ما كان ضرورة في وقت ما تحوّل إلى كارثة في أغلب الكوكب، كل دي مسائل فلسفية؛ العلوم المتخصصة في كل حاجة من دول، هم اللي عندهم القدرة على ابتكار وسائل للإصلاح والتطوير وحل المشاكل، لكن التساؤل الفلسفي هو اللي أصلا يبشّر الاهتمام بالمشاكل دي، هو اللي بيشاور عليها ويحذّر منها. والمنهج الفلسفي في التفكير هو اللي بينبّه العالم إن المشاكل دي محتاجة تتحل، وهو اللي بيرسم المسارات اللي حتمشي فيها الحلول، بنفس الطريقة اللي كان بيرسم بيها مسارات تتحرّك فيها العلوم في بداياتها. ده طبعا لو العالم اهتم بإنه يلاقي الحلول العادلة الأخلاقية اللي بتصون الحقوق وبتحافظ على الإنسان ونوعه وثقافته وبيئته اللي عايش فيها، مش الحلول اللي بتكتسب أي حد فلوس أكثر! بس للأسف الاحتياج لفلسفة جديدة بيتولد دايمًا بعد ما أي مشكلة تكون كبرت، المشاكل العُضال هي اللي بتفرض على البني آدم الحاجة للتفلسف فيها. شوف البشرية كلّها قعدت قد إيه من تاريخها لحد ما «الفلسفة» اكتشفت إنه ماينفعش يبقى فيه عبيد، شوف دمرنا قد إيه من كوكب الأرض وقد إيه كائنات انقرضت بسببنا... إلخ إلخ، قبل ما فلسفة العالم وهو بيتتج ويكبر بدأت تتغير للمحافظة على البيئة، مثلا يعني.

يبدو لي كمان أن التضاد كواحد من أهم محرّكات الدنيا اللي مخلوقة من خير وشر، شجاعة وجبن، رحمة وقسوة، حب

وكراهية... إلخ إلخ برضه من مسببات احتياج ابن آدم للتفلسف. كل ما يزيد التضاد كل ما تزيد الحاجة للتفلسف، عشان بالفلسفة بس يقدر يوصل النبي آدم إنه يحقق توازن ثاني بين الحاجات اللي «عكس بعض اللي بتسبب مشاكل دي. كل ما يزيد الظلم كل ما يفكر النبي آدم «الفيلسوف» في العدل، كل ما زاد الجهل كل ما زادت الحاجة إلى إيجاد طرق للقضاء عليه، كل ما يزيد الفقر جنب الغنى كل ما تزيد حاجة النبي آدم انه يفكر ازاى يعدل الميزان المعوج ده، وعدلة الميزان - كل ميزان - شغلة الفلسفة.

الفلسفة هي الحجر اللي بنى عليه النبي آدم كل إنجازة الحضاري من أول خلقه، وكل ما بعدت البشرية عن الفلسفة والتفلسف كل ما حتمشي بالعرض أو ترجع لورا مش حتمشي لقدام، ومن المعروف يعني إن دايمًا فيه قدام عشان دايمًا فيه أحسن، وشغلة الفلسفة الأصلية الأصيلة بقة هي إنها تدور عالاحسن. فلسفة الشعوب هي اللي بتحدد اتجاهاتها، هي اللي بتحدد الشعب ده حيحل مشاكله ولآ؛ حيثحرك في اتجاه تحقيق العدل والنجاح ولآ؛ حيبقى مجتمع بيُعلي قيم الحق والخير والجمال ولآ حيبقى مجتمع بيُعلي قيم أبجني تجدني، واحييني النهارده وموتني بكره، وهي جت عليًا انا يعني؟! والحاجات الظريفة دي اللي كلكو عارفينها كويس.

تفلسفوا تصحّوا...

ما هو روحاني في أصله وفصله بالعقل! فيقعوا في حفرة منطقية عملاقة جدا).

المعضلة الثانية الأكبر لأنها في رأي صاحبة التأثير الأكبر على العلاقة بين الفلسفة والدين تاريخيا؛ هي إن الفكر الفلسفي نظريا عايز دائما يتحرر من كل القيود، والمؤسسات الدينية من الناحية الثانية على اختلافها مابتجش فكرة الحرية من كل القيود دي، وخصوصا لما ترتبط المؤسسة الدينية بسلطة الحكم (زي ما حصل في معظم تاريخ الأرض). وعدم الحب ده بيحصل بدرجات متفاوتة طبعا؛ ممكن السلطة اللي متجاوزة المؤسسة الدينية دي تخالف حرية الفكر بس، ممكن تعاديها، ممكن تقمعها، ممكن تقتلها، على حسب الظروف.

وبعدين في سيناريو شبيه للي بيحصل مع العلوم كده، مسألة البحث عن إله أصلا فكرة فلسفية، الدين ييجي يشملها بإنه يقدم إجاباته الخاصة عن الإله، بلغة القوم اللي نزل عليهم الدين، بما يليق على طريقة تفكيرهم وثقافتهم، بما يليق على ما يعرفون عموما. (لو نزل القرآن على قوم عايشين في فرنسا ماكانتش حتبقى صورة الجنة اللي حير سمها القرآن ﴿مَثَلُ الْجَنَّةِ الَّتِي وُعدَ الْمُتَّقُونَ﴾^(١))

(١) ﴿مَثَلُ الْجَنَّةِ الَّتِي وُعدَ الْمُتَّقُونَ فِيهَا أَنْهَارٌ مِنْ مَاءٍ غَيْرِ آسِنٍ وَأَنْهَارٌ مِنْ لَبَنٍ لَمْ يَتَغَيَّرَ طَعْمُهُ وَأَنْهَارٌ مِنْ حَمْرٍ لَذَّةٍ لِلشَّارِبِينَ وَأَنْهَارٌ مِنْ عَسَلٍ مُصَفًّى وَلَهُمْ فِيهَا مِنْ كُلِّ الثَّمَرَاتِ وَمَعْقِرَةٌ مِنْ رَبِّهِمْ كَمَنْ هُوَ خَالِدٌ فِي النَّارِ وَسُقُوا مَاءً حَمِيمًا فَقَطَّعَ أَمْعَاءَهُمْ﴾ (محمد: ١٥)

إن فيها فاكهة وأنهار لبن وعسل لأن الحاجات دي متوقرة في الدنيا بتاعتهم أصلاً! مثلاً يعني). فييجي الدين كفكرة فلسفية يقدم إجاباته الخاصة على الأسئلة، وكل واحد يُعرض عليه الدين يناقشه فلسفياً برضه مع نفسه، لحد ما يرتضيه فيعتنقه ويتبعه ويمشي بقة مع الناس. وزى ما حصل مع العلوم بعد ما كل دين كانت تستب له الأمور على الأرض والناس ماشية بقة في إطاره بقوة الدفع، يمر الزمن وتبدأ تظهر أسئلة جديدة ماكانتش موجودة قبل كده، محتاجة إجابات ماكانتش موجودة قبل كده، فيبدأ تاني يبقى عنده احتياج للتفلسف، للفهم الجديد في ضوء المتغيرات الجديدة اللي ماكانتش موجودة قبل كده وهو الدين بيتولد. وطبعاً ساعتها يبقى التفلسف ده تحت مظلة الدين (زي بالظبط فلسفة كل علم على حدة بعد ما كان يطلع من كنف الفلسفة الأم للتساؤل وهو بيكبر)؛ ولما الاحتياج ده لا يُلبى، لما يتجاهل، يحصل إيه؟ يبدأ نفس الجمود يتسرّب إلى فكرة الدين رويدا رويدا لحد ما تُرتكب باسم الدين أخطاء فلسفية أخلاقية وجودية، نفس السيناريو المتكرر كثير!

فيه فلسفة لكل دين، بل فلسفات كتير كمان على حسب اختلاف معتنقي الدين ده عن بعض؛ اختلافهم يسبب اختلاف في طريقة تفكيرهم، واختلاف طريقة تفكيرهم يسبب اختلاف في فلسفاتهم، في طريقة فهمهم للدين كله من أول العقيدة لحد كل التفاصيل؛ فلسفة الكاثوليك غير فلسفة البروتستانت غير فلسفة الأرثوذكس، فلسفة الأشاعرة غير فلسفة المعتزلة غير فلسفة الصوفية غير فلسفة السلفية اللي هم أصلاً أصلاً فلسفتهم إنهم يعادوا الفلسفة!

والتفلسف ويرفضوهم، بمنطق امشي جنب الحيط عشان
ماتغلطش، فيرتكبوا وهم بيعملوا كده أكبر غلطة ممكنة!

فيه واحد فيلسوف متحرر تماما من أي قيد ديني على أفكاره،
فيُطلق لخياله العنان ويطلع نظريات فلسفية مش محكومة إطلاقا
بكل ما هو ديني، وييجي فيلسوف تاني من تحت مظلة الفكر الديني
ويبدأ يتفلسف في الكون والدنيا والاجتماع وأحوال البشر بس من
خلال إيمانه العقائدي؛ هو خلاص صدق الدين وآمن بيه فتبقى دي
نقطة انطلاقه. تخيلوا صاروخين طالعين للفضاء واحد منهم طالع
من الأرض والتاني طالع من القمر، نقطة انطلاق مختلفة، بتغير في
المعطيات وفي المطلوب إثباته وفي نوع الأسئلة المطروحة لكن
في الحالتين فيه فضاء عظيم ممكن استكشافه.

يعني مثلا ممكن واحد فيلسوف (مش اشتراكي خالص طبعا 😊)
يفكر في أخلاقية ضرائب إعادة توزيع الثروة (نوع الضرائب اللي
بيتأخذ من الأغنيا عشان يتصرف تحديدا على خدمات للفقراء)
ويفكر هل الضرائب دي فيها اعتداء على الملكية الفردية بما إن
الدولة في الحالة دي بتفرض ضرائب كتير على الأغنيا «غصب
عنهم» عشان تلبي احتياجات الفقرا؟ مع إتهم مش مسئولين عنهم،
مش هم اللي خلّوهم فقرا! وبعدين هم تعبوا في الفلوس اللي عملوها
دي، جابوها بمجهودهم، يشاركو الفقرا فيما يملكو اليه؟ وهكذا
أسئلة؛ لو الفيلسوف ده راجل ملحد أو مؤمن برينا بس مش مصدق
الأديان ييفكر في الموضوع ده من منطلق عقلي أخلاقي بحت، بس
هو لسه عنده معطيات برضه؛ معطيات التاريخ وتجارب الدول وأثر

الفقر على المجتمعات وقدرات الحكومات على محاربة الفقر،
 عنده الظروف التي حوّلت الغني إلى غني وأبقت عالفقير فقير،
 عنده معطيات كثير جدا والأهم إن عنده «عقل ومنطق» يستعملهم
 في التفكير. الفيلسوف الثاني المسلم، اللي بادئ من نقطة انطلاق
 إنّه مصدّق الإسلام ومؤمن بيه، يعني مصدّق القرآن ومؤمن إنه من
 عند الله، وبالتالي مصدّق إن الزكاة فرض على المسلمين؛ وهو
 يفكر في المسألة دي بيقى من ضمن معطياته أن الله فرض زكاة
 على المسلمين، ده بالنسبale حصل خلاص مش مطلوب إثباته؛
 ويشوف بقه هي نسبة الزكاة دي كام! عشان تفرق كثير جدا هي
 الزكاة المفروضة دي ٤٠٪ ولآ ٢٠٪ ولا اتنين ونص ٪. وبعدين
 من ضمن معطياته كمان، هي الزكاة المفروضة في الإسلام دي،
 مفروضة على المسلم عشان يقى أدى ما عليه «باختياره» ويتحمّل
 تبعات إنه لا يؤدّي ما عليه «باختياره»؟ ولآ مفروضة دي يعني اللي
 ما يدفعش الزكاة الدولة تحبسه زي ما بيحصل في الضرائب؟ لكن
 الضرائب يفرضها القانون، والزكاة يفرضها الدين؛ الزكاة للفقراء
 بس لكن الضرائب عشان الدولة تقدر تفضل ماشية؛ الضرائب
 واجب تجاه الدولة والزكاة عبادة يُقصد بيها وجه الله. إيه العلاقة
 بينهم؟ وإيه الفروق بينهم؟ وينفع يقوا حاجة واحدة ولآ لا وهكذا
 أسئلة برضه. أسئلة مختلفة عن الأسئلة اللي بي طرحها الفيلسوف
 اللي بيدور عالأخلاقية والصح في موضوع الضرائب من غير تأثر
 بمعطيات الدين. نفهم من المثال ده إن الفيلسوف الغير مؤمن
 بدين، عنده صحيح حرية أكبر في الحركة لأنه ما عندوش معتقد

بيحدد إطار لأفكاره (نظريا بس طبعاً لأن عملياً دي حاجة صعب
جدا إثباتها إذا ما كانتش مستحيلة، إنك تكون فعلاً حر تماماً
وانت بتفكر؛ من كل ما هو مجتمعي، نفسي، تاريخي، قيود كثير
جدا بتفرض على تفكيرات النبي آدم حتى لو ماخدش باله منها)،
لكن الفيلسوف المؤمن بالله ثم الفيلسوف المؤمن بدين ما مهمته
أصعب لأن عنده مواءمات بيعملها جوّه دماغه بين حرية فكره وبين
قناعته العقائدية الدينية. لكن في كل الأحوال ما دام فيلسوف لازم
حقيقى عنده أسئلة، أسئلة بقه الدين طرف فيها مش طرف فيها، ربنا
نفسه طرف فيها ولّا مش طرف فيها، الحياة محيرة لكل فيلسوف
محب للحكمة والحق والعدل والصح أخلاقياً وبيدور عليهم.

العلاقة المهمة دي بين ما هو رباني / ديني وما هو فلسفي، هو
إن الفلسفة أصلاً زي ما قلنا مبنية على التساؤل والتفكير، فأيا كان
الشخص المتفلسف، فهو عنده قناعة دينية وعنده تصوّر عن الله،
حتى لو كان مش مؤمن بوجود الله، هو لسه عنده تصوّر عن خلق
الدنيا، لو مش مؤمن بالأديان لسه عنده تصوّر عن مصدرها، وما دام
عنده «تصوّر» أو حتى بيحاول يوصل لتصوّر، يبقى يبسأل، وما دام
يبسأل يبقى بيتفلسف.

الفلسفة طريق لليقين، طريق مش مصطبة، يفضل صاحبه ماشي
فيه مايقفش أبداً، فيه يقين تاني من غير طريق، يقعد فيه صاحبه
ويستقر كده ويبقى مش حاسس إن فيه حاجة هو محتاج يتساءل
عنها أو يفكر فيها، هو حر طبعاً لكن ده تحديداً عكس الفلسفة.
الفلسفة حركة دائمة مايقفش أبداً في اتجاه اليقين والحكمة. واللي

لشوفوه مستقر كده وقاعد فوق مصطبة يقينه ويّدعي إنه فيلسوف
ماصدّقوه هوش أبدا، ده فيلسوف مضروب، مؤمن بقه مش مؤمن
هو مضروب في كل الأحوال.

في كل الأحوال مؤمن كان الفيلسوف أو لا، معتنق لدين أو لا،
متّجه للفضاء الفلسفي الفسيح من كوكب الأرض أو من القمر،
مانسوش إن لازم المسألة الفلسفية، الفكرة الفلسفية، تعتمد وتقوم
وتُبنى على المنطق، على المجهود العقلي؛ حتى وهو الفيلسوف
بيفكر في المعتقد الإلهي الديني. الفلسفة بتقيس المسافة اللي ممكن
يمشيها المنطق والعقل لوحدهم، من غير الاعتماد على غيرهم.

ما ذكر عن إن العقيدة الإيمانية الدينية بترسم إطار للفكر الفلسفي
يتحرّك فيه، صحيح بيبدو إنه بيعمل قيود على الفكر الفلسفي آه
بس مهم جدا نلاحظ كمان إن الأديان كان ليها تأثير عظيم على
الفكر الفلسفي؛ الأديان طرحت أسئلة فلسفية ماكانتش موجودة
من غيرها، ماكانش فيه احتياج ليها. لو بني آدم «فيلسوف» مش
مؤمن بالله ولا الجنة ولا النار، خلاص مايفكرش في الموضوع
ده، بالنسبale الحياة بتنتهي بالموت وخلاص خلصنا، عنده مليون
حاجة يفكر فيها لو عايز بس دي مش منهم. النبي آدم الفيلسوف
المؤمن بالله والجنة والنار على سبيل المثال الثاني، يبسأل بقه طب
هو معنى إن الإسلام آخر أديان السماء، «آخر تجلّية من دين السماء
الواحد» إن اللي مش مسلم حير وروح النار؟ طب واللي مش مسلم
بس مبادئي وصالح وأخلاقي بل ومؤمن بالله كمان يروح النار ليه؟
عشان ماصدّقش الإسلام؟ طب ما هو صدق المسيحية أو اليهودية!
إيه ذنبه إنه ماصدّقش وهو التصديق ده أصلا فعل لا إرادي؟! عشان

مادورس؟ ومين قال إنه يقدر يدور؟ طب بلاش، يعني منطقي إن ربنا يعذب راهب هندوسي قعد طول عمره يتعبد للخالق عشان ماييسميهوش «الله»؟ دي أسئلة فلسفية أهه وغيرها فيه آلاف، فيما يتعلق بالجبر والاختيار، بالعدل الإلهي، بالحساب بعد الموت... إلخ إلخ، كل دي أسئلة الأديان هي اللي دفعت «المؤمنين» إنهم يسألوها. الأديان هي اللي خلقتها.

استفادت الفلسفة كمان من الأديان في تطوير المنهج الفلسفي والأدوات الفلسفية في الجدل والتحليل والمنطقة؛ لو كانوا كل الناس مؤمنين بالفطرة (وأغلب سكان الكوكب مؤمنين بالله فعلا لكن مش كلهم طبعاً) ماكانش بقى فيه احتياج لفكرة المناظرة بين عقيدة إيمانية وعقيدة مش إيمانية؛ وباتباع نفس الفكرة لو كل سكان الأرض مؤمنين بالفطرة بدين واحد ماكانتش فلسفة البشرية استفادت كل الاستفادة العظيمة دي اللي اكتسبتها وهي الأديان بتناظر وتناقش وتوازن بين معتقداتها. وطبعاً المقصود هنا هو المناظرة الفلسفية الحقيقية اللي بتسأل أسئلة وبتدور على إجابات وعقول المشتركين فيها مفتوحة للتعلم، مش النصب اللي بيحصل كتير على التلفزيونات وهو بيحاول يتنكر في صورة مناظرة عقلية فلسفية.

الفلسفة مش شرط تؤدي بصاحبها إلى الله، لكن من غير فلسفة مايفش وصول إلى الله.

أعتقد مهم كمان في السياق ده نذكر أن الله نفسه منفصل عن مفهوم الله عند الثقافات المختلفة عبر تاريخ البشرية كله؛ الله هو الله، لكن الله في أذهان البشر هو فكرة فلسفية! كل واحد أيا كان الدين اللي بيؤمن بيه عنده مفهوم عن الله، هو اللي عامله، عقله اللي أنتجه باستعمال مكونات الثقافة اللي طلع في الدنيا لقاها. لكن المنطق يفرض علينا الاعتراف بأن المفهوم ده عن الإله مش شرط خالص يبقى صحيح. والدليل الأكبر هو اختلاف مفهوم الإنسان عن الله بين شخص وشخص حتى لو الاتنين مؤمنين بنفس الدين و اتعلموه بنفس الطريقة من نفس الشيخ أو في نفس الكنيسة أو المعبد، بس اختلاف طبائعهم وشخصياتهم وتعليمهم وطريقة تفكيرهم وبيئاتهم وطريقة فهمهم للدين عن بعض، كل ده بيخلق مفهوم مختلف عن الله في أذهانهم، مفهوم فلسفي بيحاول يفهم ما لا يمكن إدراكه بالحواس. البشر لم يروا الله رؤيا العين، بل وإن الأغلبية الساحقة الماحقة من المؤمنين بالأديان حتى لم يقابلوا الرسل الذين جاءوا بالدين الذي يؤمنون به؛ فأصلا بالنسبة لكل بني آدم فكرة الإله خالق الكون هي فكرة فلسفية، كل تصوّرات كل البشر عن الله على اختلافاتها الكبيرة عن بعض هي تصوّرات فلسفية.

القدماء في كل الحضارات تصوّروا آلهة عديدة كل واحد فيهم مسئول عن جزء من الحياة، فيه تصوّروا إن الحاكم تجليّة من تجليات الإله، فيه ثقافات تصوّرت آلهة عديدة هي برضه تجليات من تجليات إله واحد، فيه ثقافات تصوّرت إن كل الكون هو الله،

إن الكون مش منفصل عن خالقه، فيه من دول ثقافات آمنت بالحياة بعد الموت، فيه ثقافات آمنت أن الحياة أزلية وبعد الموت يحصل «reincarnation»، يحصل لكل حي إعادة بعث في صورة تانية؛ الثالث المقدّس عند المسيحية فكرة فلسفية، تصوّر عن الإله، يختلف في فهمها المسيحيين أنفسهم فيما بينهم لحد النهارده، وللأبد؛ كل دي وغيرها كثير تصوّرات فلسفية حاول بيها النبي آدم يحل «لغز الإله» لو جاز التعبير، لكن الواضح أن الله الخالق أراد أن يكون لغزا غامضا على العقل البشري أصلا، حتى عند من يتصوّر أنّه يعرف الله كما هو، هو ما يعرفش في الحقيقة، مستحيل يعرف لأن الله مُطلق وهو محدود، المحدود مستحيل يُدرك المطلق إدراك كامل يليق بيه؛ هو (زي كل الناس) عنده تصوّر بس عن الله لكن صدق التصوّر ده زيادة عن اللزوم فحوّله لحقيقة في راسه (لأنه بعد عن فطرته وطبيعته الفلسفية).

إبراهيم الخليل أول الأنبياء عنده مكانة عظيمة بيشير لها القرآن في مواضع كثير، سمّاه القرآن لفظا «أول المسلمين» وحكى نفس القرآن ازاى سيدنا إبراهيم وجد الله بالتفلسف^(١)؛ «الآلهة اللي انتو بتعبدها دي أصنام لا تضر ولا تنفع، الله أكيد في السما، طب يكون الكوكب ده؟ لا ده بييجي ويروح. طب يكون القمر؟ بينور

(١) ﴿وَإِذْ قَالَ إِبْرَاهِيمُ رَبِّ أَرِنِي كَيْفَ تُحْيِي الْمَوْتَىٰ قَالَ أُولَٰئِمُتَّؤْمِنٌ قَالَ بَلَىٰ وَلَٰكِن لِّيَطْمَئِنَّ قُلُوبُكَ قَالَ فَعَدَّدْنَا الْمَاءَ مِنْ الْأَيْدِي فَصَرَّهِنَّ إِلَيْكَ لِمَ أَجْمَعُ لَعَلَّ كُلَّ جَبَلٍ مِّنْهُنَّ جُزْءٌ أَدْعُهُنَّ يَا إِبْرَاهِيمُ لَبُدَّ عَيْنُكَ سَعِيًّا وَعَلَّمْنَا أَنَّ اللَّهَ عَزِيزٌ حَكِيمٌ﴾. (البقرة: ٢٦٠)

في السماء المظلمة. لأده شكله يتغيّر كل يوم ويختفي كل شهر. «طب تبقى الشمس؟ أكبر ونورها أكثر، أكيد هي الله! لأدي بتغرب كل يوم، مش معقول الله يغرب»؛ لحد ما لقي الله بالتفكّر والتدبّر والتفلسف؛ فضل يسأل بإصرار ويطلب جواب بصدق وإخلاص نية لحد ما ربنا نفسه في علاه جاوبه. وحتى بعد ما لقي سيدنا إبراهيم الله فضل فيلسوف لازم يقتنع، لازم يصدّق بعقله كمان؛ فسأل الله أن يريه كيف يحيي الموتى، ولم يغضب الله من سؤاله ولا حاجة ﴿قَالَ أَوْلَمْ تُؤْمِنُوا قَالَ بَلَىٰ وَلَٰكِن لِّيُظْمِنَنَّ قَلْبِي﴾، قصة قرآنية أهه بتعظّم من شأن التفلسف والتفكّر والتدبّر والسؤال والبحث عن إجابة «بالعقل» أكبر نعم الله على النبي آدم (وأكبر نعماته كمان!).

الأديان أصلا أصلا أفكار فلسفية، كل دين فكرة فلسفية، الأديان اللي صنعها البشر طبعا صنعها فلاسفة، والأديان (اللي أنا مصدّق أنها أرسلت من السماء) أرسلت على فلاسفة، الفلسفة هي جسد أي دين، ما فيش دين من غير فلسفة، ما يقدرش الدين يعيش من غير جسد «فلسفي». حتى لو اتشوّهت فلسفة الدين في عقل بعض المؤمنين بيه أو حتى أكثرهم، يفضل برضه الدين عبارة عن فلسفة، حتى لو تم استبدال الفلسفة الأصلية للدين بأخرى مزيفة على حسب الفهم والثقافة والنية يفضل الدين فلسفة.

الفلسفة الدينية الربانية في إطار عام كده ممكن نقول إن هدفها تفهم الله وتفهم علاقته بخلقه وعلاقته بالنبي آدم فتلاقي الطريق «الصح» - من وجهة نظر صاحبه طبعا - للإله الخالق. ولأن طبائع

الأديان مختلفة، فالطريقة، الفلسفة اللي يحاول يوصل بيها كل شخص لله من خلال دينه، بتختلف حسب معطيات الدين اللي مؤمن بيه، بعد طبعا الاختلاف بسبب عقله هو نفسه وشخصيته وظروفه. مهم جدا نفهم إن شغلة الفلاسفة اللي بيعتقوا أي دين الأول وقبل أي حاجة تانية إنهم يلاقوا فلسفة الدين ده، يفهموها، مش «يسمعوا» الدين.. يفهموه! وبعدين يستخرجوا الفلسفة دي منه عشان يبسطوها ويبينوها للناس، لإننا عارفين إن دي مسألة صعبة على أغلب البشر فعشان كده ده الدور الأصلي لرجل الدين، الدور الأهم وقد يكون الدور الوحيد المهم. لأن من غير ما فلاسفة الدين يطلعوا روح أي دين ويبسطوها للناس عشان يستوعبوها، يبقوا معتقلي الدين ده «كمثل الحمار يحمل أسفارا»، ناس بيرددوا شوية كلام ويعملوا شوية طقوس بس مش متبھين لمغزى إيمانهم ولا الغرض من وراه ولا أثره عليهم ولا على ما حولهم.

لو تأملت المتطرفين من أصحاب أي دين بتلاقي دائما حاجة مُربكة؛ دائما يبقى فيه حاجة غلط، يعني المنطقي إن لو الأديان سُغتتها ترقى بروحك وتقربك من الله وتبعد الدنيا عن قلبك، يبقى المتطرف بقه، الغاطس في الدين ده يبقى عنده كثير من الحاجات دي؛ هادي، زاهد، مايبخافش، مايتعصبش، مسلم أموره إلى من خلقه، وهكذا؛ لكن ماتلاقيش كده عند المتطرف دنيا أبدا، بتلاقي دائما حاجات مش لايقة أصلا على كونه شخص يعرف ربنا من بابه، مش يعرفه «زيادة عن اللزوم!». ويزيد الأمر تعقيدا إن مش بس

كده لأ، ده كل متطرف دينيا في الدنيا لازم بالضرورة يبقى متأكد
تماما إنه بيملك الحق والحقيقة لوحده هو ومن معه (اللي هو ينفع
جدا يبقى تعريف التطرف أصلا). بيحتكر الدين لنفسه، بيحتكر
الله نفسه، وعشان يحصل كده لازم المتطرف ده يبقى مش باصص
خالص على فلسفة الدين اللي هو نفسه مصدق إنه جاي من عند
الله الرحمن الحنون الودود الجميل المحب لكل من خلق وإلا ليه
يديهم الحياة من روحه هو نفسه؟! (ده بالمناسبة وعلى سبيل المثال
برضه، سؤال فلسفي).

مصدّقها ويحاول يثبتها بقره، مش اعتمادا على العواطف والنفسيات⁴
 والخزعبلات بل اعتمادا على الأدلة «العقلية»، مش الأدلة العلمية
 خلّوا بالكو، فيه فرق كبير؛ شغلة العالم لو عايز انه يلاقي أدلة علمية
 تُضيف عقلانية إلى مسألة فهم الدين. (زي اللي كتير دوّروا عليها
 ولقوها في القرآن مثلا، مع التحفّظ على كتير من المحاولات دي
 اللي هي ولا علمية ولا فلسفية ولا عقلية ولا أي حاجة ليها قيمة)،
 لكن المتكلم شغلته يقدم أدلة عقلية منطقية على اللي هو مصدّقه
 من العقيدة، هو يستعمل الأدلة العلمية دي وغيرها ويحطّها في
 سياق عقلي منطقي، ويطرح أسئلة تخصّها ويحاول يقدم تصوّرات
 عن الإجابة بما يقدر عليه، لكن هو أصلا بتاع عقل ومنطق مش
 بتاع علوم، هو فيلسوف. فلو فيلسوف غير مؤمن شكك في وجود
 الله أو في إن الإسلام هو آخر تجلّيات دين الله أو أو، اللي شغلته
 يتصدّى لتساؤلات أو تشكيكات الفيلسوف الغير مؤمن ده هو
 المتكلم (الفيلسوف المسلم). ولما حد متسائل من خارج الدين
 أو من داخل الدين يسأل أسئلة «فلسفية» تخص الدين، شغلة نفس
 المتكلم الفيلسوف ده إنه يحاول يرد بالحجّة العقلية المنطقية، مش
 شغلة أي واحد لا يملك من المنطق ولا العقل شيء ويعمل نفسه
 حجّة الإسلام وكده لمجرد إنه بيطلع في التلفزيون ولا بس عمّة، إنه
 يبقى أزهرى مش كفاية خالص على فكرة ولا حتى إنه يبقى معاه
 ٣ دكتوراه في حفظ الكتب القديمة! لازم يبقى فيلسوف!

يكفي حد عشان يبقى رجل دين إنه يحفظ ما جاء في الكتب،
يبقى كأنه مرجع، بدل ما انت تقرا كتب الحديث والفقه والسيرة...
إلخ، هو يقرأها ويذاكرها ولما تسأله عن حاجة «موجودة فيها»
يقولك، لكن الفيلسوف الإسلامي لأنه أصلاً فيلسوف، لازم يتبع
منهج «فلسفي» في البحث والتفكير والتحليل أولاً، ولازم النتائج
اللي يوصلها تبقى طبعاً نتائج عقلية منطقية برضه ثانياً، ولازم ثالثاً
الردود اللي بيردّها والإجابات اللي بيقدّمها تبقى ردود عقلية منطقية
لإنّها طالعة من رحم فلسفي، طالعة من فيلسوف.

بعد المتكلمين الأوائل دول، جه فلاسفة مسلمين في المقابل،
الكندي والفارابي وابن سينا وابن رشد، ماكانوش زي المتكلمين
بيبدءوا من معتقدتهم الديني ويحاولوا يثبتوه بأدلة عقلية، كانوا
بيبدءوا من شغل الفلاسفة الإغريق اللي نقلوا شغلهم للمسلمين،
ويردّوا عليه بالعقل والمنطق برضه طبعاً لكن من وجهة نظر إسلامية.
لما ابن رشد جه يعرّف الفلسفة وهو بيحاول يغيّر وجهة نظر
الناس للفلسفة الإغريقية «الوثنية» اللي كانوا بيشفوها على إنّها
شر مستطير ممكن يدمر إيمانهم ويقضي على دينهم، راح معرفها
التعريف الآتي، قال: «الفلسفة تهدف إلى معرفة الصانع عن طريق
النظر في المصنوعات» وده الحقيقة تعريف مش صحيح من وجهة
نظري مع تقديري الكامل لابن رشد، ده مش تعريف للفلسفة قد
ما هو تعريف لعلم الكلام، أو هو تعريف للفلسفة الإسلامية؛
الفلسفة في حد ذات نفسها كده ما بتهدفش للوصول لله ولا حاجة،

الفلسفة هدفها الوصول وبس، لأي مكان بشرط واحد إنها توصله
 باستعمال السؤال والعقل والمنطق ونفي بشروط الفلسفة. علم
 الكلام أو الفلسفة الإسلامية هي اللي شغلتها أن تصل لله، برضه
 باستعمال التساؤل والعقل والمنطق. علما بأن التعريف ده نفسه فيه
 خلاف عليه، هي الفلسفة الإسلامية ومن قبلها علم الكلام شغلتهم
 أن يصلوا لله؟ ولأ شغلتهم يتصدّوا للمشككين في وجود الله أو في
 أن الإسلام دين حق؟ ولأ هم مجرد فلاسفة زيهم زي غيرهم بس
 يفتكروا في المسائل كلّها بالمعطيات اللي خدوها من الإسلام؟
 أنا شخصيا الخلافات دي لا تعينني ومش مهم أصلا في رأيي إن
 كل الناس يتفقوا على تعريف علم الكلام وشغلته والفرق بينه وبين
 تعريف الفلسفة الإسلامية، مش مهم الأسامي، ده ما هو إلا إلقاء
 ضوء على العلاقة بين الفلسفة والأديان وبس عشان نفهم ازاي
 مافيش ركن مهم من أركان الحياة إلا والفلسفة جزء أصلي أصيل
 منه، من غيرها يختل ميزانه.

الفيلسوف الإسلامي هو عالم الدين اللي شغلته يحط الأساس
 اللي بيتبني فوقه المنظومة الدينية في مجتمعه، هو اللي شغلته يحدّد
 ما هو المعلوم من الدين بالضرورة القاطعة الحتمية، وهو اللي شغلته
 يطلع أحكام فقهية اللي بيستعمل فيها القياس العقلي (لإن القياس
 العقلي ده أداة فلسفية فلازم يستعملها متفلسف فيلسوف) فالمتفتي
 مثلا للناس بإيه حرام وإيه حلال ده لا يكفيه أبدا إنه يبقى «عالم
 دين» بل لازم يبقى فيلسوف إسلامي. عالم الدين اللي ذكرناه، هو

اللي مذاكر العلوم الإسلامية المختلفة حسب تخصصه ويُسأل في القرآن قال إيه هنا؟ يقول القرآن قال كذا. فيه حديث يخص المسألة دي؟ آه فيه، أهه. ده حديث إيه مدى قوته من ضعفه؟ أهه. قالوا إيه القدمات في المسألة؟ قالوا كذا؛ ويخلص دوره عند كده، ولا ينطق بكلمة من عنده، لا بيت في شئون الدين برأيه إلا فيلسوف عنده قدرة على القياس والتحليل وربط المواضيع ببعض ورؤية الصورة الكبيرة واستخلاص فلسفة الدين وفهمها واستيعابها.

في رأيي جريمة أن يقترب من تفسير القرآن إلا فيلسوف، القرآن العميق الواسع ده ماينفعش «يحاول» يفهمه إلا فيلسوف متسائل مفكّر، حتى لو ماكانش عالم دين بالتصنيف، لو متمكّن من أدواته الفلسفية ومن اللغة وعنده أدوات بحث ومنهج «فلسفي» فليفضل، حتى لو غلط، ما يغلط! ما كل العلماء والفقهاء والأئمة غلطوا! الفيلسوف بحق عمره ما بيدعي امتلاك الحقيقة، ده دور السفهاء والجهلاء وأنصاف المتعلّمين اللي مايبقاش ليهم مكان غير للأسف لما ينتشر الجهل والخيبة. لو التزم علماء الدين بالأدوار دي وبقي لا يفسّر القرآن إلا فيلسوف إسلامي، ولا يصدر أحكام إلا فيلسوف إسلامي، ولا يتكلّم عن «الدولة الإسلامية» المزعومة من قبل سياسيين منتفعين إلا فيلسوف إسلامي، حتتحل مشاكل كثير جدا تخص المشهد العبثي اللي بيتدخل فيه في شئون الناس والسياسة والدولة من لا يعرفون ولا سياسة ولا دين ولا العلاقة بينهم (ولا طبعا يعرفوا فلسفة!).

حصل كثير على مر تاريخ الدولة الإسلامية أن الناس (أغلب العلماء وتبعهم العامة) خافوا من الفكر الفلسفي لأنه في تصورهم يهدد إيمان الشخص المتفلسف (بالرغم من أن الله أصلاً فكرة فلسفية بالنسبة للبني آدم وكذلك الدين كله زي ما اعتقد إننا اتفقنا) وعلمنا كمان بأن: لو خفنا من الفلسفة على إيمان الناس أو عقيدتهم لأنها هشة لدرجة إنه لو سمع بس سؤالين ومالقاش إجابة تريحه، أو لقى إجابة عكس اللي هو مصدقه أو أو، إيمانه حينها تماماً، يبقى هل ده إيمان حقيقي ولآ لا؟ هل له قيمة فعلاً ولآ لا؟ هل لازم نعيد النظر في طريقة بناء هذا الإيمان وتلك العقيدة عشان نغيرها مع الأجيال الجديدة ولآ لا؟ (دي كمان أسئلة فلسفية بالمناسبة لا يمكن يطرحتها من يُسمّى رجل دين عشان لابس قفطان، لا يطرحتها إلا فيلسوف).

تكملةً للخط الطويل اللي مشيناه ده مهم نذكر أن الفيلسوف ممكن جدا يصل بالتفلسف إلى الله لكن ده مش شرط، الفلسفة ما عندهاش شرط. أما الفلسفة الإسلامية فعندها شرط (زي الفلسفة اللي طالعة من عبادة أي دين)؛ أن يبقى البحث العقلي المنطقي الفلسفي بتاعهم لا يخالف أو يعارض ما هو «معلوم من الدين بالضرورة»؛ مع التأكيد على ما ذكرنا من إن أصلاً إيه هو اللي معلوم من الدين بالضرورة ده مبحث فلسفي؛ يعني على سبيل المثال التافه، عند الوهابيين فرض الحجاب على المرأة بالعافية معلوم من الدين بالضرورة، وعند طالبان فرض تربية الدقن على

الرجالة بالعافية معلوم من الدين بالضرورة برضه، هم يعتقدوا كده. فشغلة الفلاسفة الإسلاميين (يعني رجال الدين اللي عندهم قدرة على استعمال العقل والمنطق والتحليل عشان يوصلوا لإجابات للأسئلة المُشكّلية)، هو بدايةً تحديد ما هو المعلوم من الدين بالضرورة. برضه ممكن يغلطوا طبعاً زي ما غلطوا كثير عبر التاريخ، لكن ماتنساش إن مساحة الغلط بتقل جداً لو اللي بيعمل العملية دي فيلسوف، لأن الفلسفة بتستعمل المنطق كأهم أدواتها ولما تستعمل المنطق يعني الحساب الغلط وارد لإنك إنسان بس عنده فرصة أقل بكثير إنه يحصل.

فالفارق بين الفيلاسوف والفيلاسوف الإسلامي إن الثاني عنده شرط بيحكم تفكيره الفلسفي وهو ألا يخالف ما هو معلوم من الدين بالضرورة الحتمية القاطعة اللي مافيش فيها قولان، أما الفيلاسوف فماعدوش الشرط ده (إلا إذا اختار إنه يحطّه لنفسه). ومن الكلام اللي فات ده ممكن بعد ما شفنا إن كل بني آدم فيلسوف بالفطرة (إلا إذا اختار مايتفلسفش)، يبقى كل بني آدم مؤمن، هو فيلسوف مؤمن بالفطرة (إلا إذا اختار مايتفلسفش).

جدير بالذكر هنا أن لفظة «المعلوم من الدين بالضرورة» دي، هي سبب معاداة الفلسفة الإسلامية دلوقتي وشبه اختفاءها من على الساحة العلمية العربية (لامؤاخذه يعني الساحة العلمية العربية). لما تحوّلت نسبة مرعبة من «علماء الدين» كما يسمّونهم إلى حَفَظَة، كل شغلتهم يسمّعوها ما جاء في كتب الأقدمين؛ ولا تساؤل

ولا سؤال ولا فكر ولا منطق ولا فلسفة ولا حاجة؛ من يُسمون علماء دين (مع احترام من يستحق هذا اللقب منهم وإن كانوا في نظري أقل القليل) بقوا زي كل مستفيد من «الوضع القائم» عايزين يدفنوا الفلسفة الإسلامية عشان ماتغيرش حاجة في المنظومة اللي همّ دلوقتي مرتاحين فيها جدا؛ بلا فلسفة بلا بتاع؛ هو الإسلام بتاعنا احنا واحنا عارفين كل حاجة والقدماء نقلوا عن الرسول والصحابة واحنا نقلنا عنهم وخلاص كده الموضوع خلص. حتى تفسيرات القرآن المعجز العميق الواسع وقفت من زمان، خلاص شطبوا، عشان فهموا كل حاجة! وتحول القرآن على أيديهم إلى صندوق أدوات أو أسلحة في الحقيقة بيطلعوا منه اللي محتاجينه عشان يُفحموا معارضيههم وبس؛ يقولك ربع آية من هنا على نص آية من هناك، وخلاص برضه، فالتنتيجة المنطقية الوحيدة تبقى زي ما انتو شايفين حوا اليكوا!

كنت كتبت مقالة عن مثال واضح جدا للاستعمال السيء ده للقرآن، النصب على المسلمين باستعمال كتابهم المقدس نفسه وإيه من قبل من يظنهم الناس علماء الإسلام! شايف إن ده موقع مناسب لمشاركتها عسى الصورة تكتمل.

«أنا شخصيا (وانتو كمان) من وانا طفل، آلاف المرّات سمعت فيها رجل دين بيذكر من القرآن ﴿فَسَلُّواْ أَهْلَ الذِّكْرِ إِن كُنتُمْ لَا تَعْلَمُونَ﴾؛ مين أهل الذكر؟ هو طبعا، هو وبقية رجال الدين هم أهل الذكر، هم يقولوا كده، بيدعوا كده! أي واحد أزهرى هو

أهل الذكر، أي واحد لا بس جبة وقفطان في التلفزيون هو أهل الذكر. وبقية الناس طبعاً مقارنةً بيه «لا يعلمون» فيبقى هو اللي يعلم وبالضرورة يبقى هو اللي من حقه يتكلّم في أي حاجة تخص الإسلام، وكلامه لا يُصد ولا يُرد. حتى لو كان ذلك الرجل كل إنجازاه في الدنيا إنه حافظ بعض القرآن وبعض الحديث وقرا بعض أمهات الكتب ومطوّل دقنه ويطلع في التلفزيون ليبدأ كلامه بالصلاة والسلام على رسول الله!

طيب تعالوا نذاكر بقة المِثال ده كويس؛ أولاً وبادئاً ذي بدء الكلمة دي اللي بيستعملها «رجال الدين» عشان يفهموا الناس بيها أن الإسلام ملكهم الخاص، ده جزء من كلام، جزء من آية في القرآن. بتقول إيه الآية؟ ﴿وَمَا أَرْسَلْنَا مِنْ قَبْلِكَ إِلَّا رِجَالًا نُوْحِيَ إِلَيْهِمْ فَتَشَأُوا أَهْلَ الذِّكْرِ إِنْ كُنْتُمْ لَا تَعْلَمُونَ﴾^(١) طب ده سياق يخص من نسميهم رجال الدين من قريب أو بعيد؟ لأ. طيب بلاش احنا نقول خالص، خلينا ندور يمكن المفسرين قالولهم كده ولّا حاجة؛ نلاقى إن حتى ابن كثير مثلاً كبير المقام عند السلفية بالرغم من أن المجهود العقلي في تفسيره أندر من نادر واعتمد معظم شغله على جمع الروايات والتفسير من خلالها؛ كتب ابن كثير في تفسير الآية لفظاً: «أي: اسألوا أهل العلم من الأمم كاليهود والنصارى وسائر

(١) النحل: ٤٣ (وانكررت نفس الآية بتغيير لغوي بسيط وفي سياق متطابق في سورة الأنبياء الآية ٧)، ﴿وَمَا أَرْسَلْنَا قَبْلَكَ إِلَّا رِجَالًا نُوْحِيَ إِلَيْهِمْ فَتَشَأُوا أَهْلَ الذِّكْرِ إِنْ كُنْتُمْ لَا تَعْلَمُونَ﴾.

الطوائف، هل كان الرسل الذين أتوهم بشرا أو ملائكة؟ إنما كانوا بشرا، وذلك من تمام نعم الله على خلقه؛ إذ بعث فيهم رسلا منهم يتمكنون من تناول البلاغ منهم والأخذ عنهم». منطقي كلام ابن كثير، متماشي مع نص الآية.

أحد المفسرين، الشيخ السعدي مثلاً قصر المعنى على أهل التوراة والإنجيل من غير «سائر الطوائف»، وقال: «فستلوا أهل الذكر» من الكتب السالفة، كأهل التوراة والإنجيل يخبرونكم بما عندهم من العلم، وأنهم كلهم بشر من جنس المرسل إليهم». كلام مختلف شوية لكن بنفس المعنى ومنطقي برضه ومتماشي أكثر كمان مع نص الآية وسياقها (حيث إن اليهودية والمسيحية بس هم اللي عندهم رسل لیسألوا عنهم، مافيش معنى لموضوع سائر الطوائف اللي ذكره ابن كثير).

دوّرت كمان شوية لقيت روايتين؛ القرطبي قال: «أهل الذكر هم أهل العلم»، «العلماء» (مع إن ده مالوش أي علاقة بنص الآية ولا سياقها!)، لكن القرطبي قال، يبقى كل الناس اللي عايزين يحتكروا الإسلام دول خدوا رخصتهم من القرطبي؟!!

الرواية الثانية لمفسر آخر، ابن زيد: «أراد بالذكر القرآن؛ أي فاسألوا المؤمنين العالمين من أهل القرآن»؛ وقال جابر الجعفي: «لما نزلت هذه الآية قال علي رضي الله عنه: «نحن أهل الذكر»».

بالرغم من أن الروايات دي بعيدة عن نص الآية وسياقها! لكن الرواية اللي حكاها ابن زيد قالت إن سيدنا علي قال: «نحن أهل

الذكر»، فيبقى خلاص الشيخ اللي في التلفزيون وفي الزاوية هو أهل الذكر هو كمان، هو من قصد الرسول عليه السلام لما قال «نحن» إن كان قالها أصلاً!

بالله عليكم بقه، اللي انتو قريتهو ده يخلي كل رجال الدين بالآلاف المؤلفة يقولو لكو إن هم نفسهم أهل الذكر اللي قصدهم الله في آية سورة الأنبياء؟ ده حتى يا أخي موقع دار الإفتاء المصرية على الإنترنت مكتوب عليه فوق كده ﴿فَسَلُّوا أَهْلَ الذِّكْرِ﴾ ده بقه اسمه إيه بالظبط؟ يعني ده استعمال آية قرآن بما يخالف نصها وسياقها ومعناها الواضح، وكم ان مجهود أغلب المفسرين لخدمة أغراض شخصية وآلا؟ أنت الحكم، أنت قول.

ده مش موضوعنا خالص على فكرة، ده كان مثال توضيحي بس، عشان نشوف بيحصل إيه لما يُستهان بالفكر المنهجي الفلسفي في مسائل الدين وازاي ده يفسرّغ المواضيع من مضامينها وبيغير فيها بل بيشوّهها تماماً!

أنا شخصياً شايف إن حل أزمة التشويه اللي لحق بالخطاب الديني، أو بصريح العبارة بالدين نفسه بالرغم من إنني عارف إن دي كلمة مزعجة لأغلب الناس بس أنا شايف إنها وصف دقيق جداً للي حصل، لأن الدين مش منفصل عن المؤمنين بيه، لو غير الناس الدين حيتغير على أيديهم، لو شوّهوه حيتشوّه على أيديهم. ولو أهل العلم الحقيقيين ما أنقدوش الدين من الجهل وضيق الأفق والاستغلال حيتفسد الدين في قلوب العباد وبالتالي يبقى فسد! أهم

الطرق لإنقاذ الدين من التشويه ده، هو إحياء الفلسفة الإسلامية، إحياء الفكر الفلسفي في المسائل الدينية تاني، عشان نقدر باستعماله نوقف التزيف اللي بتسببه الأفكار المتأسلمة (من ارتفاع نسب الملحدين وتاركي الدين، للتطرف الديني، لأصحاب الدين الشكلي المظهري الخالي من المعنى والمضمون «والفلسفة»). لو أعاد المسلمون إحياء الفلسفة الإسلامية بروح العصر ده والدنيا الجديدة دي اللي كل حاجة فيها اتغيرت عن ذلك العصر القديم اللي نقلوا منه كل حاجة كما هي، حال الدول الإسلامية حيتقلب تماما، كل حياتهم حتتغير، لما فلسفتهم تتغير.

المؤمن المحب لدينه اللي يبشوف فيه طريقة لإصلاح حياة الناس وإسعادهم لازم يفهم إن الوسيلة لتحقيق ده هي إعادة العقل والروح لدين أصبح جامدا متصلبا بيعاند المجتمع وبيعاند عقارب الساعة وبيسبب المشاكل والمعضلات اللي احنا عايشين فيها دلوقتي وغيرها كثير، ومش احنا بس، عايش فيها كل المجتمعات اللي عندها تيارات سياسية «بيسموها» إسلامية!

وحتى اللي خايف من سطوة رجال الدين (أو الأسوأ المدعين أنهم رجال دين) أو السياسيين اللي يقولوا إن عندهم مرجعية إسلامية! برضه لهؤلاء أقول: الدين مش حيتخفي من سياسة أو طان المسلمين. وعلاج أزمة سلامك انت كمان في المجتمعات دي، حتى لو انت مش مسلم أصلا أو مش مؤمن أساسا هو برضه إحياء الفلسفة الإسلامية تاني، عشان هي الوحيدة اللي ممكن فعلا توصل

بالمجتمع المليء بالفتنة والأحقاد والكراهية والعداء والتنافس المشين على السلطة والرغبة الجامحة في السطو على الدولة وعلى حريات الناس... إلخ إلخ، إلى حالة سلام يقدر يعيش فيها الجميع بتراضي. الفلسفة هي الأداة الوحيدة اللي تقدر تستنبط من الإسلام روحه وعقله وتعلمهم للناس فترتقي أرواحهم وعقولهم فيبقى الدين حقق مراده من إصلاح الناس، مش يحصل العكس ويتشوّه الدين على أيدي الناس اللي جه «يهديهم».

وأخيرا الفايذة دي من إحياء الفلسفة الإسلامية بإعلاء قيم التساؤل والتحليل والجدل والتفكير العقلي المنطقي، مش حيسفيد منها الدين ولا المتدينين بس بل المجتمع كله حيسفيد، لأن (زي ما أعتقد إننا متفقين) المجتمع كله محتاج كل الحاجات دي عشان يقف عليها فيشوف أبعد بكثير من موطن أقدامنا اللي بقينا باصين عليه وبس بقالنا مئات سنين. ولو بدأت الثورة الفكرية الفلسفية الإسلامية دي كل المجتمعات المسلمة حيبدا شكلها يتغير، لما طريقة تفكيرها ووجهات نظرها للأمر تتغير، بمساعدة الحركة الفكرية الدينية شخصيا؛ كما يتطلب التاريخ، وكما يلح علينا العقل والمنطق، وكما أعتقد يرجو منا الدين نفسه!

ما فيش دين للفلسفة بس الدين لا يستقيم من غير فلسفة؛ برضه تفلسفوا، تصحّوا.

البداية

قصة الفلسفة كما نعرفها بتبدأ من عند الإغريق، مش عشان ماكانش فيه قبلهم فلسفة، أبدا الفلسفة عمرها من عمر البشرية، وقبل الإغريق قامت حضارات عظيمة في أركان الأرض؛ عند قدماء المصريين، بلاد الرافدين، أمريكا الجنوبية، الصين القديمة وغيرهم، وما فيش حضارة من غير فلسفة؛ لكن الحضارة الإغريقية قفزت قفزة مذهلة بالإنجاز البشري الحضاري في الأدب والفنون طبعاً زي كل الحضارات ما عملت، لكن الأهم بكتير في «الفكر». الحضارة الإغريقية غيرت فكر البشرية عن كل ما كان قبلها، قدمت طريقة تفكير جديدة، طريقة نظر للأشياء جديدة، «فلسفة» جديدة.

الفلسفة الإغريقية بتنقسم لقسمين أساسيين، قبل سقراط وبعد سقراط. لسه سقراط عليه شوية خلينا في اللي قبله. أوائل الفلاسفة الإغريق كان عندهم إنجازين مهمين جداً قدموهم لحضارة البشر؛ أولاً إنهم كانوا أول ناس ذكر التاريخ إنهم بيحاولوا يفهموا العالم

والدنيا اعتماداً على التحليل المنطقي والمجهود العقلي من غير ما يبقوا يحاولوا يرضوا ولا اللي بيؤمنوا بيه من الدين ولا المؤسسة الدينية، ولا الحاكم، ولا العادات والتقاليد (يعني الناس). ده في حد ذاته كان حاجة جديدة جدا على تاريخ حضارة الأرض، وواحد من أهم الأعمدة اللي اتبنى عليها العالم كما نعرفه: «الفكر الفلسفي الحر من كل القيود». والإنجاز الثاني العظيم كان أنهم أول من بدأ يعلم الناس أنهم يفكروا بنفسهم همّ كمان، إنهم يلاقوا منطقهم الخاص. أساتذة الفلسفة الإغريق ماكانوش ولا بيطلبوا، ولا بيتوقعوا من تلامذتهم إنهم يفكروا زيهم، كانوا أول أساتذة في التاريخ المكتوب مايقاش عندهم أفكار بيعلموها لتلامذتهم عشان يحفظوها زي ما هي، بل كانوا يحاولوا يخلّوا اللي بيتعلموا منهم، يتعلموا ازاي يفكروا، ومنتج التفكير كان بيترك لكل واحد يكون زي ما يكون، حسب طبيعته وقدراته ونوعه.

الإنجازين دول كانوا مرتبطين جدا ببعض، وكانوا لازم يحصلوا مع بعض؛ ماكانش ينفع الفكر يتحرر وتفضل طريقة التدريس زي ما هي بتناقض التحرر ده. ولما حصلوا الاتنين مع بعض فعلاً، تسببوا في نهضة عظيمة حصلت للمعرفة والفهم، استفادت منها طبعا كل العلوم في مراحل لاحقة.

الوقت اللي احنا بنتكلم فيه ده هو القرن السادس قبل الميلاد، وأول فيلسوف عُرف اسمه من الحقبة دي كان الإغريقي «تاليس» (Thales).. في أواخر القرن ده، حوالي ٥٨٠ قبل

الميلاد^(١). تاليس كان مهندس ويمكن ده كان من أسباب إن السؤال اللي سيطر على تفكيره وبدأ بيه رحلته في الاستكشاف كان «هو العالم معمول من إيه؟». أفكاره وصلت بيه إلى إنه اعتقد إن كل ما في العالم معمول في الأصل من مكّون واحد، المية؛ لقي المية ممكن تتجمّد تبقى زي الحجر، ممكن تتبخّر تبقى زي الهوا، المطر بينزل فالأرض تطلع زرع، كل كائن حي لازم يشرب مية؛ فقال يبقى المية هي المكوّن الأساسي لكل حاجة. (قارنوا بين ده وبين اللي نعرفه دلوقتي عن إن أجسامنا ٦٠٪ منها مية).

وبعدين قال: «لو كل كتلة أرض حدودها المية، اللي هو البحر، يبقى أكيد كل أرض بتطفو فوق مية!»، فتصوّر أن كوكب الأرض (هو ماكانش عارف لسه إنه كوكب) عبارة عن حوض مية كبير مفرد، وكل الأرض اللي عايش عليها البني آدم عبارة عن جزر صغيرة أو عملاقة بتطفو فوق المية دي. وبعدين فكّر إن لو الأرض كلّها بتطفو فوق مية، يبقى أكيد هي طالعة من المية، يبقى أكيد كل حاجة معمولة من المية.

(١) تاليس كان أول سلسلة من فلاسفة شكلوا مدرسة فلسفية اتسمت «The Milesian school» نسبةً إلى مدينة إغريقية في الوقت ده قريبة من أنطاليا في تركيا دلوقتي، لسه أتينا ماكانش ليها دور كبير في موضوع الفلسفة ده. وأهمية المدرسة دي بتيجي من إنجازاتها لأنها ما عندهاش إنجازات كتير بل من اللي حاولت توصله، والأهم كمان إنها كانت في اتصال مع أفكار بابل ومصر في الوقت ده، وهو ده اللي خلّاهم تفتح أبواب جديدة وتتساءل أسئلة جديدة بسبب اتصالها بثقافات مختلفة.

تاليس كان عنده تلميذ اسمه أناكسيماندر (Anaximander)؛^{١٦} يقال إنه كان أول من رسم خريطة، وعمل حسابات يحاول يحدد بينها حجم الشمس، روايات قالت إنه افترس الشمس في حجم الأرض وروايات ثانية قالت إنه افترسها ٢٧ أو ٢٨ ضعف حجم الأرض^(١). هو اللي فكر في السؤال اللي في دماغ كتير منكو دلوقتي؛ قال لو المية شايلة الأرض، يبقى لازم فيه حاجة شايلة المية! ومش حنخلص بقة؛ فحل المشكلة دي بإنه تصوّر إن الأرض مافيش حاجة شايلاها، هي كتلة منفصلة عن أي حاجة ثانية، على شكل «cylinder»، عاملة زي البرميل.

إحنا عايشين على السطح ده وبعدين في الأجانب فيه مية، وبعدين تحت فيه أرض برضه. بس ماتصوّرش إن الأرض كروية تلف حول نفسها وكده. وشاف أناكسيماندر رافضا لنظرية تاليس إن مش ممكن يبقى فيه عنصر واحد هو المهيمن على بقية العناصر، لأنه كان حياغلهم، كان حياطردهم؛ فشاف إن فيه مكون واحد أساسي لكل حاجة في العالم فعلا بس مش المية ولا أي حاجة ثانية بعينها، هو مكون واحد من شيء أزلي أبدي بيتحول إلى كل الأشكال المختلفة للمواد اللي نعرفها. (وخلوا بالكو إن العالم ماكانش مخلوق عند الإغريق، كان نتيجة تطوّر، فكرة خلق العالم ماوصلتش للثقافة دي غير مع اليهودية والمسيحية بعدها).

(١) كتلة الشمس في الحقيقة أكبر من كتلة الأرض بأكثر من مليون ضعف.

أناكسيماندر كان عنده تلميذ اسمه أناكسيمينيس (Anaximenes) كان شايف إن كل حاجة معمولة من الهوا؛ النار هوا بمواصفات خاصة، وبعدين تكثيف الهوا بدرجات مختلفة يعمل مية وتراب وحجر وهكذا؛ المهم إنه برضه ماكانش موافق على نظرية أستاذه، وكان بالنسبالة واضح جدا إن الأرض مُسطّحة مش عاملة زي البرميل؛ طب وازاي متشعلقة في الهوا كده؟ قالك: «زي ما غطا البراد لو المية بتغلي بيبقى زي ما يكون بيطفو فوق البراد، لأن البخار بيزقّه ل فوق. بنفس الطريقة الهوا بيخلق طاقة بتزُق الأرض من تحت عشان تشيلها وتحافظ على موقعها.

ومن الجدير بالذكر هنا بقه إن أناكسيمينيس ولمدة طويلة بعد ما مات، كان ناس كتير بيعتبروه أهم وتأثيره أكبر من أستاذه أناكسيماندر، طلاب أكثر بكتير كانوا بيبدءوا من النقطة اللي وصلها الثاني إن الأرض عاملة زي البرميل، عن الأول اللي كان شايف إن الأرض مفلطحة، بالرغم من إن طبعا الأول أناكسيماندر كان عنده نظرية أكثر وجاهة بكتير وكانت قطعاً الأقرب للحقيقة.

فضل السيناريو اللي في المثال ده يتكرّر عبر تاريخ الفلسفة، ماكانتش بتمشي في خط مستقيم لقدام أبداً، بل أكثر كانت بتعمل حاجة كده زي إنها تمشي خطوتين قدام وبعدين خطوة لورا وبعدين خطوتين لقدام وخطوة للجنب وهكذا.

من أهم فلاسفة حقبة ما قبل سقراط بل الأهم من وجهة نظري لأنه بدأ يطرح تصوّرات مختلفة شوية عمّن سبقوه، فيلسوف اسمه

هير اكتيليس (Heractulis)؛ وصل لقمة مجده في نص القرن السادس قبل الميلاد؛ الرجل ده مشهور في عالم الفلسفة بسبب فكرتين مهمتين؛ الأولى هي اللي سماها وحدة الأضداد (جمع ضد يعني)؛ شاف مثلا إن الطريق أعلى الجبل مش طريق مختلف ماشي عكس الطريق أسفل الجبل، بل همّ الاتنين جزء من نفس الطريق، تطلع الجبل وتنزله هي رحلة واحدة. لَمّا حد يقول على كوابية نص مليانة، ده مش عكس إن واحد تاني يقول عليها نص فاضية، الاتنين ما ييناقضوش بعض، بل همّ الاتنين شايفين نفس الحقيقة، واحد شايفها من الحثة المليانة وواحد شايفها من الحثة الفاضية، لكن الاتنين واحد، جزء من حقيقة واحدة. ومعنى كده إن لو مافيش تناقض يبقى مافيش حقيقة.

شاف هير اكتيليس إن كل حاجة في الدنيا عبارة عن وحدة واحدة من حاجات عكس بعض أو متناقضة بشكل أو آخر. ومعنى كده من وجهة نظره إن الصراع مش ممكن تفاديه، لأن الصراع اللي بين كل المتناقضات دي، كل الحاجات اللي عكس بعض دول، همّ اللي بيتكوّن منهم العالم. «لولا الزلطين ما الوقود إنضرم»^(١) كما قالها صلاح جاهين؛ وهنا وصل «Heractulis» للفكرة الثانية اللي اتشهر بيها، وهي إن الحقيقة مش حاجة ثابتة، بل كل حقيقة هي حاجة دائمة التغير، بناءً على المعطيات المتضادة مع بعض اللي بتشكّلها.

(١) لولا اختلاف الرأي يا محترم
لولا الزلطين ما الوقود انضرم
ولولا فرعين ليف سوا مخالفين
كان جبل السود بيتنا كيف انبرم

كل حاجة في الدنيا حتى الأشياء نفسها، الجماد، حتى النبي آدم، كل كائن حي، الكون كله مايبثش على حالة واحدة ولا حتى ثانيتين ورا بعض، بل كل حاجة في الكون في حالة تغير دائم مايقفش أبدا. الفكرة اللي وصلها «Heractulis» دي فكرة عميقة جدا، وخصوصا وهي طالعة ٦ قرون قبل الميلاد، ولكنها كمان فكرة مُقلقة. النبي آدم من أول خلقه وهو يبحاول بالفطرة يلاقي ثوابت يبني عليها أفكاره وإلا يبحس إنه تايه، وبعدين تتولد فكرة إن كل حاجة في الدنيا دائمة التغير ومايبثش على حالها أبدا، وإن التغير ده هو القاعدة الوحيدة الثابتة واللي بتحكم كل القواعد الثانية المُحرّكة للكون! ده إيه بقه؟ إنت دلوقتي عادي يعني ممكن تقول لأصحابك: «دنيا مايبثش أبدا على حال»، لكن اللي احنا شايفينه ده لما حصل ساعتها كان تغيير في طريقة تفكير النبي آدم نفسها. تغيير التأثير بتاعه حيمتد عشان يوصل لكل جوانب حياة البشر ويأثر على مستقبلهم كلهم. خطوة مهمة جدا في تاريخ البشرية وكالعادة حطّتها الفلسفة.

فيثاغورث^(١)

(بتاع حساب المثلثات ده اللي ببدا دراسة الهندسة في المدارس بتعلم معادلته الشهيرة)، قالت روايات كتير إن فيثاغورث كان ابن

(١) فيثاغورث (Phythagoras) بدأ عنده فصل جديد من فصول الفلسفة الإغريقية نشاطها الأكبر، كان في جنوب إيطاليا حاليا، وكانت مدرسة دينية أكثر وعلمية أقل عما قبلها.

للإله أبوللو، كان راجل عبقرى، هو اللي اخترع فكرة مربع الرقم ومكعبه، الـ «square» والـ «cube» بتوع الأرقام. هو اللي عمل أول معادلة حسابية في التاريخ المكتوب، أول من استعمل كلمة «فلسفة» نفسها، أول من استخدم كلمة «الكون»، كان فيثاغورث واحد من مؤسسي الحضارة الحديثة مع إنه مات سنة ٥٠٠ قبل الميلاد.

من أهم إنجازات فيثاغورث إنه ربط الفلسفة بالرياضيات. تأثير علم الرياضيات، وبالتالي الهندسة على الفلسفة، كان تأثير عظيم الشأن، وبدأ التأثير ده من عند فيثاغورث؛ علم الرياضيات قاطع، حاسم، متأكد، مافيهوش مجال للغلط من أول واحد زائد واحد يساوي اثنين لحد الآخر خالص. وأهم سمة للرياضيات إنها بتُصنع بالتفكير بس، مش بالملاحظة زي بقية العلوم؛ في الطب مثلاً، بيدرس الطيب الحالة دي والحالة دي والحالة دي وبعدين يلاقي حاجات مشتركة فيعمل نظرية عن الأعراض المشتركة اللي شافها في الحالات، يفهم المرض، ويبدأ يدور على علاج، فيجرب كذا وبعدين كذا وبعدين كذا. ساعات تمشي معاه ويلاقي إن ملاحظاته كلها بتوجهه لناعية واحدة من غير مفاجآت ولا ألغاز، وساعات علاجه ينفع مع نص الناس والنص الثاني لآ، فيدور عالمشترك بين دول ودول ثاني، وساعات يقابل كام حالة كمان فيكتشف أصلاً إنه كان غلطان من الأول فيبدأ يجرب في اتجاه مختلف خالص وهكذا. في الرياضيات بقه، كل حاجة بتبدأ بديهية مافيش كلام فيها، وبعدين تبدأ عملية استنتاج من البديهية دي جنب البديهية دي جنب البديهية

دي، الطريقة اللي بتبني بيها الحقيقة في الرياضيات وبالتالي المنطق مختلفة تماما عن بقية العلوم؛ فالرياضيات لما أثرت عالفلسفة خلّتها تفكر بطريقة شبيهة، تبدأ بما هو بديهي وبعدين تستنتج منه؛ فده خلّى الفلاسفة بعد فترة طويلة مثلا يعتبروا إن حقوق البني آدم بديهية، فبعد ما بقت بديهية بقى لازم يلاقي طريقة عادلة عملية يدّي بيها الناس حقوقهم «البديهية» دي، وهكذا.

العلاقة دي هي السبب في إن على مر التاريخ كان من أعظم فلاسفة الأرض علماء رياضيات؛ ديكارت مثلا هو من اخترع الـ «graph» أو الرسم البياني، لايبنتس (Leibniz) هو مكتشف التفاضل والتكامل، والأمثلة كتير جدا لفلاسفة استعملوا الرياضيات المليئة بالثوابت (يعني المنطق)، عشان يفكروا في المسائل الفلسفية المليئة بالمتغيرات، وكان بداية كل ده عند فيثاغورث.

بعد هير اكتيليس فضلوا الفلاسفة يلعبوا مع فكرة إن المعرفة دائما بتتطور وتتغير، لأن طبيعة كل الأشياء على طول بتتغير، فبديهي إن المعرفة تحاول تلحقها، تحاول تلحق الواقع المتغير. وبدأت الفلسفة تكشف للناس ازاي أي حقيقة يعرفها البني آدم هي مش حقيقة ثابتة فعلا، قد ما هي الحقيقة «اللي يعرفها»، باللي يقدر عليه، بإمكانياته، باللي يعرفه هو كمان؛ وازاي بعد شوية سواء كان هو نفس الشخص أو حد تاني يبجي بعده بيعرف أكثر. فالحقيقة نفسها، الحقيقة شخصيا، ماتبقاش حقيقة خلاص، وتُسبَدل بالحقيقة الجديدة اللي عرفها البني آدم، وتفضل دي هي حقيقة أي حاجة «اللي حتتغير أكيد لو عرف أكثر»، لحد ما يعرف فتتغير الحقيقة تاني وهكذا.

ماتنشاش طول الوقت وانت بتسمع حواديت الفلسفة دي عينك
المفروض تفضل على إيه، على ما كُتِب هذا الكتاب من أجله،
خليك مراقب «طريقة التفكير» اللي بتغيرها الفلسفة ولا يقدر على
تغييرها سواها.

طبعا اللي ذكرنا دول أمثلة قليلة من فلاسفة عصر ما قبل سقراط
وإن كانوا هم الأكثر تأثيرا، واحنا ماخضناش كمان في أفكارهم أكثر
من كده عشان مش موضوعنا يعني، عايزين بس نتأمل محطات تغيّر
الفكر دي، المحطات اللي كلها خلقتها الفلسفة.

نقدر نلخص اللي حصل للفلسفة الإغريقية قبل سقراط إن
الأرضية اللي كانوا كل فلاسفة الحقبة دي واقفين عليها هي محاولة
فهم طبيعة الكون؛ تأملوا قد إيه الكون لسه غامض بالنسبنا إحنا
لحد دلوقتي وتخيلوا قد إيه كان غامض بالنسباليهم هم بقه من
٣٠٠٠ لـ ٢٥٠٠ سنة!

شفنا ازاى في تصوّرات الأوائل عن طبيعة الكون ممكن المنطق
يغلط، وشفنا ازاى ممكن يبقى المنطق سليم ويؤدي لنتائج سليمة
منطقيا لكنها مزيفة مش حقيقية. ولا لوم عليهم لإنهم لسه ماكانش
عندهم العلم اللي يُمكنهم من اختبار نظرياتهم دي. وخصوصا
إن مجهودهم ماضعش هباء أبدا، محاولات تفسير طبيعة العالم
هي اللي وصلت الفلاسفة لإدراك حقيقة إن كل شيء دائما متغيّر،
الحقيقة اللي إدراكها بدأ يغيّر في وجهة نظرهم للأمور، يغيّر «في
طريقة تفكيرهم».

سقراط

تعالوا دلوقتي بقه نروح عالمعلّم.. سُقراط شخصيا؛ سُقراط يقولون عنه إنه كان شكله وحش، ولكنّه حاد الذكاء، خفيف الدم، ساخر، وعنده كاريزما شخصية جذبت ليه أصحاب العقول في أثينا جميعهم. سقراط أول الفلاسفة الإغريق العظام اللي يبقى أثيني المولد. وعاش فيها في عصرها الذهبي في قمة مجدها. إتولد حوالي ٤٧٠ قبل الميلاد ومات ٣٩٩ قبل الميلاد.

درس سقراط وهو شاب اللي بنسّميه دلوقتي فلسفات ما قبل سقراط، وكان عنده اعتراضين مهمين على كل الفلسفات اللي كانت مهمومة بفهم طبيعة الكون دي؛ أولها إنها كانت بتتحرك في اتجاهات مختلفة بل وكانت متناقضة مع بعض في أغلب الأحيان؛ واحد يقول الأرض مفلطحة والثاني يقول لأبرميل، واحد يقول كل حاجة معمولية من المية والثاني يقول من الهوا والثالث يقول من الاتنين ويزود عليهم الأرض والنار وهكذا؛ وماكانش فيه وسيلة

للفصل بين النظريات دي؛ كلها أفكار وكلها ماحدث يقدر يثبت صحتها من عدمه.

تاني اعتراض لسقراط على فلسفات ما قبل عصره كانت إنه شاف إنها عديمة القيمة، حتى لو أثبتنا صحتها؛ حنعمل إيه يعني لما نعرف حجم الشمس، ولّا المسافة بينها وبين الأرض ولّا الأرض مكورة ولّا مسطّحة ولّا غيره! هكذا فكّر سُقراط. فكر إن النوع ده من أنواع التفكير مالوش أثر على سلوك النبي آدم، واللي احنا فعلا عايزينه هو إننا نُدير حياتنا بشكل أحسن. شاف إن شغلة الفلسفة هي إنها تساعدنا في إجابة السؤال الأهم على الإطلاق «نعيش ازاى؟». يبقى الأسئلة اللي محتاجين فعلا نجابوب عليها هي أسئلة زي: إيه هو الحق؟ إيه هو الصح؟ إيه هو الخير؟ عشان لو جاوبنا الأسئلة اللي من النوع ده حياتنا حتتغير للأحسن، فيبقى فعلا فيه فائدة بتعود علينا من ورا التفلسف والبحث والاستكشاف.

سقراط لم يدعي إن عنده إجابات للأسئلة اللي كان مهتم بيها دي، بس كمان كان شايف إن ماحدث تاني عنده إجاباتها، وشاف إن شغلة الفلسفة الأصلية هي إنها تحاول تلاقي تلك الإجابات.

قيل عن سقراط إنه أحكم الرجال، ليه؟ لأنه كان الوحيد اللي عارف إنه مايعرفش. بداية المعرفة الحقيقية إنك تعرف إنك ماتعرفش.

ماكانش فيه في الوقت ده معرفة حقيقية بطبيعة الكون وده اللي كان مجنّن فلاسفة الإغريق، لكن كمان ماكانش فيه معرفة حقيقية بما يخص حياة الناس نفسها، وأول واحد يحاول يغيّر بقة الوضع ده كان سقراط.

جَابَ سقراط أنحاء أتينا القديمة يشير أسئلة عن الأخلاق والإنسانية والرحمة والعدل والسياسة مع أي حد كان عنده استعداد يسمعه. وبسبب شخصيته وكاريزمته وذكاؤه كانوا الناس بيتلموا حواليه فعلا وخصوصا الشباب. طريقته كانت دائما واحدة، كان يمسك حاجة من الحاجات الكثير اللي الناس بيستسهلوا ومايفكّروا فيها فيهم دول ويسأل الناس: إيه هي الصداقة؟ إيه هي الشجاعة؟ إيه هي التقوى؟ ولما حد يقوله إنه عارف إجابة أي سؤال هو بيسأله، كان يتفلسف عليه طبعاً، ويفضل وراه يمتحن إجابته. فواحد مثلا يقوله إن الشجاعة هي الصمود. فيسأله سقراط، طب والعناد؟ ما العناد صمود وإصرار وثبات عالموقف، هل هي دي الشجاعة؟ هل العناد صفة حميدة أصلاً؟ ولو هي مش صفة حميدة إزاي ممكن يبقى عندها صفات مشتركة مع الشجاعة شخصياً بكل ما فيها من نبل وتضحية وإقدام؟ وهكذا، وساعتها كان صاحب الإجابة يا إما يتراجع عن إجابته يا إما يحاول يقدم إجابة تانية.. وهكذا. وطبعاً كان اللي بيحصل في أغلب أغلب الأحيان إذا ماكانش كلها، إن الإجابة الأصلية اللي بيطلعها الواحد من غير تفكير عميق ولا جدل ولا أخذ وهات، كانت بتبقى ناقصة

أو معيوبة. واللي كانوا يوقفوا في الدواير دي يتفرّجوا ويسمعوا
كانوا همّ كمان بيكتشفوا إن ما عندهم إشجابات للأسئلة اللي
كانت تبدو بالنسبالهم ومن دقايق قليلة، أسئلة بسيطة؛ بيكتشفوا
مثلا إنهم ما يقدروش يعرفوا الشجاعة ولا حاجة، وشرحه كثير
جدا من المفاهيم الإنسانية اللي ما كانتش لسه الحضارة لقت وقت
وبراح تفكر فيها وتنظر عنها.

اشتهرت الأسئلة السقراطية دي في أنحاء أتينا وضربت
عصفورين مهمين بحجر واحد، أولا عرفت الناس إنهم ما يعرفوش.
والعصفور الثاني اللي ضربه سقراط هو إن الأسئلة دي خلّت كثير
من عامة الناس تشغل بمسائل فلسفية ما كانواش أبدا يفكروا فيها
قبل كده، خلّتهم يتناقشوا ويختلفوا ويتفقا، خلّتهم يفكروا.

سقراط كان نادرا ما بيدي إجابات نهائية على أسئلته، كان
يفضّل إن المسألة تفضل دائما في إطار الجدل العقلي اللي مش
مهم عنده يوصل لإجابة نهائية أصلا، المهم إن العقل يشتغل في
محاولة حقيقية للمعرفة، ألا وهو قلب القلب بتاع موضوع الفلسفة
ده كله على بعضه. فاقصر دور سقراط على إنه يدفع الناس إنهم
يفكروا في المسائل المختلفة عشان يقدرّوا صعوبة الوصول ليقين
يخصّها، عشان ما يفتكروش إن المعرفة والفهم حاجات سهلة،
عشان يقدرّوا قيمة الفلسفة.

سقراط لما كان يبسأل عن معنى العدالة مثلا، ماكانش عايز يعرفها ولا حاجة، هو كان بيسمع الناس بيستعملوا كلمة «كبيرة» زي دي، فيقولوا ده قانون عادل أو ده قرار مش عادل وهكذا؛ فشاف إن فيه حاجة ما، كل من يذكر الكلمة دي حاسس بوجودها، وده خلّاه يتصوّر العدل نفسه على إنه أكثر من فكرة، هو حقيقة - بالرغم من إنه مش شيء مادي - بس فيه حاجة حقيقية فعلا اسمها العدل. هي مش فكرة خالقها الإنسان، لأ حقيقة، ويحاول هوّ كنموذج للبنّي آدم، إنه يستكشفها ويفهمها. زائد طبعا إنه كان بيحاول يعدي الناس بالرغبة دي في المعرفة والتفكير والفهم.

القاضي الفيلسوف

تعالوا نقف شوية نتأمل كويس فكرة سقراط دي، بداية إدراك النبي آدم إن فيه حاجات مش نسبية (بالرغم من إن كل حاجة مخلوطة بأشياء نسبية فعلا)، النسبية اللي بتخلقها الظروف المختلفة المحيطة بأي حالة. يعني مثلا واحنا بنفكر في مفهوم العدل ده؛ لو لقينا واحد سرق، سرق حاجة مش من حقه، يعني ارتكب جريمة أهه، لو جينا بقه نصلح الجريمة دي باستخدام «العدل» حنلاقي الأول إن من البديهي إن اللي اتسرق يرجع لصاحبه، ولو ماكانش ينفع يرجع يبقى نعاقب اللي سرق، سهلة. «تبدو» بس سهلة، لإننا عشان نحقق العدل فعلا، أو في الحقيقة عشان نحاول بس نقرب فعلا من العدل الحقيقي المطلق شخصيا، لازم نحفر أعمق من كده، لازم نسأل أكثر من كده. فبدأت فلسفة القانون تقول مثلا إن حتى لو اللي سرق حاجة رجّعها، حق صاحبها رجّع أهه، أو في الحقيقة جزء من حقه، لأن بقية حقه إن الناس تحترم حق ملكيته لحاجته، عدم احترام حق الملكية تبقى عقوبته إيه؟ طب بعيدا عن الشخص صاحب الحق

خالص، هل من حق المجتمع إنه يعاقب اللي سرق لإنه كسر قاعدة من القواعد اللي بيقوم عليها المجتمع؟ لو كل الناس عملت زيّه مش حيبقى فيه حقوق ولا قانون يصونها، بيبقى لازم نرجع حق المجتمع (الحق المدني زي ما بيسمّوه في القانون). طيب، خلاص كده العدل خلص؟ حققنا العدل المطلق؟ أكيد لأ، لإن العدل مش بس عن حقوق اللي اتسرق واللي اتضرب... إلخ، العقوبة كمان اللي بتقع على مرتكب الجريمة لازم تبقى عادلة، لإنه لسه جزء من المجتمع وله حقوق ماضاعتش كلّها ولا حاجة لما ارتكب جريمة أو غلطة أو غيره. لازم نذاكر الظروف اللي خلّته يرتكب الجريمة دي، لما نلاقي مثلا حد سرق عشان عياله جعانيين ومش قادر يأكلهم فسرقلهم أكل؛ حالة مختلفة خالص أهه. الحالة اللي مختلفة مش العدل اللي مختلف خلي بالكو، العدل مطلق حقيقي ثابت، طريقتنا احنا في محاولة تحقيقه هي اللي حتتغير دلوقتي لإن الظرف اللي بنفكر فيه اتغير. فيه واحد ممكن يقول لأ، مالناش دعوة هو سرق ليه؟ السرقة جريمة، فاللي يرتكبها يتعاقب، ما هو ممكن يشحت بدل ما يسرق، أقل حاجة يعني! ما فيش كلام في الموضوع وماتهمّيش ظروفه عاملة ازاى، اللي يرتكب جريمة يتعاقب. الراجل ده دلوقتي وهو شايف كده مش غرضه إنه يظلم حد، بالعكس هو غرضه يحقق العدل في المجتمع بتاعه، يحقق العدل للي اتسرق منه، وبيعتمد في وجهة نظره دي على كلام منطقي برضه، يعني الراجل منطقي وغرضه أخلاقي ونبيل أهه، أمال إيه الغلط اللي هو عمله؟

الغلط اللي هو عمله إنه اشتغل قاضي من غير ما يبقى فيلسوف! كان حيعمل إيه مختلف القاضي الفيلسوف طيب؟ كان الأول مستحيل يقول مالناش دعوة بظروفه، لإن الفيلسوف عارف كويس إن في العالم اللي كلّه متغيّر ومايبشتش أبدا على حال، الواحد عشان يحقّق العدل، اللي هو أصلا ثابت ومطلق، لازم يذاكر المتغيّر كويس، لازم يفهم كل الظرف اللي كان فيه مرتكب الجريمة قبل ما يطبّق عليه ما يظن أنه العدل. فيسأل بقة: هو سرق ليه؟ عشان يأكل عياله فعلا ولّا هو عنده أكل في البيت ويسرق عشان يبقى معاه فلوس؟ طب هو سرق قبل كده ولّا لا؟ كانت ظروفه عاملة ازاي لما سرق قبل كده؟ طب جرّب يشحت فعلا ولّا لا؟ طب هو لو شحت حيعرف يأكل عياله ولّا لا؟ وهو أصلا إيه اللي خلاه مايبشتغلش؟ الناس اللي عندهم شغل ماشغّلوهوش ليه؟ عشان مايفش شغل ولّا هو عنده عيب بيخلى الناس مايشغّلوهوش؟ طب مين السبب في الأسباب اللي عشانها ماحدث شغله؟ تعليمه كان وحش؟ مدرسته كانت وحشة؟ ماحدث علمه يشتغل؟ أبوه وامه طيب السبب؟ إمكانياته العقلية أو الجسدية؟ وبعدين إيه ده! يشحت ازاي أصلا صحيح؟! التسوّل ده بيهين كرامة البني آدم، ازاي سألت إذا كان ممكن يشحت فيأكل عياله؟! ازاي المجتمع ده فشل في إنه ينقذ الراجل ده وعياله من الجوع لحد ما يضطر يسرق عشان ياكل هو وعياله؟ مين المسئول عن كده؟ إلخ إلخ إلخ لحد فين؟ لحد ما يبقى عارف بالظبط جريمة الشخص ده هي إيه، فيحاول يعرف

بالظبط بالظبط يستحق عقاب وآلا، ولو يستحق عقاب يستحق عقاب شكله عامل ازاي، وفيه حد تاني يستحق عقاب معاه وآلا، وآلا هي أصلا دي مش جريمته خالص بل جريمة حد تاني!

القاضي والمشرع وفيلسوف القانون لما يعمل كده مش أكيد بيوصل للعدل خلي بالك، لكن ما دام عمل كده، ما دام اختار الطريق ده في محاولة الوصول يبقى بيحاول يقرب من العدل، المدرس المستفاد أظن واضح، حكته هولكو بينط عريض أهه عشان تفتكره:

العدل الحقيقي المطلق صعب جدا ويمكن مستحيل الوصول إليه، بنحاول بس نقرب منه، وبرضه مستحيل ننجح من غير فلسفة.

نرجع لسقراط اللي فضل ينشر أسئلته في أنحاء أتينا القديمة، فضل يكشف للعامه بعد ما يفهموا بالتأمل والتفلسف والجدل، جهل بعض الساسة ورجال الدولة بل وحتى جهل رجال الدين؛ وبدأ يبقى محط أنظار الجميع اللي منهم كانوا بيقدروه جدا وشايفين قيمة عظيمة للي هو بيعمله وكمال اللي منهم كانوا بيكرهوه وبيكرهوا اللي بيتسبب فيه أكيد.

انتهى الأمر بسقراط عقابا له على تشجيع الناس إنهم يفكروا ويتساءلوا، إلى إنه اتقبض عليه بتهمة «إفساد عقول الشباب»، وعدم

الإيمان بألهة المدينة. وحكمت عليه المحكمة بالموت بالسم.
ومات سقراط.

سقراط بالمناسبة ماتتفدش فيه حكم الإعدام أول ما طلع، كان فيه نوع من أنواع الاحتفال الديني آخر تنفيذ الحكم؛ وفي الحوار المسمى كريتو (Crito) (على اسم أحد أصدقاء أفلاطون) اللي كتبه أرسطو لاحقاً -زي ما حنعراف بعد شوية- حكى أفلاطون بالتفصيل ازاي أصدقاء سقراط حاولوا كتير يقنعوه إنهم يرشوا حرّاسه ويخلّوه يهرب في الفترة بين إصدار الحكم وتنفيذه دي. والحوار بين سقراط وأصداؤه كان إن همّ عمّالين يقنعوه إنه مبش مفروض يستسلم للموت بقانون ظالم، لازم يعيش عشان ولاده، عشان تلامذته، لازم يهرب. وهو بيرد بالمعضلات الأخلاقية اللي رفض بسببها فكرة إنه يهرب؛ معضلة كسر القانون أولاً! (أبوا الراجل فيلسوف الأخلاق ده كان عنده مشكلة كبيرة إنه يهرب من حكم ظالم مفترى، بالإعدام شخصياً عشان هو حكم أصدره القانون، وكسر القانون بالنسباليه كان عمل غير أخلاقي!)، ده غير معضلة تعريض أصدقاؤه للخطر لو خلاهم يهربوه فعلاً، ده غير معضلة إنه شاف ما فيش فرق بين المنفى اللي هستخبي فيه لما يهرب والموت، كان أحسن لسقراط إنه يموت عن إنه يعيش ربيع حياة، يخون مبادئ هو مؤمن بيها عشان يعيشها.

سقراط صحيح كان بيقول إنه ما عندوش إجابات للأسئلة اللي كان بيطرحها، بس ده كان في الحقيقة كمان على سبيل التفلسف،

لأنه كان عنده، كان عنده أهم من الإجابات؛ كان عنده فكرة عايز يوصلها للناس، كان عايزهم يفكروا عشان يحاولوا يوصلوا للحقيقة الأشياء بدل ما يتعاملوا معاها بتهاون واستسهال. وكانت فلسفته زي ما تأكدنا بعد محاكمته بتترجم لمبادئ، وكان ما عندوش القدرة إنه يخونها حتى لو كان التمن حياته.

كان سقراط فيلسوفا

كان شايف سقراط إن أهم ما يملك البني آدم هو روحه، وبالمقارنة مع الروح، كل حاجة تانية تبقى عديمة القيمة. ماشافش إنه خسر لما اتهم ظلما وحكيم عليه بالإعدام ظلما كمان؛ لأنه شاف إنه حيموت وروحه سليمة، لأنه لم يتخلى عن مبادئه ولا ما يؤمن بيه. شاف سقراط إن الناس مش مفروض يتعاطفوا مع اللي وقع عليه ظلم أبدا، بل يتعاطفوا مع اللي ظلمه؛ لأن الظالم هو اللي بيخسر بعض روحه، في حين إن المظلوم بيقع عليه ضرر بس، لكن روحه لأنه لم يخونها بأذية غيره، لا تُمس. ولو روحك ما حصلهاش حاجة يبقى انت ما حصلكش حاجة.

سقراط كان عنده قناعة أخرى مهمة جدا؛ شاف إن ما حدش بيعمل غلط قاصداً وهو عارف إنه غلط، بل معنى إنه بيعمله هو إنه مش مستوعب فعلا إنه غلط، وإنه لو أدرك إدراك كامل حقيقي لغلظه ده مش حيعمله. وبالتالي تبقى الفضيلة عند سقراط مربوطة بالمعرفة. لو فعلاً عرفت إيه الحق حتحققه.

وده كان الدافع الأصلي ورا أسئلة سقراط لأهل أتيناً؛ شاف إننا لو سألنا نفسنا عن معنى العدالة وعرفنا نجاوب؛ حنلاقي تصرّفاتنا بقت متأثرة بفهمنا لفكرة العدالة دي وبالتالي حنظلم بعض أقل بكثير وكذا على كل المفاهيم الفلسفية. فيبقى عند سقراط المعرفة عن العدل والفضائل عموماً هي جزء لا يتجزأ من ممارسة الناس للفضائل دي والتزامهم بيها. اللي يعرف حيعمل واللي مايعرفش «ماحيعملش».

أهمية سقراط كفيلسوف بالرغم من إنه ماكتبش ولا حاجة من أفكاره وكل اللي نملكه عنه هو اللي كتبه عنه تلامذته المخلصين وعلى رأسهم أفلاطون؛ بيتجي من إنه كان أول فيلسوف سجّل التاريخ اهتمامه العظيم ده بمسألة الأخلاق اللي بتحكم كل تصرّفات البني آدم (الأخلاق اللي هدفها إرضاء النفس والضمير مش المجتمع ولا الآلهة) سقراط ماكانش مستعد يغيّر قناعاته من أجل إرضاء المجتمع، وكان مستعد يضحي بحياته نفسها عشان اللي مقتنع بيه، بل إنه عمل كده فعلاً، باختياره وكامل إرادته؛ كان أحب إليه وأسهل إنه يقتل ولا إنه يغيّر معتقده اللي شايف فيه صواب، بل وإنه حتى ماقدرش يكسر القانون حتى وهو القانون بيظلمه ويعدمه بلا وجه حق. كان سقراط أول فيلسوف أخلاق في التاريخ المكتوب.

سقراط كان عنده كمان إنجاز حضاري مهم جداً للفلسفة ولتاريخ الدنيا اللي جت بعده؛ إنه كان من أوائل من أقرّوا بأن كل

حاجة في الدنيا خاضعة للتساؤل. بما فيها ما يتصوره أي حد على
إنه إجابات للأسئلة، حتى الإجابات، كل الإجابات لازم تفضل
خاضعة للتساؤل.

أسس سقراط بأسئلته الكثيرة ما يسمّى بـ «الجدلية» -اللي هي
طريقة بتستعمل الجدل والأسئلة والأجوبة في محاولة الوصول
لحقيقة الأشياء اللي مابتبانس من بره كده- وفضلت دي من عند
سقراط ولحد النهارده وسيلة تعليم قيمة جدا. ومتسمية بإسمه؛
الطريقة السقراطية في التعليم والتعلم. مابتنعش صحيح في
توصيل معلومات، لكنها عظيمة القيمة في إنها تخلي حد يراجع
قناعاته ويختبرها وهو بيجابو على أسئلة تخصها، بتنعف جدا في
رسم صورة أوضح عن أي حاجة ممكن تتشاف من زوايا أخلاقية
مختلفة، بتنعف جدا في الفلسفة.

فيه ناس بيعتبروا سقراط أعظم فلاسفة الأرض؛ وفيه ناس تانيين
بيشوفوا حد تاني على إنه الأجدر باللقب ده؛ أعظم فلاسفة الأرض
برضه، أفلاطون.

أفلاطون

فيه مقولة عن أفلاطون إن كل الفلسفة الغربية كانت الهوامش بتاعته؛ وده مش مقصود حرفيا طبعا بس المقصود إنه رسم بكتاباتة مسار الفلسفة الغربية كلها مش بس حتى فلسفة الأخلاق اللي أبدع فيها؛ ومشيت الفلسفة الغربية في المسار ده اللي رسمه أفلاطون ٤٠٠ سنة قبل الميلاد لحد النهارده مرورا بكل العالم اللي أترجم ليه شغل أفلاطون بما فيهم العرب.

أفلاطون تلميذ سقراط كان أول فيلسوف في تاريخ البشرية يكتب كل شغله بنفسه، ويوصل شغله عبر التاريخ زي ما اتكتب بالظبط. كان عنده ٣١ سنة لما اتعدم أستاذه ومعلمه سقراط بالسسم، ٣٩٩ قبل الميلاد، وحضر سقراط كل جلسات محاكمة أستاذه، وأثرت فيه جدا، لأنه كان يبشوف أستاذه على إنه أحسن وأحكم وأعدل بني آدم في الدنيا. وبعد ما مات سقراط بدأ أفلاطون يكتب حواراته الفلسفية الشهيرة، الـ «dialogues»، سقراط كان

محور النقاش في أغلبها لكن طبعاً كان موجود في كل الحوارات،
سائلاً متسائلاً وفيلسوفاً، بيدور على إجابات لأسئلته في الأخلاق
وفي السياسة.

أفلاطون كان عنده دافعان مهمين لكتابة الحوارات اللي بتطرح
أفكار أستاذه دي؛ الأول كان تحدي، إنه كان عايز يحافظ على شغل
سقراط بإنه يكتبه، رغماً عن أنف من أعدموه بسبب أفكاره، وثانياً
إنه كان عايز ينشر أفكار سقراط عشان الناس تعرفه أحسن فينصف
سمعته من تهمة إفساد عقول الشباب اللي اتعدّم بسببها.

مع مرور الوقت بدأت مصادر الأفكار بتاعة الحوارات
الأفلاطونية دي تتغير شوية، الحوارات الأولى كان فيها شخصية
سقراط قريبة جداً من شخصية سقراط الحقيقية. بيسأل نفس أسئلة
سقراط، ويرد نفس الردود اللي ردها سقراط؛ بفروق بسيطة بس
(اللي اتخلقت لما اتحوّلت الأفكار دي لدراما). وبعد ما المخزون
السقراطي اللي عنده بدأ يخلص، لقي إن بقي فيه جمهور متحمس
للحوارات دي، فكمّل الحوارات بنفس شخصية البطل الدائم
سقراط اللي الناس حبوها، بس بدأ يحط أفكاره هو على لسان
بطله، وهنا فيه معضلة بديعة الحقيقة، إن دارسي الفلسفة ماقدروش
أبدأ يرسموا خط واضح فاصل بين الاتنين، ما حدش ممكن يتأكد
إذا كانت أي فكرة طرحت في الحوارات هي فكرة سقراط فعلاً
ولّا فكرة أفلاطون حطّها على لسان بطله سقراط، الاتنين أفكارهم

اتصفروا في بعض واتحولوا لحاجة واحدة. وإن كانوا الأغلبية متفقين إن سقراط الحقيقي هو اللي أكثر اهتمامه كان مُنصب على الأسئلة الأخلاقية اللي تخص العدالة والفضيلة، اللي بتحاول تخدم السؤال السقراطي الأهم واللي بتؤدي إليه كل الطرق: «إزاي المفروض نعيش؟»، ومتفق أغلب دارسي الفلسفة إن الحوارات الأولى كان فيها من سقراط وأفكاره وروحه أكثر بكثير من الحوارات الأخيرة، نقدر نقول إنه بدأ من عند سقراط وانتهى عند نفسه.

سقراط الحوارات الأولى كان شبه سقراط الحقيقي، فيلسوف مهتم فقط بفلسفة الأخلاق وفلسفة السياسة، وماقترش أبدًا من الفلسفات المعنية بطبيعة العالم. حكم منهج تفكيره زي ما ذكرنا، قناعته بإن الفضيلة مربوطة بالمعرفة، كل ما يعرف النبي آدم أكثر عن الحق والعدل والفضيلة كل ما حيمارسهم أحسن. أما سقراط في الحوارات الأخيرة اللي كتبها أفلاطون على لسانه، كان مهتم بكل جوانب الحياة وكل الفلسفات اللي تخصها بأفق أوسع يشمل الأخلاق لكن مش محصور فيها بل طموحه في الفهم والمعرفة أكبر بكثير منها.

اعتبر أفلاطون إن الرياضيات والفيزياء هم مفاتيح فهم طبيعة العالم، وكتب على باب مدرسته:

«Let no one enter here, who is ignorant of mathematics»

الجاهل بالرياضيات (وفي أقوال أخرى: بالهندسة) ما يدخلش هنا أصلاً. لأن الفلسفة بتتطلب اعتماد على علم المنطق؛ والمنطق هو رياضيات الأفكار والمفاهيم.

رفض أفلاطون نظرية أستاذه بتاعة ارتباط الفضيلة بالمعرفة عن الصح والغلط، شاف إن البني آدم بيرتكب أخطاء وهو عارف إنها أخطاء لعيوب ما في نفسه، بس اتفق معاه تماماً في نظرتة لإن الشر بيثذي من ارتكبه لإن الضرر الحقيقي الوحيد اللي ممكن يلحق بالبني آدم هو ضرر روحه. حاجة شبه «يا بخت من بات مغلوب ولا باتش غالب» كده 😊

التزم كمان أفلاطون طول الوقت وهو بيكتب حواراته السقراطية بمبادئ أستاذه؛ إن كل واحد لازم يفكر لنفسه، ما فيش أي فكرة مسلم بيها، كل حاجة في الدنيا خاضعة للتساؤل والاستفهام وهكذا. وإيمانه بالمبادئ دي هو اللي خلاه بعد ما عرض شغل سقراط في حواراته، بدأ يحط شغله هو وأفكاره على لسان سقراط بطل حواراته زي ما علمه سقراط نفسه.

أفلاطون اللي سُمي بالمُعَلِّم الأول، عاش بعد سقراط ما اتعدم ٥٠ سنة كاملة كتب فيهم الـ «Dialogues» بتاعته اللي كانوا حوالي ٣٦؛ كانوا بيختلفوا في أطوالهم من ٢٠ صفحة لـ ٣٠٠ صفحة مثلاً من صفحات الكتب اللي احنا نعرفها. أشهر الحوارات على الإطلاق كان «The Republic» (الجمهورية).

كتب فيها عن طبيعة العدالة وتصوّره عن الدولة العادلة؛ والكتاب ده ومعه كتاب تاني بعنوان «Laws» أو «القوانين»، هم أطولهم وأكثر اتنين فيهم ممكن يتسمّوا كتب يعني، مش عشان الطول بس، بل كمان عشان طريقة كتابتهم. ومن أشهرهم «The Symposium» اللي هي زي كده قعدة الحظ لامؤاخذة؛ كتب فيه أفلاطون عن طبيعة الحب.

الحوارات دي في رأي الكثيرين من أهم ما كُتب من أدب في تاريخ الحضارة الغربية كلها، وكانت مكتوبة بلغة رائعة كمان خلت أفلاطون فنان مبدع مش بس فيلسوف، وكانت أكثرها إبداعا في عين كتير من تلامذته هي الحوارات اللي كتبها على لسان أفلاطون في «المحاكمة»، اللي زي ما قلنا أثرت فيه بشكل عميق جدا وهو بيتابعها، وغيّرت فيه وفي نظرتة للعالم.

أفلاطون عمل أول كلية في تاريخ الغرب، الأكاديمية بتاعته، اللي كانت في بيته يعني بس كانت أول أكاديمية لدراسة الفلسفة في تاريخ الأرض.

أكثر حاجة عُرف بيها أفلاطون كانت نظريته عن مفاهيم القيم والأخلاق، زي العدل والحق والخير؛ كنا اتكلّمنا ازاى سقراط لَمّا كان يبسأل «إيه هو الحق؟ أو إيه هي الشجاعة؟»... إلخ، ماكانش بيحاول يعرفهم ويحددهم، بل كان بيحاول يستكشف وبالتالي يفهم بشكل أحسن طبيعة المفاهيم المجردة دي، اللي بالنسبale

ليها وجود حقيقي بالرغم من إن مالهاش وجود مادي. مش مرتبطة بزمن أو مكان أو ظرف بس موجودة دايماً وكل ما على النبي آدم إنه يكتشفها. فالفعل اللي ممكن نوصفه بالشجاعة أو الحاجة اللي نوصفها بالجمال مش مطلقة كده، بل بياخدوا الأوصاف دي من اقترابهم من الحقيقة المطلقة المسماة بالجمال والحقيقة المطلقة اللي اسمها شجاعة وهكذا.

خُذ بقه أفلاطون النظرية دي من إطار القيم والأخلاق وراح مطبقها على كل حاجة في الوجود. فعند أفلاطون كل حاجة بلا استثناء في الحياة هي نسخة فانية سريعة الزوال من حاجة تانية في جزء آخر من الوجود لا تفنى ولا تتغير وأبدية.

دعم أفلاطون تصوّره ده بحُجج كثير من مصادر مختلفة، زي مثلا إنه شاف إن كل ما النبي آدم يدرس الطبيعة (الفيزيا) أكثر، بيتضحله أكثر العلاقات الهندسية الحسابية اللي رابطة الكون المادي ببعضه، العلاقات اللي هي سر تناغم ونظام ودقة الكون. اللي هو يعني اللي نقدر نفهمه دلوقتي على إن كل الطبيعة، كل الفيزيا ممكن تترجم لمعادلات حسابية.

اتبع خطى فيثاغورث وشاف أفلاطون إن الكون كلّه اللي ظاهره ممكن بيان عليه أحياناً إنه فوضوي أو مش مرتّب هو في الحقيقة بيحكمه نظام متقن جداً ومُرتّب جداً ومتوازن لأقصى درجة، لإنّه محكوم بنظام حسابي هندسي يصل إلى الكمال. مش ممكن العين

تشوف النظام الكامل ده، لكن العقل ممكن يُدركه. كل ما نعرف عن الكون أكثر ندرك كماله أكثر. وأهم ما في الموضوع إن كمال النظام الهندسي اللي بيحكم الكون ده، موجود، وحققي، سواء أدركناه إحنا أو لا. زي بالظبط حقيقة مفاهيم العدل والحق والخير والجمال اللي هو بنى النظرية بدايةً منهم. زي بالظبط أي حاجة في الفضاء مثلاً، كواكب، سدوم، نجوم أي حاجة، قبل ما نعرف عنها ونفهمها هي موجودة برضه، ولما احنا نبقى جاهزين بنقدر نكتشفها، وكذلك الرياضيات وكذلك الحساب وكذلك العلوم وكذلك النظام اللي بيدير الكون، كل حاجة مطلقة وإدراكنا إحنا ليها هو اللي قاصر. فالعلاقة دايماً ناقصة والحقيقة دايماً بعيدة.

جمع أفلاطون أحسن علماء الرياضيات في عصره، وتحت المظلة الأفلاطونية دي حصلت فراسخ من التقدّم والتطور للرياضيات وبالتالي لما نسميه دلوقتي العلوم، وكلّ ده كان في الحقبة دي من التاريخ جزء لا يتجزأ من الفلسفة. الفلسفة هي اللي خلت الحساب والرياضيات حجر أساس تبني عليه ثورتها الفكرية المعرفية، وبدأت الثورة دي تنتقل لكل العلوم واحد بعد الثاني. الفلسفة اتغيرت، سببت تغيير في طريقة التفكير، فحصلت ثورة معرفية.

أفلاطون شاف إن العالم المادي اللي احنا عايشين فيه ده، اللي فيه كل حاجة ناقصة وبتبوظ وبتموت وبتفنى، ما هو إلا ترجمة ما للعالم تاني ما بيحصلش فيه كده. وخلق ده عند أفلاطون تصوّر

إن حقيقة الكون هو إنه متقسم لاثنين عوالم؛ العالم المادي الحسي
اللي بنقدر نشوفه، ونعيشه، العالم اللي فيه كل حاجة متغيرة وكل
حاجة ليها عمر. (إعادة إنتاج أعمق بتصور أكثر تفصيلا لفكرة
هيراكليطيس (Heractulis) اللي ذكرناها) اللي ترجمه أفلاطون
بمقولته الشهيرة.

Nothing is, everything is becoming

كل حاجة في الحياة في حالة «حدوث» مستمر، كل حاجة في
حالة تغير دائم، مافيش أي حاجة مخلوقة ثابتة ثبات أبدي، كل
حاجة بتعجز أو بتحلل أو بتفنى أو بتموت. وده العالم اللي بيقدر
البنى آدم يدركه، ويشوفه ويسمعه ويشمه ويحس بيه؛ وعالم تاني
بقه، ثابت مايتغيرش أبدا. العالم اللي ورا العالم اللي عايشين فيه
إحنا، وما بنقدرش بحواسنا الأرضية نُدركه. بس أهم حاجة برضه إن
بالرغم من إننا مانقدرش ندرك ذلك العالم المثالي الكامل المطلق
بالحواس، إلّا إننا بدراسة العالم المادي نقدر نوصل لإدراك العالم
التاني ده؛ وهو العالم الحقيقي فعلاً لأنه هو العالم الغير متغير أبدا،
الأبدي، اللي مش محكوم بزمن، ولا يفنى ولا حتى يتغير.

تطبيق ما سبق على الإنسان نفسه في تصور أفلاطون، بيخلي
البنى آدم عنده وجودين برضه؛ وجود مادي حسي؛ جسمه، اللي
بيخضع لقواعد الطبيعة، لقواعد العالم المادي، فيصبيه دايمًا
مشاكل وبتطراً عليه عيوب، ودائم التغير في كل ثانية لحد ما يعجز

ويموت، وروحه من ناحية ثانية بقره اللي ولا بتعجز ولا بتموت
ولا بتتغير. وبالتالي تبقى هي دي حقيقة البني آدم فعلاً. البني آدم
هو روجه مش جسده.

الأفكار دي بالذات عن العالمين اللي واحد منهم حقيقي
والثاني ترجمة ليه بس، بتاعة سقراط ومن بعده أفلاطون خلّت
كثيرين يسمّوهم، مسيحين قبل المسيحية^(١).

دلوقتي دي كلها بالنسبالكو أفكار بديهية بس ده بسبب معتقدكو
الديني، لكن في الحقبة دي من تاريخ الأرض وفي المكان ده من
العالم حيث كان المعتقد الديني مختلف تمامًا، والعالم مش مخلوق
أصلاً، كانت دي أفكار ثورية ومستنيرة جداً، مُلهمة ومُلهمة جداً،
لإنهم وصلوا للأفكار دي بالجدل العقلي الفلسفي مش بالإيمان
بمعتقد ديني، وماكانوش بيستعملوها عشان يروجوا الفكرة الإيمان
أو الاعتناق الديني، بل كانت أفكار فلسفية بحتة. لكن من كتر
اقتراب الأفكار دي من الأفكار الدينية المسيحية اللي جاءت فيما
بعد، وحتى الأفكار الإسلامية فيما بعد بعد، في العصور الوسطى
كثير من طلبة العلم ذاكروا أفكار سقراط وأفلاطون على إنها كانت
التمهيد للفكرة المسيحية عند الغرب.

أفلاطون نفسه كانت الأفكار دي بتصب عنده في فكرة
الوجود الإلهي، الله الكامل كما نعرفه إحنا، وصدق في

(١) مات أفلاطون حوالي ٣٤٨ قبل ميلاد السيد المسيح.

الـ «Reincarnation» أو تناسخ الأرواح زي فيثاغورث من قبله، الفكرة اللي بتبناها ثقافات شرق آسيا بتاعة إن الروح نفسها بتفضل ترجع تاني للدنيا في أجساد تانية، بتعيش أكثر من حياة لحد ما توصل للغرض اللي اتخلقت عشانه، أن نخبر، أن نتنور، أن نكتمل رحلة تعلمها.

أفلاطون كان شايف إن المفكر تحديدا هدفه الأسمى في الحياة هو إنه يكسر القشرة، يخترق السطح بتاع الحياة اللي هو عايشها عشان يدور على حقيقة الأشياء بعيدا عن إلهاءات الواقع. هو نوع من أنواع التصوف الفكري. الطريقة الوحيدة اللي تقدر تمكّن النبي آدم من إنه يقترب من العالم اللي بتعيش فيه روحه الأبدية بعيدا عن العالم اللي بيعيش فيه جسده الفاني. مش ممكن تلاقي الحقيقة في الحياة دي لازم تدور عليها في الحياة الأصلية اللي دي ما هي إلا انعكاس ليها. (لو خدت الكلام ده على فكرة وقارنته بأفكار إسلامية صوفية مثلا حتلاقي تقارب أكثر بكثير من الطبيعي ☺).

في واحدة من حوارات أفلاطون اسمها «Phaedo» (فايدو)، كتب أفلاطون على لسان سقراط البطل إن اللي بيعمله الفيلسوف في الحياة هو زي ما يكون بروفة للموت؛ بيتخلص من العالم ده ويروح للعالم الآخر بس باختياره طبعاً. وعشان يقدر النبي آدم المفكر الفيلسوف يحقق ده لازم يحرّر نفسه من كل إغراءات وإلهاءات الواقع اللي هو عايشه، بإنه يشوف كل حاجة في الدنيا على حقيقتها الدنيوية الفانية. وده خلّى أفلاطون يبقى عنده موقف

غريب شوية تجاه الفنون، موقف عدائي في الحقيقة؛ شاف إن الفن يجذب الحواس الدنيوية، لحاجات دنيوية برضه، وكل ما كان الفن أجمل كل ما يعمل إغراء أكبر للناس. شاف أفلاطون الفن على إنه خداع مزدوج، هو نفسه وهم، وكمان بيستعمل حاجات أصلا وهمية (لإنها من العالم الفاني) عشان يوهم بيها زيادة من يُعجَب بالفن أيا كان نوعه. فالفن عند أفلاطون بيضحّم ويحلّي وبيزوّق وبيزيد ارتباطك بالدنيا «الفنيا» الغير باقية اللي مش حقيقية (مقارنةً بالعالم الآخر الأبدي الحقيقي)، فبيزيد الفن ارتباطك بالدنيا اللي أصلاً عشان تبقى فيلسوف لازم تزهد وتتصوّف فيها. فشاف أفلاطون الفن على إنه خطر على روح النبي آدم المفكّر ويعطّله عن الوصول إلى هدفه الأسمى!

كان متزمت دينياً أفلاطون! من قبل الأديان ما توصله، مفارقة غريبة! نفهم منها إن التزمت الديني مش سببه الدين أيا كان بل دائماً سببه طبيعة النبي آدم اللي بيمارسه مش طبيعة الدين؛ عشان كده فيه متزمتين متشدّدين من أصحاب كل ديانات الأرض، وأهه كمان شايفين تزمت ديني عند أفلاطون من قبل الديانات!

أفلاطون شاف إن النبي آدم مكوّن من ثلاث عناصر متضادة مع بعض، عقل وعاطفة وإرادة. وشاف إن النبي آدم الحكيم هو اللي بيحلّي إرادته تسيطر على عواطفه، إرادته تتحكم في اللي بيعوزه واللي بيعبه.

في تصوّره للمجتمع المثالي، شاف إن الدولة لازم تساعد الناس في الوصول للغاية دي؛ بيان الملك الفيلسوف الزاهد في الدنيا والحكم اللي بيدور على حقيقة العالم - نفس فكرة سقراط عن الملك الفيلسوف اللي تبنّاها أفلاطون في «الجمهورية» - لازم يبقى عنده ما أطلق عليه «The Auxiliaries» (المساعدين)، اللي هم مثلاً ممكن ييقوا حاجة زي أجهزة الدولة كده، شغلتهم يوجهوا عامة الناس في اتجاه معين بيحدده «الملك الفيلسوف»؛ يعني الحاكم يبقى فيلسوف، يرسم توجه للمجتمع كله، ويدي سلطة لمساعديه عشان يقدرُوا يوجهوا المجتمع كله في الاتجاهات اللي هو شايفها أصح. (وتأمل الفروق وأوجه التشابه بين التصور المبني على فكرة الملك الفيلسوف ده، والأنظمة الشمولية الدكتاتورية اللي اتبعت نفس فكرة تحديد الحاكم لاتجاهات المجتمع الفكرية في الأنظمة الشمولية الدكتاتورية بأنواعها اللي ظهرت لاحقاً في التاريخ، تأمل الفرق بين الملك الفيلسوف اللي بيوجه المجتمع ناحية الحق والخير والجمال، والدكتاتور اللي بيوجه المجتمع مكان ما يحب!).

أفلاطون اكتسب مكانته في التاريخ عشان أفكاره دي في السياسة والحياة فضلت هي الأكثر تأثيراً على كل أفكار الفلاسفة لمدة حوالي ٦٠٠، ٧٠٠ سنة بعد ما مات ولحد ما المسيحية انتشرت وبدأت الأفكار المسيحية تبقى صاحبة التأثير الأكبر على الفلسفة الغربية.

الكهف

حنخّلص كلام على أفلاطون دلوقتي بواحدة من أشهر تصوّراته اللي كتبها في حواراه السقراطي «الجمهورية». أسطورة الكهف؛ حاول أفلاطون في تلك الأسطورة إنه يقدّم تصوّر عن الحالة الإنسانية أو حالة المعرفة الإنسانية تحديداً وعلاقتها بالواقع.

تعالوا نتخيّل كما طلب أفلاطون منا في أسطورة الكهف؛ إن فيه كهف في جبل ما، والكهف ده عميق جوة الجبل فالطريق ليه طويل كفاية إنّه مايدخلش أي نور من برة، فمبدئيا الكهف مُظلم تماما بس في نفس الوقت متّصل بالعالم عن طريق الممر المؤدّي إليه. وبعدين حتتخيّل إن فيه ناس محبوسين في الكهف ده، مساجين، ومش بس محبوسين همّ مربوطين كمان، ومش بس مربوطين، بل كلّهم مربوطين ضمهرهم للممر اللي هو صلتهم الوحيدة بالعالم، وكمان ومثبّته رقابهم بحيث إن كلّهم يبقوا باصّين في نفس الاتجاه ومايقدروش يحركوا راسهم، فمش شايفين بعض أوّلا، وكمان

ماحدّث منهم يقدر يشوف أي حتة في جسمه هو نفسه؛ كل اللي يقدروا يشوفوه هو جدار الكهف اللي هم مربوطين في مواجهته.

والتصوّر ده طبعا يفترض إن الحيطه اللي هم باصينها دي هي كل اللي شافوه طول حياتهم، مايعرفوش أي شكل تاني للحياة، مايعرفوش حتّى البني آدم نفسه بيبقى شكله عامل ازاي، كل واحد مش عارف حتّى هو نفسه شكله عامل ازاي.

في ضهرهم بقه حنولع نار كبيرة متوهجة، وبينهم وبين النار حنبني حيطه بطول البني آدم، هم طبعا مايعرفوش عنها حاجة، هم باصين قدامهم بس؛ وحنخلّي ناس يفضلوا رايعين جاينين بين النار وبين الحيطه شايلين حاجات على راسهم، فالضل بتاعهم هم نفسهم مش حيبقى باين للمساجين المربوطين وشهم في حيطه الكهف (عشان بتمنعه الحيطه) وكل اللي حيقوا شايفينه، هو ظل الحاجات اللي شايلينها الناس اللي بيتحرّكوا فوق راسهم، وحيسمعوا الأصوات اللي طالعة منهم (وكمان بصدى للصوت ده، بسبب الحيطه والكهف). كويس كده؟ قولوا كويس.

بيقول هنا بقه أفلاطون، إن المساجين المربوطين في الكهف دول، «الحقيقة» اللي يعرفوها حتبقى عبارة فقط عن الأصوات اللي بتوصلهم، والخيلات اللي شايفينها بتاعة الأشياء المختلفة اللي شايلينها الناس اللي بيتحرّكوا قدام النار على راسهم. الحقيقة الوحيدة بالنسباليهم حتبقى صدى صوت وخيلات؛ وبالتالي كل

أفكارهم وكل حواراتهم مع بعض حثبقي عن الخيالات اللي شايقينها وصدى الصوت اللي سامعينه، لأن ده هو «كل» اللي يعرفوه، كل ما عندهم من تجربة، ومن «حقيقة».

لو حد من المساجين بعد حياة كاملة من السلسلة دي، فك قيوده واتدور فشاف الحيطه والناس والنار، حيرتعب ويتلخبط وحيبقي عايز يرجع تاني لوضعه «الطبيعي» اللي هو متعود عليه طول عمره، إنه يكون مربوط ومش شايق حاجة غير خيالات لحاجات مايقدرش يميزها، وأصوات مايعرفش مصدرها ومش فاهمها ومع ذلك يتمثل المجهولات دي بالنسبale الحقيقة الوحيدة اللي يعرفها! حيبقي عايز الحقيقة اللي يعرفها.

ولو الشخص ده طلّعناه برّه الكهف، وشاف نور الشمس والجبال والشجر وكده، حياخد وقت طويل جدا عشان يستوعب دول إيه ويتعود عليهم، ولو بعد الوقت الطويل رجّعناه تاني الكهف، وحكى لزمايله القدامى عن اللي شافه برّه، مش حيفهموا أصلاً هو بيتكلم عن إيه لأنهم مايعرفوش غير الخيالات اللي طول عمرهم شايقينها.

أنا بالنسبالي اللي ممكن نتعلمه عن أنفسنا وعن بعض وعن العالم من التصور الأفلاطوني ده مش محتاج شرح مني بس محتاج تأمل منكم انتو.

اقفوا بقة شوية تأملوا وبعدين ابقوا كملوا. تأمل الكهف بتاعك
وبتاع كل بني آدم، تأمل خيالاتك، تأمل الحقيقة اللي تعرفها.

«We don't see things as they are, we see them as
we are». Anaïs Nin (1903 – 1977).

«إحنا مابنشوفش الأشياء كما هي، بل كما نحن».

أنيس نين (١٩٠٣ - ١٩٧٧).

(ومن قبلها بكتير أفلاطون).

أرسطو

تالت الكبار الثلاثة، أرسطو، سمّاه العرب «المعلّم الأول»، «Dante» (دانتيه)^(١) الشاعر الإيطالي الشهير سمّاه «مُعلّم من يعرفون». أرسطو كان الرجل اللي رسم خريطة العلوم كلها. هو واضع علم المنطق ومعلّم الإسكندر الأكبر شخصياً. هو اللي عرفه عالفلسفة ويُقال إن تأثيره كان عظيم على شخصية الإسكندر، ده غير يعني إنجازات كتير حتتكلم عنها وإنجازات أكثر مش حنذكرها. زَي بالظبط ما كان أفلاطون تلميذ نجيب ومُخلص لسقراط، كان أرسطو تلميذ نجيب ومُخلص لأفلاطون.

إتولد أرسطو حوالي ٣٨٤ قبل الميلاد. وهو عنده ١٧ سنة راح أكاديمية أفلاطون عشان يتعلّم فيها. قعد أرسطو في أكاديمية

(١) Dante Alighieri (1265-1321)

أهم شعراء إيطاليا في العصور الوسطى وبيعتبره الكثيرون أعظم من كتب بالإيطالية في كل التاريخ.

أفلاطون لمدة حوالي ٢٠ سنة كاملة؛ وبعدين حوالي ٣٥٥ قبل الميلاد، عمل مدرسته الخاصة في أتيناس وسمّاها «Lyceum».. اللي اكتشف موقعها اليونانيين بالمناسبة سنة ١٩٩٦، واحتفوا بيها أيما احتفاء.

بالرغم من تقدير أرسطو الكامل لأستاذه أفلاطون، إلا إنه رفض تماما نظريته اللي كانت أساس لكثير من شغله، بتاعة إن العالم المادّي اللي احنا عايشين فيه ده، مانقدرش نعتقد إن عندنا علم تام حقيقي بيه، لأنه أصلاً دائم التغيّر ومايبشبتش على حال أبداً؛ وكان بالنسبة لأفلاطون الأستاذ، المعرفة الحقيقية لازم تبقى مرتبطة بالعالم الآخر، لأنه ثابت وغير متغيّر وبالتالي اللي فعلاً ممكن نعرفه عنه يبقى هو فقط الحقيقي؛ مع ملاحظة طبعاً إن المعرفة دي مش للعامّة، بل فقط للحكماء والمفكرين عشان هم اللي يقدرُوا يوصلوا للحقيقة العالم الآخر المجرد الكامل والمتحرّر من قيود الزمان والمكان.

أرسطو كان أكثر إعجاباً بكثير بالعالم، وشاف إن العالم المادّي اللي احنا عايشين فيه ده هو محرّك التفكير أصلاً عند البشرية، هو اللي دفع البني آدم للتفلسف. أرسطو رفض نظرية أستاذه بنفس المنطق اللي رفض بيه سقراط زمان شغل من سبقوه؛ لاحظوا حكاية خطوتين لقدام وخطوة لورا! رفض أرسطو نظرية أفلاطون لأنّ التفلسف والتفكير في محاولة لفهم العالم الآخر، مش ممكن حد يثبت أي حاجة متعلّقة بيها. لكن العالم ده، اللي احنا عارفينه

كويّس وعائشين فيه ونقدر نجرب فيه، هو كل ما نملك. وكل اللي برّاه مش مفروض يقالنا دعوة بيه أصلاً، لأنّه مش حيفيدنا بحاجة. لو فضلنا نحلّق في سماء الفلسفة الأفلاطونية مش حنوصل لأي حتّة، حياتنا هنا عالارض (في العالم المادي الناقص الفاني) حتبقى دايمًا ناقصة. في تصوّري إن تأمل ما وراء الدنيا ممكن يخلّينا نزهد في الدنيا، وممكن يساعدنا نقترّب من الإله، وممكن حتى يقربنا من الحقيقة، ولّا احتمال أصلاً يوصلنا للحقيقة. لكن ده في كل الأحوال مش حيغيّر الواقع، مش كفاية إنه يغيّر الواقع، عشان تغيّر الواقع لازم تذاكره هو نفسه.

أرسطو كان عنده شغف عظيم بالعالم، فضل طول عمره منكب على دراسة الدنيا بكل طريقة يقدر عليها، الوجود المادي اللي كان بيشفه أستاذه على أنّه مُلهي وغير حقيقي، وقع هو في غرامه أيّما وقوع. فرسم أرسطو لعلوم كثير مساراتها الأولى بل وكان أول من يستعمل أسماء لعلوم مهمة جدًا: المنطق، الفيزياء، العلوم السياسية، الاقتصاد، علم النفس، الميتافيزيقا (ما وراء الطبيعة)، علم ظواهر المناخ، البلاغة، وأخيرا وليس آخراً علم الأخلاق. أرسطو حط منهج لعلم المنطق، كان أول واحد يحط قواعد علمية للاستدلال المنطقي السليم. حط القواعد وقسمها ومنهجها، ولمدّة ألفين سنة بعد أرسطو، كان لو أي حد بيدرس منطق يبقى بيدرس منطق أرسطو. كان مصيبة سودة أرسطو، واحد من أهم البني آدميين اللي وُجدوا على كوكب الأرض، وعمود يمكن هو الأهم، من الأعمدة اللي اتبنت عليها الحضارة الحديثة.

في عصور الظلام ماتت علوم أرسطو كلّها مع كل ما مات في أوروبا، لكن فضلت عايشة عند العرب بفضل ابن سينا (اللي كانوا يسمّوه بـ «المعلّم الثاني») والفارابي، ومن بعدهم ابن رشد وغيرهم من علماء العرب المسلمين اللي عملوا شغل كتير في ترجمة ونقل أرسطو وتحليله والزيادة عليه؛ ورجعت ثاني المعارف دي لأوروبا عشان تبقى حجر أساسي مما بنيت عليه نهضتها لاحقاً، وفي الطريق طبعا استفادت منه بشكل كبير جدا الحضارة العربية الإسلامية.

السؤال الأهم اللي انطلق منه كل شغل أرسطو كان:

What is being?

إيه هو الوجود؟

إزاي نقدر نوصف حاجة إنّا موجودة؟ (لاحظوا إزاي هو كان مشغول بـ «الوجود» بسبب رفضه لنظرية أستاذه بتاعة العالمين المختلفين، اللي فيه الوجود المادي ده مش مهم خالص). أول استنتاجاته المهمة كانت إن أي حاجة في الدنيا مش معمولة من الحاجات اللي بتكوّنها، وضرب مثال بيت مثلاً، البيت مش الحجر والخشب والحديد اللي بينوه، لأن لو عندك كل مكونات أي بيت، حاططها قدامك كده، مش حيقى عندك بيت ولا حاجة، حيقى عندك حجر وخشب وحديد وغيره، لكن البيت بيتعمل إزاي؟ البيت بيتعمل بإنك ترتّب كل الحاجات دي على بعض بتصميم معيّن، بترتيب معيّن، فيطلع البيت؛ البيت ماينفّش يتعمل من غير

مكوّناته أهه، لكن المكوّنات لا تساوي البيت، لأن البيت مش معمول من مكوّناته بس. وكذا طبعا كل حاجة في الدنيا.

ضرب مثال كمان بأستاذ أستاذه سقراط، قال: سقراط بني آدم، جسمه مكوّن من خلايا وأنسجة وأعضاء... إلخ، وجسمه ده بيتغير كل يوم ويبين عليه التغير كل شوية وبيعجز، لكن يفضل سقراط هو سقراط بالرغم من إن جسمه عمال يتغير، فسقراط مش جسمه ولا مكوّنات جسمه، وإنما سقراط هو سقراط.

إحنا ما بنسمّيش كل الكلاب كلاب لإتهم معمولين من نفس مكوّنات الكلب، بل بنسمّي الكلب كلب لما يكون عنده «تصميم» الكلب، الـ «design» بتاع الكلب، مواصفاته. مع إن مكوّنات الكلب هي مكوّنات كل حيوان، وكذا طبعا كل فصيل مخلوق في الدنيا. وطبعا كلام أرسطو ده كان مُذهل في مواجهة الماديّة المفرطة اللي كانت بتؤمن إن المادة فقط هي اللي حقيقية لإننا نقدر نمسكها ونفحصها وندرسها. كان تأمل أرسطو للوجود والكينونة من وجهة نظر مبنية عالمادية، على الموجود، بس مش الموجود من برة كده، انشغل أرسطو بالنزول إلى أعماق الوجود ده يدور على أسبابه (من تصميم وغرض وهكذا).

طيب، انطلاقاً بقة من قناعته إن كل حاجة لا تساوي المادة اللي معموله منها، رفضه للماديّة وكمان رفضه لنظرية أستاذه أفلاطون إن كل حاجة في الدنيا هي ترجمة أو انعكاس لحقيقة العالم الآخر

الغير دنيوي وهو ده اللي المفروض ننشغل بيه واحنا بندور على حقيقة الأشياء؛ كان لازم أرسطو يحدّد بيه إجابته هو عن: ممّ تتكوّن الأشياء؟ شاف أرسطو إن كل حاجة معمولة من الـ «form»، اللي هو الهيئة، الشكل، أو التصميم مثلاً، اللي هي معمولة بيه. وهنا وصل لأنه يفكر في مفهوم «السبب»، وشاف إن كل حاجة بتتكوّن حقيقتها من أربع أسباب بيكملوا بعض، أول ما تدرّكهم، تفهم علطول حقيقة اللي انت بتحاول تفهمه.

وهنا استعمل مثال يشرح بيه موضوع الأربع أسباب أو أغراض اللي بفهمهم ممكن توصل لحقيقة أي حاجة؛ تمثال رخام مثلاً، عشان التمثال يبقى تمثال لازم أولاً يبقى فيه رخام، وده سمّاه أرسطو «السبب المادي»، هو اللي بيجابو على سؤال: معمول من أنهي مادة؟ وافتكروا إننا اتفقنا خلاص إن ده سبب أساسي لأي حاجة عشان توجد، لكن هو مش سبب كافي، لسه لازم ٣ أسباب تانيين يتحقّقوا عشان يتحوّل الرخام إلى تمثال.

تاني حاجة محتاجها التمثال عشان يتعمل هي مطرقة وإزميل اللي هو السبب اللي سمّاه أرسطو «The efficient cause»، «السبب الفعّال»، الأدوات اللي حنستعملها عشان نحوّل قطعة الرخام إلى تمثال. بس لو أنا مثلاً قعدت أخبط بشاكوش وإزميل في حتة رخام مش حيطلع تمثال، هنا نحتاج السبب الثالث: الـ «form»، التصميم، الـ «design»، حيبقى تمثال راجل ولّا ست ولّا حصان ولّا غيره، «The Formal Cause» ده، السبب بتاع

الهيئة والشكل والتصميم هو سبب عميق الأهمية لأي حاجة في الدنيا لأن هو اللي بيحدد شخصيتها، «إيه هي؟»؛ وأخيراً وليس آخراً النحّات بقه اللي حيستعمل الرخام والأدوات والتصميم دول عشان يعمل التمثال. وهو السبب الأخير والأهم والأعلى، لأن هو اللي عنده الغرض اللي بيتخلق عشانه التمثال أصلاً، إن يبقى فيه حد عايز يعمل - ويقدر يعمل - . فيدور بقه عالأسباب السابق ذكرها، لكن أهم ما في التمثال هو السبب الرابع ده، «صاحب الغرض».

يبقى عند أرسطو ٤ أسباب لأي حاجة عشان تتخلق:

الأول المادة اللي بتتعمل منها؛ السبب المادي.

الثاني الأدوات اللي حتعملها؛ السبب الفعّال بتاع الـ «Efficacy».

الثالث الصيغة أو التصميم؛ اللي هو الـ «Form».

وأخيراً الرابع، الهدف النهائي، الصانع اللي بيملك الغرض شخصياً؛ أهم الأسباب على الإطلاق، لأنه المُتسبّب في الخلق.

فيه حتة صعبة كده جاية أهه؛ دلوقتي بقه في حالات كتير ممكن الأسباب الثاني والثالث والرابع دول يبقى أي اتنين أو أكثر منهم حاجة واحدة؛ لما نكون بتتكلم عن كرسي مثلا الموضوع سهل، الغرض من الكرسي واضح، والفروق بين أسباب حصول الكرسي واضحة، زي مثال التمثال بالظبط؛ لكن لو بتتكلم عن شجرة مثلا (مش شجرة فاكهة، عشان ماتفتكرش إن الغرض من شجرة الفاكهة

هي الفاكهة مش الشجرة نفسها)؛ في الشجرة، السبب المادي اللي اتعملت منه هو الشجرة نفسها، تاخذ شتلة من شجرة تزرعها في الأرض تطلع شجرة جديدة، الشجرة اتعملت من الشجرة. الشكل أو التصميم اللي هو السبب الثالث، يبقى هو نفسه السبب النهائي (إنت ممكن تقرّر تعمل منها كرسي برضه، وتحول الشجرة لسبب مادي للكرسي، ده موضوع ثاني، بس هي نفسها غرض في حد ذات نفسها كده). (السبب الثاني بتاع الـ «Efficiency» اللي هي الأدوات في حالة عمل التمثال، بتبقى هنا المية والغذا اللي بتاخدمهم الشجرة من الأرض والهوا، والضوء اللي بتاخره من نور الشمس وهكذا).

الشجرة دي بقه الـ «Form» بتاعها بيكتمل بإنها تكتمل، وهي جاية من نفسها، وتصميمها موجود في سببها المادي، ماحدث اضطر يعملها تصميم جديد، وكمان الغرض النهائي منها بيتحقق أول ما تصميمها يكتمل. فبقت الأسباب بتاعة الشجرة دي مش بس متصلين ببعض بل أصلا هم واحد، كلّه «منه فيه» 😊 (زي ما بيحصل في حالات كثير، كلهم بيتطلبوا المجهود ده في تحليل أسبابهم).

الخلاصة يعني بتاعة نظرية الأسباب لأرسطو؛ هو إن الإيمان فقط بما هو مادي بيخليك قصير النظر ماتقدرش تدرك حقيقة الأشياء، وفي نفس الوقت البعد عن العالم المادي لحساب العالم الآخر زي ما عمل أستاذه برضه حبيعدك عن إدراك حقيقة الأشياء.

الـ «Form»، الشكل بتاع أي حاجة يبقى متأصل في وجودها الدنيوي مش منفصل عنه، مش برّاها؛ صيغة التمثال بيحملها التمثال

جنباً إلى جنب مع التمثال معمول من إيه ومعمول ازاي ومين عمله وعمله ليه. وكذا كل حاجة في الدنيا، كل حاجة بتتكون من كل الأسباب دي مع بعض. وأهم ما في الموضوع هو إن فهم أي حاجة في الدنيا فهم حقيقي بيطلب الفهم العميق ده لكل «أسبابها».

شاف أرسطو إن الجوهر الحقيقي لأي حاجة، روح أي حاجة، مش في مكوناتنا، بل في الوظيفة اللي بتأديها. قال مرة في شرح الحكاية دي إن لو العين عندها روح يبقى روح العين هي الرؤية، ألا وهي وظيفتها. وشاف الأشياء بنفس الطريقة؛ فلو الشاكوش له روح، حتبقى روح الشاكوش هي عملية الدق نفسها، عملية استعماله. الفكرة الحقيقية من أي حاجة في الدنيا هي اللي الحاجة دي بتعمله، الغرض من وراها، وفهمنا للفكرة دي هو طريقنا لفهم أي حاجة، بفهم نظرية أرسطو بتاعة روح الشيء صيغته وشكله تصميمه وأخيراً غرضه النهائي.

النظرية دي مش بس أدت أرسطو الإجابة عن سؤاله الأهم، بتاع ما هو الوجود المادي؟ بل كمان حلتله مشكلة التغيير، التغيير بتاع كل حاجة في العالم المادي اللي خلّت أفلاطون يفقد إيمانه بيه؛ قال فيها أرسطو إن التغيير بيحصل لما المادة اللي بتدخل في تكوين شيء ما، تاخذ شكل ماخدتوش قبل كده. اللي هي العملية اللي بتحصل طول الوقت في كل ثانية لكل حاجة في الدنيا بتتغير بإنها هي نفسها أو جزء منها يتحول إلى مكون حاجة مختلفة، بمعنى بسيط إن التغيير ده هو حقيقة العالم ده، وبالتالي لا يمكن فهم العالم من غير فهم متغيراته.

يقول أرسطو إن في كل محاولاتنا لفهم العالم لازم مانساش أبدا إن اللي احنا عايشين فيه ده هو العالم اللي احنا عايزين نفهمه، فلازم مانقبلش أبدا تفسيرات بتناقض نفس التجارب اللي احنا أصلا بنحاول نفسرها. المقصود هو إننا نثق في تجاربنا، ومانقبلش أي تفسير يبلغني التجارب السابقة أو بيعتبرها ماحصلتش. بل لازم نفضل قابضين إيدينا على تجاربنا السابقة طول الوقت عشان كل التجارب دي بتصب في الغرض النهائي بتاعنا احنا نفسنا كإنسان، وهو أننا نفهم الحقيقة، ولو تخلينا عن تجاربنا مش حنقدر نوصل ثاني (لإن الحقيقة شيء متغير دائما وإدراكها مش منفصل عن إدراك أسبابها).

يلاحظ عبر تاريخ البشرية أن الأمم المختلفة بتمشي في واحد من الطريقتين دول، التفكير المادي أو التفكير العقلاني اللي ظهر لاحقا في القرن الـ ١٧ والـ ١٨، حسب طبيعة مجتمعاتهم؛ الشعوب المتديّنة بتؤمن بيما آمن بيه أفلاطون، الدنيا فانية، مش حقيقية وهكذا؛ والشعوب اللي بتميل للعقلانية أكثر من الإيمانية بتمشي في طريق أفكار أرسطو. (لاحظ ازاي ابن رشد بذل مجهود رهيب في تقريب أفكار أرسطو دي من أفكاره «الإسلامية»). وكما هو الحال دائما الحلول الوسطى بين اليمين والشمال بتبقى دائما الحلول الأسلم، (الفيلسوف الألماني الشهير كانط في القرن الـ ١٨ هو اللي خلق نظرية جديدة عن المعرفة بتجمع بين الاتجاهين المختلفين جدا عن بعض دول).

تأمل بقه ازاي أرسطو فكر في كل حاجة بطريقة مختلفة عمّن سبقوه لأن فلسفته كانت مختلفة عمّن سبقوه، انطلق من نقطة انطلاق مختلفة، لبس نظارة مختلفة وبص بيها عالعالَم فشاف كل اللي شافه ده. تأمل ازاي وهو بيّفكر في مسألة الوجود الصعبة دي وبيبعد فراسخ وأميال عن نظرية أستاذه اللي مش مهتمة بالعالم المادي، بدأ يشوف إيه.

فلسفة الأخلاق تطوّرت جدا على إيد أرسطو بالرغم من إن لاحقاً حتى لحد القرن العشرين فضلوا فلاسفة الأخلاق منهمكين جدا في الإجابة عن أسئلة فردانية كده، إيه هو الحق؟ إيه هو المفروض؟ إيه هو الصح؟ (نفس الأسئلة اللي بدأت بيها رحلة سقراط من ٢٥٠٠ سنة!) لكن أرسطو كان عنده اقترب عبقرى أوسع وأعمق لموضوع الأخلاق ده.

شاف أرسطو إن الغرض بتاع البني آدم إنه يعيش في سعادة مش ممكن يتحقق لو اتحبس البني آدم ده في نفسه ودور على سعادته هو لوحده؛ السعادة عند أي حد هي السعادة اللي يقدر يحصل عليها سواسية مع الناس اللي هو عايش معاهم في مجتمع واحد. لما يتحقق المجتمع بيسعد الناس اللي عايشين فيه ومش ممكن ده يحصل لأي واحد منهم على حدة. مهما تحققت انت لو حدك مش ممكن توصل للسعادة، مش ممكن تعيش بالطريقة اللي انت عايزها في مجتمع بيرفض الطريقة دي وتعيش في سعادة. اهتمامك بنفسك بس، ومحاولتك لإرضاء نفسك بس، لازم حيخلق صراع مع

الناس اللي انت عايش معاها، والصراع تأثيره سيئ على الشخصية
أولا، وثانيا الطريقة الوحيدة لتجنب الصراع ده هو إن البحث عن
السعادة يبقى موضوع كلي يخص المجتمع بحاله.

صحيح الصراع مضرّ بالبني آدم لكن كمان البلادة وعدم
الاهتمام مضرّين بالبني آدم، ده اللي وصل أرسطو للـ «doctrine»
أو العقيدة الشهيرة.

«The Golden Mean» المتوسط الذهبي؛ اللي ببساطة يقول
إن الفضيلة دايمًا في نقطة في النص بالظبط بين نقيضين عكس
بعض؛ فالشجاعة هي اللي في النص بالظبط بين الجبن والرعونة،
الكرم هو اللي في النص بالظبط بين البخل والإسراف، التواضع
هو ما بين الوقاحة والخجل وهكذا. لو الإنسان غرضه «التوازن»
حيعرف يبقى سعيد، ولو المجتمع كله متوازن حيسعد كل من
فيه. راقب شعوب الأرض المختلفة وتأمل ازاى يستحيل السعادة
تتحقق في وجود تطرف في أي اتجاه.

امتد تأثير تصوّر أرسطو عن الأخلاق لنظرته للسياسة، فشاف
إن الدولة شغلتها إنها تحقق التوازن ده للمجتمع (عشان يوصل
المجتمع للسعادة، كجماعة مش كأفراد) ومن هنا جت مقولته
الشهيرة: «الإنسان حيوان سياسي».

«Man is by nature a political animal».

والمقصود هو أن السياسة مش منفصلة عن سعادة الناس الشخصية لأن السياسة شغلتها تخلق دولة تحقق سعادة الناس كلهم كجماعة.

أرسطو على فكرة كان راجل غني وقوي، كسب في زمانه جايزتين في بطولات مصارعة، وبرضه تأمل تأثير القوة الجسدية والغنى المادي على ثورة أفكاره وشجاعته. مات أرسطو سنة ٣٢٢ قبل الميلاد عن عمر يناهز الـ ٦٢ سنة، بس عاشت فلسفاته ومساهمته في صناعة حضارة البشرية للنهارده ولنهاية حضارة البشر.

أرسطو في أول حياته كتب مجموعة من الـ «dialogues» أو الحوارات زي اللي كتبهم أستاذه أفلاطون، لكن أغلبهم ضاع وما وصلناش زي أغلب كتاباته، ومع ذلك ساب أرسطو كتب كتير بعد ما مات، لكن للأسف بعد اللي ضاع أغلب اللي وصلنا منه ماكتبوش أرسطو بنفسه، فالكتب اللي عندنا دي عبارة عن تجميعات لأفكاره عملها تلامذته، وفضلت تنقح عبر السنين ويحصل عليها تغييرات بدرجات متفاوتة طبعاً عشان دي فلسفة، وهي الفلسفة بتتنقل روح اللي بينقلها بتزود عليها. وده اللي بيخلي قرابة أرسطو مسألة صعبة ومعقدة ومتعبة جداً؛ أرسطو كان واحد من علامات التاريخ البارزة القليلين جدا اللي ذاكر كل علم كان ممكن يوصله؛ درس فيزياء وتشريح وفلك وعلم الأجنة وعلم الحيوان وجغرافيا وجيولوجيا وعلم ظواهر المناخ وغيره، كان موسوعة أرسطو. وكان مهم جدا عشان يلعب الدور اللي لعبه في تاريخ حضارة الأرض ده

إنه كان يبقى موسوعي كده، لأن موسوعيته دي وتخصصه في علوم كثير هو اللي خلى شغله يغير نظريات المعرفة والعلوم بعده.

الكتب اللي سابها وراه بغض النظر عن إن أغلبها كان نقلا عنه، كانت في مجالات كثير جدا أهمهم في نظر الكثيرين كان «كتاب السياسة»؛ كتب فيه عن أنظمة الحكم المختلفة اللي كانت بتحكم بيها إمبراطورية الإغريق، نقد الديمقراطية (حكم العامة)، ونقد الأوليغاركية (حكم النخبة)، وقال إن الطريقة الوحيدة لممارسة الديمقراطية بشكل سليم هي إن الطبقة المتوسطة هي اللي تمسك زمام أمورها؛ لا تستقيم الديمقراطية من وجهة نظر أرسطو إلا في مجتمع الطبقة المتوسطة فيه أكبر من طبقات الفقراء والأغنياء مجتمعين، الديمقراطية للطبقة المتوسطة، لأن ديمقراطية العامة توذي الأمم في داهية، وديمقراطية الخاصة الأغنياء في الغالب طبعاً، بتوذي الشعوب في داهية.

وهنا فيه مفارقة غريبة جدا وفي غاية الأهمية ذكرها الشيخ علي عبد الرازق^(١) في كتابه القصير المهم جدا «الإسلام وأصول الحكم»؛ إن علماء العرب كانوا مبهورين بكل شغل الإغريق، ترجموا عنهم كل حاجة وقعت تحت أيديهم، وأرسطو نفسه كل

(١) اتولد الشيخ علي عبد الرازق ١٨٨٨ ومات ١٩٦٦؛ وفي سنة ١٩٢٥ كتب «الإسلام وأصول الحكم»؛ كتاب صغير مهم جدا في نقد الحكم المسمى بالخلافة الإسلامية؛ واتفق بسببه من الأزهر وانتفى بسبب حساسية الموضوع في وقت كيان الملك فؤاد الأول كان عايز يُسمى خليفة واضطر يكتفي بلقب ملك.

شغله انتقل للغة العربية، كل شغله ما عدا كتاب واحد، كتاب السياسة! حيث جرت العادة أن علماء «الدولة الإسلامية» كانوا عارفين كويس إن مافيش سياسة تحت أنف صاحب لقب خليفة للمسلمين، طول ما فيه «خليفة» يبقى الناس تسيب المُلْك للملك! ولما تتأمل ازاى علماء العرب وهم بيتقلوا شغل أرسطو تجاهلوا الموضوع السياسي ده كله على بعضه، تشوف علطول الجذور القديمة العميقة للمشكلة اللي احنا فيها دلوقتي حالا واحنا بنحاول نبني ديمقراطية على هذه الأرض. عزل الناس عن السياسة تطلب عزلهم عن الفلسفة، وعزل الناس عن الفلسفة تسبب في إن الشعوب العربية لحد النهارده بتعاني من التبعية لحكامها. إحنا ما عندناش سياسة مش عشان احنا خايين لآ، الناس مش فاكرة السياسة هي كام نفر بيطلعوا بيدل في التلفزيون عشان احنا عبط لآ؛ إحنا ما عندناش سياسة عشان مافيش حجر أساس تتبني فوقه السياسة، مافيش فلسفة، كان في تاريخنا غير مسموح بالفلسفة. ثنائي السلطة والمؤسسة الدينية من أول دولة الأمويين لحد النهارده كان أكبر إنجازاتها إن مايقاش فيه فلسفة، ولو مافيش فلسفة ولا حيقى فيه سياسة، فينعم الحكام بالشعوب اللي بيحكموها منفردين، ولو مافيش فلسفة حتتعم المؤسسة الدينية بالقدسية الزائفة اللي بتحبها جدا. ماحدث حيسألهم، ماحدث حيراجعهم ولا يردّهم، كتب التراث حتفضل تفرز ما فيها من سموم في عقول البشر، ويبقى الوضع على ما هو عليه. والتمن للأسف كان كبير

جدا، التمن كان ببساطة الفرق بين وضع العلوم والسياسة والفنون في أوروبا مثلا النهارده، ونفس وضع العلوم والسياسة والفنون في البلاد العربية النهارده. عزل الفلسفة عن الناس اللي تطلبه الوضع السياسي ما بيضرش السياسة بس، بيضر كل حاجة!

ولما تتأمل تاريخ المسألة دي بطوله وعرضه، تدرك ازاى التغيير في الفكر الفلسفي بيغير الدنيا. ممالك المسلمين كانت عارفة الحكاية دي كويس عشان كده فضلت عبر مئات سنين تمنع حصول التغيير في الفكر اللي حسبته الفلسفة ده.

الفلسفة أصلها مشكلتها إن مالهاش علاقة بالأشخاص، ليها علاقة بقيم عليا منفصلة عن جميع الناس. لما تكون فيه فلسفة العدل مش حيبقى هو العدل من وجهة نظر الحاكم، ولا حتى حيبقى العدل من وجهة نظر رجال الدين، حيبقى العدل اللي هو العدل نفسه، المطلق اللي مالوش علاقة بالأشخاص، اللي الجميع بيُرغم عليه بما فيهم الحاكم ورجل الدين إن تطلب الأمر.

بيخلص الكتاب أهه من حيث بدأ؛ بما أن الفلسفة هي المكوّن الأصلي للحضارة، مستحيل من غير فلسفة تبقى الحضارة.

عايزين حضارة ولا مش عايزين؟!

خاتمة

إوعوا أبدا تنسوا الكتاب ده كان عن إيه، ماكانش عن طبيعة العالم، ولا عن علاقة العالم ده بالعالم الثاني، ولا كان عن المادية ولا العقلانية، ولا كان عن سقراط وأفلاطون وأرسطو، الكتاب ده كان عن الفلسفة، عن وجهة النظر، عن طريقة التفكير.

الكتاب ده كان عن ازاي الفلسفة مش بس تقدر تغيّر الواقع والمستقبل، دي هي أصلا الأداة الوحيدة لتغيير الواقع والمستقبل. الواقع اللي احنا عايشينه النهارده عشان يتغير مش محتاج إدارة شاطرة بس، ولا محتاج فلوس بس، ولا محتاج حتى تعليم بس، الواقع اللي احنا عايشينه في أقدم دولة في تاريخ الأرض محتاج «حضارة».. إحنا محتاجين حضارة شخصيا، والحضارة بتتكوّن من مكوّن أصلي واحد، هو اللي بيسببها، قبل المبانى والإنجازات والمدنية، قبل النجاح والازدهار والرخاء، الحضارة العقل هو اللي بيخلقها. من غير العقل ما يتغيّر، من غير ما العقلية تتغير، الفكر

يتغير، مستحيل يحصل تغيير حقيقي عالاًرض. ممكن حاجات
في القشرة تتصلح وتتعدّل ويتغير شكلها آه، لكن مجموع عقليات
البشر اللي عايشين في أي وطن هو اللي بيحدد عندهم حضارة ولاً
لاً، وبالتالي هو اللي بيحدد مصيرهم. وهو كمان اللي بيحدد همّ
سُعداً ولاً لاً، خليك فاكراً!

زي ما قتللكو في أول الكتاب ده، أنا مش متأكد إزاي ده بالظبط
ده ممكن يتحقق، إزاي ممكن تتخلق تاني حضارة في قوم حصلهم
كل اللي حصلنا ده عبر عشرات السنين، إزاي يُمحي أثر الجهل
والتجهيل والتجاهل والتواكل وقصر النظر والنفعية والمادية وعدم
الانضباط وعدم احترام كل ما هو مهم؟ إزاي ممكن في وسط كل
الأنقاض دي نقدر نبني حضارة تاني؟ فعلاً مش عارف. بس اللي
متأكد منه إن البداية لازم تكون بالبني آدم، بكل واحد فينا.

أنا شخصياً متأكد إن مش حيعمل حضارة أبداً ناس عايزين
فلوس وبس، ولا ناس بتكره بعض، ولا ناس بتتعالى على بعض،
ولا ناس بتقول يلاً نفسي. مش حيعملوا حضارة أبداً ناس بيتكلموا
وبعدين يبقوا يفكروا لو حصل نصيب، ناس بتستبدل ميزان العدل
بميزان المزاج، ناس بتزَعق في الوقت اللي المفروض يسمعوا فيه،
ناس بتتخانق وتشتّم بدل ما تتفاهم وتتفق. مش حيعملوا حضارة
أبداً ناس عايزين المصلحة قبل الحق، والمصلحة قبل العدل،
والمصلحة الشخصية ويولعوا بقية الناس. مش حيعملوا حضارة
أبداً ناس بيتعلموا أو في الحقيقة بيعملوا نفسهم بيتعلموا عشان

يعرفوا يتجاوزوا بالشهادة، مش حيعمل حضارة أبدا اللي بيشتغل
عشان الفلوس، واللي بيتكلم عشان يعجب اللي بيسمعوه، واللي
بيتصرف عشان حد يسقّله. مش حيعمل حضارة أبدا اللي مش
عايز يعرف، واللي ماتهموش الحقيقة، واللي مش شايف غير نفسه.
كل دول مظاهر لغياب الإنسانية والعقل، مظاهر لانعدام الحضارة
في نفس النبي آدم. وولا واحدة من كل ما ذكره وقدّه أضعاف
مضاعفة كلكو فكرتوا فيه بيتصلّح من عالقشرة، لازم يتصلّح من
جوة، من جوة خالص، من عقله، عقليته، فلسفته. مش حيقدر
ناس يعملوا حضارة غير بتغيير في وجهة النظر اللي بتحدد اتجاه
البوصلة، وبالتالي وبالبديهي اتجاه المصير.

لما ناس كثير بيجوا يتكلموا عن نجاح الوطن يقولوا: «ابدأ
بنفسك» وهو شيء مفيد يعني بس مش كفاية أبدا، النجاح على
مقياس كبير مسألة كلية بيحصل لما عوامل كثير أوي تتحط في
منظومة مضبوطة تسمح بالنجاح. لكن فيما يتعلّق بصنع الحضارة
الموضوع تراكمي، شغلة كل بني آدم إنه يصنع حضارة في نفسه.
النبي آدم صحيح مايجيش الدنيا باختياره لكن ما دام جه بقت
شغلته إنه يبقى جزء من حضارة الأرض. بقى مجبر لو عايز يحقق
نبوءة خلقه إنه يحدد لنفسه الهدف من وجوده كإنسان أولا، وبعدين
يعمل مبادئ يؤمن بيها ويموت دفاعا عنها إذا استلزم الأمر ثانيا
(مبادئ طبعا تليق على هدفه من وجوده كإنسان على هذا الكوكب
في هذه الحياة)، وبعدين يعمل لنفسه منظومة قيم أخلاقية تحدد

نوعه في وسط البشر (طبعاً برضه تليق عالمبادئ اللي هو عايش بيها، اللي هي لايقة على هدفه من وجوده/ها). وبعدين لو عايز يبقى سعيد لازم يبقى متوازن، وسعادته بتفضل مشروطة بأنه يعيش في مجتمع متوازن.

بتؤمن بيايه؟ عايز عدل ولا مش عايز؟ عايز الحق ولا مش لازم؟ عايز خير للكل ولا خير ليك لوحدك كفاية؟ مين «ناسك»؟ أمك وابوك وولادك ولا معاهم أصحابك ولا معاهم معارفك ولا معاهم جماعتك ولا معاهم بني وطنك ولا معاهم كل بني آدم عايش عالارض اللي اخترها خالقها لابن آدم يعيش عليها؟ إيه ممكن تعمله وإيه مستحيل تعمله لأنه ضد مبادئك؟ عايز الناس تقول عنك إيه بعد ما تموت؟ كل الأسئلة اللي فاتت دي وغيرها على قد ما كل واحد يقدر يسأل، أسئلة شخصية. بتاعتك وبتاعتي وبتاعة كل واحد على حدة، مش لازم خالص تبقى صاحب تأثير عشان تسألها وتجاوبها وتعيش بيها، مش لازم تبقى حاكم ولا سياسي ولا شخصية عامة ولا فيه ناس كثير بتسمعلك عشان يبقى عندك دور في صنع الحضارة. مش لازم تخترع اختراع ولا تكتشف اكتشاف ولا تطلع نظريات تشقلب الدنيا ولا تكتب كتب عظيمة يعتبرها الناس نواميس من بعدك، كل اللي عليك إنك تعمل حضارة في نفسك، وتحاول تعدي بيها اللي حواليك إنشالله يكون حواليك نفر واحد، وإنشالله تكون العدوى دي بتحصل بإنك فقط تكون زي ما انت فعلاً مؤمن إنك المفروض تكون، مش لازم تبقى خوجة

ولا مدرّس ولا مدرّب ولا مُحاضر ولا خطيب ولا أستاذ، كل اللي عليك فعلا إنك تكون. إنك انت نفسك تبقى صاحب حضارة؛ في عقلك، في ضميرك، قدام نفسك في المراية إنت بس.

تقتضي الأمانة الاعتراف إنني شايف إن مش شرط خالص لو انت عملت حضارتك الشخصية وانا عملت حضارتي الشخصية وده عمل ودي عملت إننا حنبقى أمة عظيمة وأكيد أكيد حننجح لأ، وزى ما اتفقنا مش حتقدر أبدا تبقى سعيد لو حدك وانت عايش في مجتمع غير متوازن وبلا حضارة! بس يكفيك إنك انت نفسك لو كنت إنسان صاحب فلسفة ومبادئ وأخلاق «وحضارة»، تبقى نجحت خلاص، بقيت بني آدم. مش مهم بتعمل إيه في الدنيا ومش مهم مركزك الاجتماعي ومش مهم معاك فلوس قد إيه! وبرجاء ملاحظة إن الحاجات الأقل أهمية بكتير دي بقت الحاجات الأكثر أهمية عند أغلب سكان الأرض!

إنجح في تحقيق حضارة جوة نفسك من أجلِ خاطرِك أنت، ولو نجحت وبقي فيه ناس كتير زيّك، احتمال تعم الحضارة عالجميع.

وأخيرا عايز أشاور على حاجة شايفها مهمة حبتين تلاتة؛ إن من مواصفات ومتطلبات ومستلزمات الفيلسوف الحقيقي، بما إننا اتفقنا من زمان خلاص إن الفيلسوف ما بيعومش أبدا على عوم الناس، مايقولش أبدا اللي الناس عايزين يسمعوه وخلاص؛

يبقى الدليل الأكبر على إنه فيلسوف فعلا هو إنه لازم يشتبك مع مجتمعه، لازم يتخانق معاه، مش بالزعيق والشتيمة يعني، ولا بالأيدي، بالعقل. زي المثقف بالظبط، المثقف اللي عايم على عوم عامة الناس مالوش قيمة حقيقية، شغلة المثقفين إنهم يشوفوا بعد ما مجتمعاتهم شايفة، وشغلة الفيلسوف إنه يشوف أبعدا ما كل لناس شايفين وكم ان يقف دائما حارس دذبان على الحق والعدل والخير والجمال في محاولة دائمة لا تقف أبدا إنه يلاقي طرق يحققهم ويحميهم.

الناس كل واحد يبص على مصلحة نفسه، ودايما دايما الصح أخلاقيا، المفروض يكون، الأنفع للمستقبل، الأعدل للحقوق اللي بي ملخص الحاجات اللي عايزها الفيلسوف دي، بيبقى فيه تضارب مصالح بينها وبين فئة ما في المجتمع صغرت أو كبرت على حسب نظرف. وهؤلاء بيحاربوا دايما الفلسفة، لإن الفلسفة حتغير والتغيير مش من مصلحتهم لإنهم مستفيدين من الوضع الحالي. فكر كده بي الموضوع في ضوء الثورة المصرية في بداياتها مثلا. -الفلسفة ايما عندها ثورة كامنة فيها- لَمَّا يؤمن بيها عدد كافي من الناس نخرج للنور لكن حتى لو لم يؤمن بيها عدد كافي من الناس بتفضل وجوده، كامنة، ساكتة. ففي حالة الثورة المصرية على نظام مبارك قديم دي كل من له مصلحة مع نظام دولة مبارك القديمة، كل من ان مستفيد من الوضع ساعته زي ما كان كده بالظبط ماكانش يايثورة، «ماكانش عايز فلسفة»، لإن طول ما مافيش فلسفة بيبقى

الوضع على ما هو عليه وهو المطلوب بالنسبale. وعلى موقف
العكس الصريح يقف الفيلسوف، لو ركن على جنب، لو بقى مش
عايز تغيير، مش عايز تعديل، مش عايز «ثورة» يبقى مش فيلسوف
ولا حاجة، ولا فيه فائدة تعود على الناس من ورا وجوده بينهم.
يختلفوا الفلاسفة في الطريقة آه، لكن بيشاركوا في الرغبة الدائمة
في الأحسن والأنبل والأعدل، بيشاركوا في استعدادهم الدائم
إنهم طول الوقت يشتبكوا مع مجتمعاتهم لحد ما يحصل اللي هم
شايئينه صح، إلى أن يتغير الصح على أيدي الفلاسفة اللي جاين
بعدهم... وهكذا وهكذا وهكذا.

تفلسفوا تصحوا.

نُصُّ كِتَاب

شوف بقه، حتسأل نفسك الكتاب ده عن إيه؟ الكتاب ده إيه؟
هو نص كتاب ليه؟ سيبك من الحاجات دي. ده كتاب وخلص،
لو حسيت كده إن عندك ما يكفي من أسباب ووقت إقراه.

دي مش قصة طبعًا.. ولا مناظر! (:)

ده كتاب هدفه يأخذك في رحلة ما بعيدة جدًا تلف فيها كثير جدًا
وترجع، لنفسك.

مش حتعرف كده من أول ما تبدأ تقرا بس حغششك عشان
ما تفضلش حيران.

الكتاب ده عنك أنت شخصيًا.

أحمد العسيلي

EL Shorouk الشروق



9789770933190

نص كتاب

L.E 28.00

دار الشروق

www.shorouk.com